


40-ASO O TALOSAGA MA ANAPOGI

40 – ASO O SU'ESU'EGA MA TALOSAGA



40-Days of Prayer & Fasting

By Dennis Smith

Translated with Permission

Faliliuina e Florence Tupito Voigt

40-ASO O TALOSAGA MA ANAPOGI

FAASINO UPU

Faatomuaga.....	Itulau 3, 4
Faatinoga o le Polokalama.....	Itulau 5, 6
VAEGA MUAMUA – O LE PAPATISOGA A LE AGAGA PAIA	
Aso 1.....	Itulau 7 – 9
Aso 2.....	Itulau 10, 11
Aso 3.....	Itulau 12, 13
Aso 4.....	Itulau 14, 15
Aso 5.....	Itulau 16, 17
Aso 6.....	Itulau 18, 19
Aso 7.....	Itulau 20 – 22
Aso 8.....	Itulau 23 - 25
VAEGA LUA – O LE AGAGA PAIA MA LE TATALO	
Aso 9.....	Itulau 26, 27
Aso 10.....	Itulau 28, 29
Aso 11.....	Itulau 30 – 32
Aso 12.....	Itulau 33, 34
Aso 13.....	Itulau 35, 36
Aso 14.....	Itulau 37, 38
Aso 15.....	Itulau 39, 40
Aso 16.....	Itulau 41, 42
VAEGA TOLU – PAPATISOGA A LE AGAGA PAIA MA LE TALA’I ATU	
Aso 17.....	Itulau 43, 44
Aso 18.....	Itulau 45 – 47
Aso 19.....	Itulau 48 – 50
Aso 20.....	Itulau 51, 52
Aso 21.....	Itulau 53, 54
Aso 22.....	Itulau 55, 56
Aso 23.....	Itulau 57 – 59
Aso 24.....	Itulau 60, 61
VAEGA FA – PAPATISOGA O LE AGAGA MA LE MAFUTA ATU IA KERISO	
Aso 25.....	Itulau 62 – 64
Aso 26.....	Itulau 65 – 68
Aso 27.....	Itulau 69, 70
Aso 28.....	Itulau 71 – 74
Aso 29.....	Itulau 75, 76
Aso 30.....	Itulau 77 – 79
Aso 31.....	Itulau 80, 81
Aso 32.....	Itulau 82 – 84
Aso 33.....	Itulau S
Aso 34.....	Itulau S
VAEGA LIMA – PAPATISOGA A LE AGAGA PAIA MA LE MAFUTAGA	
Aso 35.....	Itulau 85 – 87
Aso 36.....	Itulau 88, 89
Aso 37.....	Itulau 90, 91
Aso 38.....	Itulau 92 – 94
Aso 39.....	Itulau 95 – 97
Aso 40.....	Itulau 98, 99

Itulau Faaopoopo:

40-ASO O TALOSAGA MA ANAPOGI

POLOKALAMA – 40 ASO O SUESUEGA MA TALOSAGA

Ta'iala

I. FA'ATOMUAGA:

O lenei polokalama o le 40-Aso o suesuega ma talotaloga ua taapena faapitoa lava mo le ekalesia a le Atua a o faatalitali atu mo le toe afio mai o Keriso, ma mafai ai fo'i ona aapa atu i nisi ina ia latou sauni ai fo'i mo lea aso fiafia. O le sauniuniga e amata i le tuuina atu atoatoa lea o lou loto mo le 40 aso o talosaga ma suesuega ina ia maua ai se mafutaga va lalata a oulua ma Iesu Keriso lou Faaola, faapea ma le aapa atu i nisi tagata se to'a lima ua e faataūaina i lou loto e te tatalo mo i latou i aso fuafuaina ia e 40. Na fetalai mai Iesu lava ia e faapea: “Ou te fai atu foi ia te outou, Afai e loto gatasi se toalua o outou o i le lalolagi i se mea la te ōle atu ai, e faia lea mo i la'ua e lo'u Tamā o i le lagi.” (Mataio 18: 19).

E matua'i maoa'e le malosiaga i talosaga e faia ma le loto gatasi, ma e iai le faamalosiga ma le malosiaga faaleagaga i mafutaga faaKerisiano e faavae i lea talitonuga.

O faitauga ma mataupu nei ua vaevaeina i ni vaega se 5; e ta'i valu faitauga i vaega nei e 5. O faitauga ta'itasi o loo tofu lava ma vaega o faamalosiga o mafaufauga e faasoa ma faatalatalanoa iai, faapea ma vaega e taula'i i ai talosaga i lea aso ma lea aso. Afai o lou faanaunauga ina ia atiina'e le lua mafutaga vavā lalata ma le loloto ma lou Faaola, ma ia mafai fo'i ona e aapa atu mo nisi ua tuuina e le Atua i lou loto ia faataūaina i au talosaga, i latou ua iloa le Atua ae ua toe solomuli i tua i le lalolagi, pe o seisi foi e le'i iloa lava le Alii ma lona toe afio mai, o le polokalama lā lenei mo oe

MALOSI'AGA O LE TATALO

E mana'omia le tatalo mo le tuputupu o le olaga faaleagaga, ma o le auala fo'i lea e fesoota'i atu ai i nisi mo Iesu. Na tusia e le tama'ita'i perofeta o Elena Uaita e faapea: “O le tatalo o le manava ola lea o le agaga. O le mea lilo mo le malosiaga faaleagaga. E leai se tasi mea e sui a'i le alofa tunoa, ma tului ai pea le soifua maloloina o le agaga. O le tatalo o le fessootaiga lea ma le Puna o le vai ola mo le agaga ua matelāina mo se mea inu ma se mea 'ai faaleagaga.” (Gospel Workers, p. 254, 255)

Na silafia fo'i e le tama'ita'i Perofeta le mana'omia o le tatalo mo le ta'ita'iga o nisi ia Keriso: “E ala atu i talosaga, o le galuega lea mo le laveaina o agaga ma fesoota'i atu i loto. (Evangelism, p. 342) A'o e galue i le aumaia o nisi ia Keriso ma lana ekalesia, e faamanuia ia galuega uma e le Atua. A'o e tatalo, ma galue mo i latou o loo i lau lisi tatalo, e le gata i le faaaoga e le Atua oē e aumaia nisi ia Keriso, ae e avea lea ma mea e latalata atu ai fo'i oe ia te Ia.

40-ASO O TALOSAGA MA ANAPOGI

Mo le faamalosia o le vaega o talosaga i lenei polokalama, e iai le vaega i le faaiuga o faitauga o aso taitasi ua ta'ua o "Faagaioiga o Talosaga" e ta'ita'i ai vaega e faataūaina o talosaga i lea aso ma lea aso. E iai foi fuaiupu mai le Tusi Paia ma manatu taūa ia faaaogaina i talosaga.

O LE MALOSIAGA O LE AGAGA PAIA

Ina ua mavae Lona toe tū mai le tuugamau, na fetalai Iesu i lana au soo ina ia latou faatali mo le papatisoga a le Agaga Paia a'o le'i o atu e folafola le tala lelei i le lalolagi. (Luka 24: 49; Galuega 1: 4-8). E ui ina sa lava aso sa latou mafuta ai ma Keriso i le tolu ma le afa tausaga, ma na latou vaai ma molimauina le mana o le Agaga Paia e ala lea i le mau vavega na faia e Iesu, latou te le'i sauni e molimau atu mo Ia. Na mana'omia latou te faatali mo le mauaina e i latou o le mana o le Agaga Paia. Ona o le taūa tele o le papatisoga a le Agaga Paia i le faaolaolaina o ō tatou olaga faaleagaga ma le molimau atu i nisi, o nei faitauga mo le 40 aso o le a faavae lea i le faataūaina o aoaoga o le Afioga a le Atua ma talosaga.

Ona ua e filifilia e te au ai i lenei polokalama o le 40 aso mo suesuega ma talosaga, ua e ulufale i se mafutaga maoa'e ma le Alii. O le a e mauaina se faatasiga vavā lalata ma le Faaola e faapea ma se mafutaga mafana ma Ia; ma o le a faaaogaina foi oe e le Atua e aumaia ai nisi e faatalitali mo lona toe afio mai. A'o lua mafuta i talosaga ma lou soa-tatalo, faapea fo'i ma nisi i lenei polokalama, o le a maua e outou uma lava se mafutaga vavā lalata, toe iloa ai foi o le alofa ma le loto gatasi ma nisi o le au faatuatua. O le a avea fo'i lea o se faamalosiaga o lou lava olaga faaleagaga.

Faamanuia mai le Atua i le amataina o lenei malaga faaleagaga.



40-ASO O TALOSAGA MA ANAPOGI

II. FAATINOGA O LE POLOKALAMA 40-ASO

O nisi nei o mea taua e tatau ona mulimuli ai mo le faatinoina o lou au ai i lenei polokalamama e faamalosia ai lo tatou ola auauna a'o tatou sauni atu e talia le galuega ua tuu mai e le Atua i o tatou lima, le galuega o le lavea'iina o agaga e faatalitali atu i le toe afio mai o lo tatou Faaola.

1. **Ia sa'ili sou soa-tatalo.** O le a e faafesoota'i lou soa-tatalo i aso uma o lenei polokalamama (e ui lea i le telefoni, talatalanoa faafesaga'i, imeli, etc.) ina ia lua faasoa ma talatalanoa i mea nei:
 - 1) Faasoa ni manatu mai le faitauga o le aso.
 - 2) Faasoa ni lagona ma ni finagalo faaalua o le tagata lava ia mai mataupu na faitauina i lea aso ma lea aso.
 - 3) Tatalo le tasi mo le tasi.
 - 4) Faamalosia e oulua lava talosaga mo le to'alima o i latou faapitoa ua lua filifilia e (o uō, aiga, soo se tagata e ta'ua ia te oe) e talosia i āna lava talosaga.
 - 5) Faamanatu ia faaali atu i tagata o lau lisi e ta'ua o ia iā te oe (pe o oulua fo'i).
2. **Tatalo ia faaali mai e le Atua i nisi e te faataūaina mo au talosaga.** I le taualumaga o lenei polokalamama o le 40-Aso, o le a e tatalo mo le to'alima o i latou nei ua e filifilia faapitoa. Fesiligia le taitaiga a le Atua a'o e filifilia nei tagata e 5.
3. **Filifili nisi se to'a lima e te talosia faapitoa i au talosaga o le 40-Aso.** O i latou nei e to'a lima e mafai ona o nisi o lou aiga, uō, o seisi o lau fale faigaluega, o sou tua'oi, etc. E mafai ona pei o seisi e te iloa ua tu'ua le ekalesia pe o seisi lava e le'i iai lava i le ekalesia muamua. (Fautuaina e te filifilia i latou e nonofo tau lata atu ia te oe pe fetau i gofie ina ia faigofie fo'i ona valaaulia mo aso valaaulia faapitoa mo i latou nei, faapea le au mai fo'i i sauniga faatala'i (ma semina) e fuafuaina i le lumana'i.)
4. **Faafesoota'i uma latou ua e filifilia mo au talosaga.** E lelei lava lou talatalanoa ia i latou uma lava o le a e filifilia, pe faafesaga'i, telefoni, imeli, pe o le a lava le auala lelei e ave gofie ai lau mana'oga i nei tagata faapitoa. O se faamatalaga faata'ita'i lenei e mafai ona e faaogaina:

“O le a amataina i le matou ekalesia i le aso _____ se polokalamama e faataūaina ai lo'u filifilia o nisi se to'a lima ou te tatalo faapitoa mo i latou i aso e 40. Taluai ona o oe o se _____ (uō mamae, seisi o lou aiga, tua'oi, uō lelei i le galuega, etc.) ua ou talitonu lava ona o le ta'ua o le ta mafutaga, ou te fia tatalo ai mo oe i lea taimi atofaina. O se maua fo'i lea ia te a'u pe afai e iai lava ni mea faapitoa e te mana'o ou te talosia mo oe mo le 40 Aso o i luma. Ou te fia maua lou finagalo i lea mataupu e pei ona faailoa atu. Ou te toe faafesoota'i atu i se taimi. Ia manuia le aso ma faamanuia atu le Atua.”
5. **Ia e tatalo mo i latou o i lau lisi tatalo i aso uma lava o lenei polokalamama.** A'o e tatalo, ia e faaogaina nisi o mea e faataūaina e pei ona lisi i lalo:

40-ASO O TALOSAGA MA ANAPOGI

- *Ia tosina i latou i le Atua (Ioane 6: 44)*
- *Ia latou sailia ia latou iloa le Atua (Galuega 17: 27)*
- *Ia latou talitonu i le Afioga a le Atua (1 Tesalonia 2: 13)*
- *Ia aua ne'i faapogisaina e Satani o latou mata mai le mea moni ma ia tuu i lalo ni mea a Satani ia aua le aafia ai o latou olaga (2 Koronito 4: 4; 10: 4, 5)*
- *Ia galueaina o latou loto e le Agaga Paia (Galuega 3: 19)*
- *Ia latou talitonu o Keriso o le Faaola (Ioane 1: 12)*
- *Ia latou usiusita'i ia Keriso o lo tatou Alii (Mataio 7: 21)*
- *Ia latou maua'a ma tuputupu ia Keriso (Kolose 2: 6, 7)*

6. Ia e talosia ni mea e mafai ona e faia e faaali atu ai ia i latou ua e filifilia e te talosia e te alofa moni ia te i latou. O se lisi faata'ita'i lenei o ni mea e mafai lava ona e faaaogaina e faatino ai ia tulaga alofa i le taitaiga a le Agaga Paia:

- *Ta'u iai ni mea ta'ua e lelei ai i latou (Positive reinforcement)*
- *Momoli iai ni mau faitau e faamalosia ai i latou*
- *Vala'au iai ma tatalo faatasi ma i latou*
- *Valaaulia tou te fai 'aiga i lou maota i se afiafi*
- *Valaaulia lua te o e fai aiga pe a malolō mai galuega*
- *Ave iai se tusi (card) faamanuia ai aso fanau*
- *Ave iai se card faamalosi loto ma se manatu faamalosi ua musumusina ai lou agaga*
- *Momoli iai se ipu taumafa ua e saunia*
- *Valaaulia lua te o e faatau pe matamata i se polokalama faapitoa (lotu pe o nisi foi polokalama aogā)*
- *A mana'omia, ave iai se card faamafanafana ma se faamalosiga mai se faalavelave*
- *Sauni ma momoli iai se card aso fanau a se tasi o a latou fanau.*
- *Valaaulia lua te o mai i se sauniga lotu*
- *I se taimi talafeagai ai, fesili pe mana'omia se suesuega Tusi Paia*
- *(ma nisi lava mea ua ta'ita'ina ai lou mafaufau e le Agaga Paia e te silafia e mafai ai ona faaalua atu ai lou alofa naunau mo i latou)*

Ia faamanuia tele le Atua a'o faimalaga faatasi i lenei polokalama e faatupu ma faamalosi agaga. Ia manuia!

“O lenei, o outou e leaga; afai ua iloa e outou ona avatu o mea lelei ma ā outou fanau, e lē sili ea ona foaiina mai e lō outou Tamā o i le lagi le Agaga Paia i ē ōle atu ai ia te ia?” (Luka 11: 13)

Faaliliuina mai i le Tusi: 40-Days: Prayers & Devotions to Prepare for the Second Coming; Dennis Smith; Review & Herald Publishing Association, 2010

40-ASO O TALOSAGA MA ANAPOGI

FAITAUGA MO LE POLOKALAMA 40 ASO O SU'ESU'EGA MA TALOSAGA

Faaliliuina e Tupito Florence Voigt – 10/2011

VAEGA MUAMUA: O LE PAPATISOGA A LE AGAGA PAIA

ASO 1: GALUEGA E LUA A LE AGAGA PAIA

O loo molimau le Afioga a le Atua i le tele o galuega a le Agaga Paia. O le tasi o le taitai lea o i tatou ia salamō, talia Keriso, ma ia papatisoina i tatou i le vai. O le galuega lea a le Agaga e mo i tatou uma lava. O le tasi galuega a le Agaga Paia o le faatumulia lea o le olaga o le Kerisiano i lona faatasi mai ina ia mafai ai ona siitia le tulaga ola faaKerisiano ma faia le galuega a le Atua. O le galuega lea a le Agaga Paia e mo i latou e iloa le Atua, e pei ona fetalai mai Iesu e faapea: “Ou te fai atu foi i le Tamā, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau; o ia o le Agaga o le upu moni, e le mafai e le lalolagi ona talia o ia, auā, ua le vaaia o ia, ua le iloa foi o ia; a o outou, ua outou iloa o ia, auā e tumau pea ia ia te outou, e i ai foi Ia i totonu ia te outou.” (Ioane 14: 16, 17)

Na fetalai mai Keriso i le taimi ma le mae’a o le aso Penetekoso, o le papatisoga a le Agaga Paia o le a mafai ona maua e i latou uma e talitonu ia te Ia, e pei ona Ia fetalai mai “ou te ia te outou”. O le faatasi mai lea o le Agaga Paia o loo avanoa mo i tatou i le asō.

O Iesu o le faata’ita’iga mo i tatou i mea uma lava. O Ia na fanau mai i le Agaga; na ta’ita’ia e le Agaga mai lona tamaititi lava e oo ina matua o Ia, ma papatisoina i le vai. Ina ua faatumuina o Ia i le Agaga, na saunia loa o Ia e alu atu ma le malosiaga mai le Agaga Paia e faafeagai ai ma le taua tele ma Satani. O le Luka 4: 1-13 o loo tala mai ai le taua tele a Iesu ma Satani, i faaosoosoga na faamoemoe faapito ai lava le Faaola i le afioga a le Atua. Ina ua maea le mafuta atu o le Alii Faaola i le Tamā i le vao, ma maua lona malosiaga e manumalo ai i le ti’apolo i faaosoosoga, na maua ai loa e Iesu le malosiaga e alu atu ai e tala’i ma a’oa’o atu le malo o le Atua, faataunu’u le galuega o le faamalolō ma tutuli temoni. “Ona fo’i atu lea o Iesu i le mana o le Agaga i Kalilaia, ua logo atu foi le tala ia te ia ua soo ai lava le itu uma. Ua a’oa’o Ia i ō latou sunako, ua viia ai o ia e tagata uma.” (Luka 4: 14, 15)

Na Ia fetalai mai o i latou uma lava e faatuatua ia te Ia o le a latou faia mea e tetele atu lo’o mea ua Ia faia. “E moni, e moni, ou te fai atu ia te outou, o lē faatuatua mai ia te a’u, e faia lava e ia o galuega ou te faia; e fai foi e ia mea e sili i ia mea, auā ou te alu i lo’u Tamā.” (Ioane 14: 12)

Ae le’i faatumulia le tagata faatuatua i le Agaga Paia, ua muamua ona iai le Atua auā o le musumusuga a le Agaga Paia ma le valaau a le Atua na ta’ita’iina o ia e talia Keriso. Ae ui i lea, e lē maua e le tagata le loloto o le malosiaga mai ia Keriso vaganā ai ua faataga le Agaga Paia e faatumuina o tatou loto ma o tatou olaga i aso fai soo. Na folafola atu e Keriso i lona au soo e

40-ASO O TALOSAGA MA ANAPOGI

faatali mo le sasa'a mai o le Agaga Paia ia i latou i le aso Penetekoso ae le i ō e talai atu le tala lelei. "Sa faatasi o Ia ma i latou, ona fetalai atu lea o ia ia te i latou, "ia le tuua Ierusalem, a ia faatali i le mea na folafolaina e le Tamā, ua outou faalogo ai ia te a'u. Auā na papatiso lava Ioane i le vai; a o outou, e papatisoina outou i le Agaga Paia, e le tele ni aso e va ai." Ua potopoto i latou, ona latou fesili ai lea ia te Ia, ua faapea mai, "Le Alii e, o ona po nei ea e te toe fuata'i mai ai le malo ia Isaraelu?" A ua fetalai atu o Ia ia te i latou, "E le tusa ona outou iloa o ona po ma ona tausaga, ua tuu e le Tamā i lana lava pule. A e peitai, o le a maua e outou le mana, pe a afio ifo le Agaga Paia i luga ia te outou, e fai foi outou ma molimau ia te a'u i Ierusalem, ma Iutaia uma lava ma Samaria, e oo lava i le tulū'iga o le lalolagi." (Galuega 1: 4-8)

O le papatisoga a le Agaga Paia o lo'o avanoa mo Kerisiano uma lava i le asō. O le folafolaga lava a le Atua o le a ia foai mai le atoatoaga o le Agaga Paia ia te i latou oē e tatalo atu ia te ia ma le faatuatua. (Luka 11: 13)

Ua fesili foi nisi: E faapefea ona ou mautinoa ua ou sauni e maua ma talia le Agaga Paia? O la'u tali i lea fesili o le a fesoasoani i le faamautinoaina i lou sauni e talia le Agaga Paia. Ua e talia Keriso e avea o lou Alii Faaola? Ua e faamautinoaina lou tuu atu o lou ola i aso taitasi mo Iesu? Afai ua e talia Keriso ma ua e filifili e mulimuli atu ia te Ia, ma faatumuina lou olaga e le Agaga Paia, ou te valaaulia oe e te tataloina lenei tatalo:

Le Tama e, ou te faafetai mo le taitaiina o a'u e talia Iesu Keriso e avea ma lo'u faaola; ma ou te tatalo atu ina ia faamagalō mai a'u i o'u faaletonu uma lava. O lo'u faanaunauga o le tuuina atu atoa lea o a'u mo Iesu. Ou te faafetai mo le folafolaga e faatumuina a'u i lou Agaga, ma maua ai le papatisoga a le Agaga Paia i lo'u ola i le asō. Ou te tatalo o le faatumulia o lo'u olaga i le Agaga Paia e ata atu ai ia te a'u le ola ma foliga o Keriso. Ia maua i lo'u olaga fou le malosiaga ou te auauna faamaoni atu ai i so'o se auala ou te aogā ai i lau galuega. Amene

MAFAUFAUGA MA FAATALATALANOAGA:

1. O le a se a'oa'oga o lenei faitauga i le galuega a le Agaga Paia?
2. Lisi mai ni mea se 2 e ao ina tatou faia ia tatou maua ai le Agaga Paia?
3. O a ni mea aogā se lua tatou te maua pe a tatou mauaina le papatisoga a le Agaga Paia?
4. E te faanaunau ea ina ia e maua le loloto o le galuega a le Agaga Paia i lou olaga ma lau auaunaga mo le Alii? Talatalanoa ma faasoa i lou soa-tatalo.

40-ASO O TALOSAGA MA ANAPOGI

FAAGAIIOIGA O TALOSAGA:

- Talatalanoa i lou soa-tatalo e uiga i lenei faitauga.
- Tatalo faatasi ma lou soa-tatalo mo:
 1. Le Atua e faatumuina oulua i le Agaga Paia
 2. Le Atua ina ia faamalamalamaina atili oulua a'o oulua suesueina faatasi faitauga o aso ta'itasi
 3. Le Atua ina ia famanuia mai i le mafutaga a le lua soa-tatalo
 4. Le faamanuiaga mo i latou uma lava o lo'o ia oulua lisi tatalo.

Faaaoga lenei fuaiupu i le lua tatalo: “Ou te a’oa’o ia te oe, ma faasino ia te oe i lea lava ala e te savali ai; ou te faatonu ia te oe, ma ou vaai ia te oe.” (Salamo 32: 8)



40-ASO O TALOSAGA MA ANAPOGI

ASO 2: TALIAINA O LE AGAGA PAIA INA UA TE'A LE PENETEKOSO

Na folafola mai Keriso na te papatisoina i latou e mulimuli atu ia te ia i le Agaga Paia mo le malosiaga latou te o atu ai ma folafola le tala lelei i le lalolagi. O le folafolaga lenei na faataunuuina i le aso o le Penetekoso. “Ua oo atu foi i le aso Penetekoso, sa i ai uma lava i latou i le mea e tasi ma le loto gatasi. Ona faafuase’i mai lea o le taalili mai le lagi, peiseai o le matagi ua agi tele mai, ua tumu uma ai le fale sa latou nonofo ai. Ua iloa foi e i latou o laulaufaiva peiseai o le afi ua vaevaeina, ua nofo i ō latou luga taitoatasi. Ua faatutumuina foi i latou uma i le Agaga Paia, ua afua ai ona tautala i gagana eseese, pei ona foaiina mai e le Agaga o le gagana ia te i latou.” (Galuega 2: 1-4)

O le papatisoga a le Agaga Paia na le gata lava i le au soo na iai i le aso Penetekoso; o lea folafolaga na tu’uina mai lava mo Kerisiano uma, e oo mai lava i le asō. E le’i iai uma le au talitonu ia Keriso i le aso Penetekoso. O le fesili lā: Na faapefea ona maua e le au Kerisiano le papatisoga a le Agaga Paia ina ua te’a le aso Penetekoso? O le tali o lo’o maua lea i le tusi o Galuega. E faalua lava ona maua e tagata le Agaga a’o lauga Peteru ia te i latou. O loo molimau le Galuega 10: 44-47 I le tasi o nei faatasiga: “Ua tautala atu Peteru i nei upu, a e afio ifo le Agaga Paia ia te i latou uma lava o ē ua faalogo i le upu. Ona matuā ofo lea o ē na peritomeina o ē faatuatua, o e na o mai ma Peteru, ina ua liligi ifo i nuu ese le alofa o le Agaga Paia. Auā ua latou faalogo atu ia te i latou ua tautala mai i gagana uiga ese, ma vivii atu i le Atua. Ona fai atu lea o Peteru, “E mafai ea e sē tasi ona vavao i le vai, ina ia le papatisoina ai i latou nei, o ē ua maua le Agaga Paia pei o i tatou nei?”

Na mauaina fo’i e le ekalesia le papatisoga a le Agaga Paia i le faae’eina o lima o le au aposetolo; “Ua talitonu i latou ia Filipo o folafola le tala lelei i mea a le malō o le Atua, ma le suafoa o Iesu Keriso, ona papatisoina lea o i latou o tane atoa ma fafine. O Simona foi, ua talitonu ia; ua papatisoina foi o ia, ona faatasi atu lea o ia ia Filipo, ua matuā ofo, ina o matamata i faailoga ma vavega tetele ua faia. Ua faalogo foi le au aposetolo i Ierusalema, ua talia e Samaria le afioga a le Atua, ona latou auina atu lea o Peteru ma Ioane ia te i latou. Ua o mai foi i laua, ona tatalo lea mo i latou, ina ia maua e i latou le Agaga Paia; auā o ona po ia e le’i afio ifo ai o ia e se tasi o i latou; ua na ona papatisoina o i latou i le suafoa o le Alii o Iesu. Ona lā faaee atu lea o laua lima ia te i latou, ona maua lea e i latou o le Agaga Paia.” (Galuega 8: 12-17). I le tusi o Galuega 19: 1-6, na fai ai fo’i lea sauniga e Paulo ina ua feiloa’i ma le au faatuatua i Efeso.

O le faae’eina o lima mo le papatisoga a le Agaga Paia ia fai fo’i e se tagata talitonu ua uma ona papatisoina lona lava olaga e le Agaga Paia; ae o le faae’e o lima e le na o le auala lea e maua ai le papatisoga a le Agaga Paia. O le mauaina o lea faamanuiaga o le papatisoga a le Agaga Paia e maua ma talia lea o le folafolaga a le Atua ma le faatuatua i le Agaga Paia. “Ina ia oo ai i nuu ese le manuia o Aperamo ia Keriso Iesu, ina ia tatou maua i le faatuatua lē na folafolaina, o le Agaga lea.” (Kalatia 3: 14).

40-ASO O TALOSAGA MA ANAPOGI

O le taliaina atoatoa o le Agaga Paia i o tatou olaga e maua ai le faafouga moni o la tatou mafutaga ma le Atua. A tatou ausia lea tulaga maua e le taumate o le mana'o fo'i lea o le Agaga e faatumuina i tatou i lona faatasi mai. O le mea lea e tatau ai ona tatou tatalo faatauina i aso fai soo, ma saili le mafuta mai o le Agaga Paia ina ia mafai ona tatou molimau faamaoni i le matagofie o le faaolataga ua saunia e Keriso mo i latou uma o ē e talitonu ma talia o ia. E pei fo'i ona faamalosi mai lana auauna, le tamaitai o Elena Uaita: Ia faataūaina e i tatou uma o le manaomia o le papatisoga a le Agaga Paia, le faapaiaina o i latou uma o le ekalesia ina ia avea o latou olaga faifaipea, o le tuputupu, ma o ni la'au e fua mai o ni faato'aga na totonu lava e le Atua. Na silafia fo'i e le auauna tamaitai le taūa o lea papatisoga mo le au faatuatua uma, ma ia sailia loa ma le faamaoni le mafuta mai o le Agaga Paia.

FAAMALOSIGA MA FAATALATALANOAGA:

1. O le ā le mea na ta'u atu ai e Iesu i ona so'o e faatali mo le papatisoga a le Agaga Paia?
2. O le ā le si'osi'omaga na iai le au so'o i le taimi na latou maua ai le papatisoga a le Agaga Paia?
3. O le ā le fautuaga a le tama'ita'i Perofeta o Elena Uaita e uiga i le faataūa o le mauaina o le papatisoga a le Agaga Paia?
4. Se'iloga 'ea o le tatalo ma faaeeina o lima e maua ai le papatisoga a le Agaga Paia? Faamalamalama lau tali.

FAAGAIIOIGA O TALOSAGA:

- Faafeso'ota'i lou soa-tatalo ma faasoa iai ni manatu taūa o lenei faitauga.
- Fai lua talosaga ma lou soa-tatalo ma tatalo mo:
 1. Le Atua ina ia faatumuina oulūa i le Agaga Paia
 2. Le Atua ina ia galue e ui atu ia te oulūa i le malosiaga o le Agaga Paia.
 3. I latou uma o ia oulūa lisi tatalo.

FAAAOGA LENEI FUAIUPU I LE LUA TATALO:

“O ana molimau foi i ia mea o i matou, atoa foi ma le Agaga Paia, le ua foaiina atu e le Atua i ē anaana ia te ia.” (Galuega 5: 32)

40-ASO O TALOSAGA MA ANAPOGI

ASO 3 – O FAAMANUIAGA PE A TALIA LE AGAGA PAIA

O le ā le mea e tupu pe a tatou ōle i le Atua mo le papatisoga a le Agaga Paia? O nisi nei o ni mea e faaalua ai le faatumuina o le tagata i le Agaga: 1. O le a faamalositia le faaunauga e su'esu'e le Afioga a le Atua; 2. E faamalositia le olaga fia tatalo pea; 3. E loloto le mana'o i le faamagaloga o agasala; ma le 4. O le suiga o le olaga ma mea e fai.

O le faatumulia o se tasi i le Agaga e manaomia e le tagata talitonu mo le lā savaliga ma le manumalo ma Keriso. E pei ona fai mai le Tusi Paia, e lē iloa e se tasi Keriso i lona matagofie e aunoa ma le faatumulia muamua o lea tagata i le Agaga Paia. E manino lenei manatu i le faata'oto o taupou e to'a sefulu (Mataio 25: 1-13), lea na ta'ua ai e Iesu taupou valea e to'a 5 na le iai ni a latou suau'u, o le Agaga Paia lea, na ia faapea mai ai, “ou te le iloa outou”, fuaiupu e 12.

Oinei ma nisi lava tusi o le tusi Paia, o ta'ua ai e Keriso lona lē iloa o se tagata. E pei ona fai mai Iesu i le Mataio 7: 21-23: “E lē sao atu i le malo o le lagi i latou uma o ē fai mai ia te a'u, Le Alii e, le Alii e; na o lē na te faia le finaglo o lo'u Tamā o i le lagi. E toatele latou te fai mai ia te a'u i lea aso, Le Alii e, le Alii e, matou te le'i perofeta ane ea i lou igoa, o lou igoa foi na matou tulia ai temoni, o lou igoa foi na matou fai ai vavega e tele? Ona ou ta'utino atu ai lea ia te i latou, Ou te lē iloa lava outou; inā o ese ia outou ia te a'u, o outou o ē fai amio leaga.”

O le iloa o aoaoga o le Tusi Paia, pe o le galue i galuega faamisionare a Iesu, e lē lava lea e faailoa atu ai le faatumulia o se tagata i le Agaga Paia. O le papatisoga i le vai e faatusa lea i se sauniga o le faaipoipoga, ae o le papatisoga a le Agaga Paia ua pei o le faatinoga i le aiga fou, le taimi e iloa tonu ai e le tama'ita'i faaipoipo le alii ua lā faaipoipo. E matua'i tete'e malosi Satani i lea tulaga auā na te iloa lelei lava o le faatumulia o se tasi e le Agaga Paia o le te'ena foi lea e lea tagata o le malosi a le tiapolo i lona olaga.

O le malamalama ma le faatinoga o le faatumulia o le tagata Kerisiano i le Agaga Paia o le laasaga taūa lea e lona lua i le malamalama ma talia Keriso o lo tatou Faaola. Ma o lea e matua'i faataūa ai lava o le faatumuina o lea tulaga i aso fai soo. E le o se mea e fai tasi ona faagalo lea. E pei ona fai mai le aposetolo of Paulo: “O le mea lea matou te lē faavaivai ai; auā e ui lava ina tauau ina uma lo matou tagata i fafo, ua faafouina lē i totonu i lea aso ma lea aso.” (2 Koronito 4:16). Tatou te mana'omia le Agaga Paia i o tatou olaga i aso uma, e pei ona faatonuina mai ai Paulo i le Efeso 5: 18: “Aua foi ne'i onā outou i le uaina, o le mea e ulavale ai; a ia faatumuina outou i le Agaga.” O se mea faifai pea, le faatumulia o o tatou olaga e le Agaga Paia i taimi uma.

O Keriso o lo tatou faataitaiga i mea uma. Fai mai le tamaitai Perofeta, “na maua e Keriso le papatisoga a le Agaga Paia i aso fai soo. I le taeao segisegi na fāgua o ia e le Agaga Paia, o le pa'i atu o le Agaga Paia i ona laugutu ma lona tino atoa na iloa e tagata i lea aso i ana tala ma galuega agaaloa e faia i aso ma lea aso.” A faapea la na galulue faatasi ma vavā lalata Iesu ma le Agaga Paia a o iai o ia i lenei lalolagi, e faapea foi i tagata Kerisiano uma ua i le Alii

40-ASO O TALOSAGA MA ANAPOGI

ona tatalo mo le faatasi mai pea lava pea o le Agaga Paia i aso uma i o tatou olaga. O le faatumulia pea o i tatou i le Agaga Paia o se mea e galueaina pea lava pea: (2Koronito 3: 18) “A o i tatou uma, o loo vaavaai i tatou i le pupula o le Alii ma o tatou mata, e le ufitia, ua liua ai i tatou ua foliga i ai nai le pupula e oo i le pupula, faapei ona maua ai mai le Alii, o ia o le Agaga.” E pei fo’i ona talanoa mai le tamaitai perofeta o Elena Uaita: “Pe a pulea e le Agaga o le Atua le loto o le tagata, e matua’i suia atoa lava le olaga o lea tagata. O mafaufauga agasala ua tuuese; o le olaga faatuāupua ua lē o toe manatu i ai, ae na o le alofa, agaga o le loto mauualalo, ma le filemu ua suia ai le loto ita, mana’o fua i mea a isi, ma le femisaa’i. Ua suia loto faanoanoa i le fiafia, ma faapupulaina le olaga i le pupula ma le malamalama faalelagi.”

Pagā lea o le matagofie o faamanuiaga ua folafolaina mai e lo tatou Atua i le papatiso mai lea o o tatou tagata ile papatisoga a le Agaga Paia!!!!!!

FAAMALOSIGA MA TALATALANOAGA:

1. Lisi mai faamanuiaga e 4 pe a tatou maua le papatisoga a le Agaga Paia.
2. E faafia ona talosaga atu le tagata Kerisiano mo le faatumulia o lona olaga e le Agaga Paia?
3. O le a se talanoa mai a Elena Uaita i le mea e tupu i o tatou olaga pe a tatou maua le papatisoga a le Agaga Paia?

FAAGAIOIGA O TALOSAGA:

- Fesoota’i atu i lou soa-tatalo ma lua faasoa le faitauga o lenei aso.
- Tatalo faatasi oulua ma lou soa-tatalo:
 1. Mo le Atua ina ia faaaauu pea le faatumulia o oulua i le Agaga Paia
 2. Mo Keriso ina ia faaali mai i lou olaga lona ola manumalo.
 3. Mo i latou uma o loo ia oulua lisi tatalo.

FUAIUPU IA FAAAOGA I LUA TALOSAGA:

Salamo 33: 18-22: “Le Alii e, ia i luga ia te i matou lou alofa, e pei ona matou faamoemoe ia te oe.”

40-ASO O TALOSAGA MA ANAPOGI

ASO 4: O KERISO MA OE

Afai ua maua e le au talitonu le papatisoga a le Agaga Paia, o le latou mauaina fo'i lea o Keriso i o latou olaga. Na folafolaina mai lea ina ua fetalai atu o Ia i lona au soo o le a ia auina mai le "Fesoasoani" mai lona Tamā e faatasi ma i latou. Ioane 14: 16, 17: "Ou te fai atu fo'i i le Tamā, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau; o ia o le Agaga o le upu moni, e le mafai e le lalolagi ona talia o ia, auā, ua le vaaia o ia, ua le iloa foi o ia; a o outou, ua outou iloa o ia, auā e tumau pea ia ia te outou, e iai foi o ia i totonu ia te outou." O lea Fesoasoani o le Agaga Paia lava lea. "Ou te lē tu'ua outou o matua oti, ou te sau lava ia te outou." E ala mai i le Agaga Paia e mafuta mai ai pea Keriso i ona tagata talitonu ma faatumulia ai pea lava i latou i aso fai soo. "O lē tausī fo'i i a'u poloaiga, o loo tumau lea i totonu ia te ia, o ia foi o i totonu ia te A'u, o a'u foi o i totonu ia te ia; o le mea foi lenei ua tatou iloa ai o loo tumau o ia i totonu ia i tatou, auā o le Agaga ua ia foaiina mai ia te i tatou." (1Ioane 3: 24) Le tusi lava lea, fuaiupu e 2: "Le au pele e, o le fanau i tatou a le Atua i nei ona po, a e le'i faaalua mai nei le uiga o i tatou a amulī; a ua tatou iloa, pe a faaali mai o Ia, ona foliga ai lea o i tatou ia te ia, auā tatou te iloa tino ai lava o ia."

E faapefea ona pei i tatou o Ia? E ala lea i le faatumulia o ō tatou tagata i le Agaga Paia, o le auala lea tatou te foliga ai e pei o Ia. Kalatia 2: 20: "Ua faasatauroina faatasi i ma'ua ma Keriso; ou te lē toe ola a'u, a o Keriso o loo ola i totonu ia te a'u; o le ola foi ou te ola ai nei i le tino, ou te ola ai lava i le faatuatua i le Alo o le Atua, o lē na alofa mai ia te a'u, ma foaiina mai o Ia e ia mo a'u." O le faatumulia pea o ō tatou tagata i le Agaga Paia, o le afio mai fo'i lea o Keriso e ola faatasi ma i tatou taitoatasi. O lea faatasiga e ala ai ona soifua faa-Keriso i tatou ma faaali atu ai na o foliga o Keriso i mea uma tatou fai, le olaga e faaali atu ai le alofa i le amiotonu ma le faapaiaina, faapea ma le inoino i le agasala. "Auā po o ai ua na iloa le finagalo o le Alii na te aoaoina atu o ia? A ua tatou maua le finagalo o Keriso." (1Koronito 2: 16)

O i latou uma ua fiafia i le suamalie o le mafutaga ma Keriso latou te sailia foi e usitai i le Tamā, e pei ona fai mai le aposetolo of Paulo i lana tusi i le ekalesia i Koronito: "Ina ne'i mitamita se tagata e toatasi i luma o le Atua. Ua afua mai ia te ia lo outou ola ia Keriso Iesu, o lē ua tuuina mai e le Atua e fai mo tatou poto, o lo tatou amiotonu ia; o lē ua faapaiaina mai; o lo tatou togioa foi ia; ina ia faapei ona tusia, O lē mitamita, ia mitamita o ia i le Alii." (IKor. 1: 29-31)

So'o se tasi ua faatumulia i le Agaga Paia latou te mauaina uma lava le mamalu o Keriso, ma pei ai i latou o Ia ma lona faatusa ma ona mamalu i aso uma. A'o avea le Agaga Paia e pulea le ola o le tagata talitonu ia Keriso, o le a avea foi lea tagata ma se tasi o le a fua mai ai fua lelei e pei ona molimauina i le Kalatia 5: 22, 23: "A o le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le faamaoni, o le agamalu ma le amio mama; e lē faatulafonoina mea faapena."

40-ASO O TALOSAGA MA ANAPOGI

E tupu lenei mea pe a molimauina le faataunuaina o le papatisoga a le Agaga Paia i le olaga ua fia mulimuli ma savavali ma le Agaga Paia. E avea ai le tagata talitonu o se molimau o Keriso i le lalolagi. E avea tatou ma fofoga, o vae ma lima, e faia galuega sa ia faia, o le tala'i atu, aoa'i, faamalolō ma tutuli temoni.

O le mau o Keriso i totonu o le tagata talitonu e ui i le papatisoga a le Agaga Paia e avea lea ma faamoemoega ina ia faaali mai ai lona mamalu e auala ma faatino atu e le tagata ua tumu i le Agaga Paia. “Na finagalo foi le Atua ona faailoa atu iai le uiga o le silisili o le lelei o lenei upu lilo o i nuu ese, o Keriso lea o loo ia te outou, o le faamoemoe i le manuia.” (Kolose 1: 27)

FAAMALOSIGA MA TALATALANOAGA:

1. A mauaina e le tagata talitonu le papatisoga a le Agaga Paia, o ai le isi latou te maua?
2. E faapefea le Kerisiano pe a mafuta Keriso i totonu o ia, e ui mai lea i le mafutaga a le Agaga Paia?

FAAGAIOIGA O TALOSAGA:

- Valaau ma faafesootai lou soa-tatalo e faasoa ma talatalanoa iai le faitauga o lenei aso
- Tatalo faatasi ma lou soa-tatalo, ma tatalo:
 1. Mo le Atua i na ia faaaaua pea ona papatiso oulua e lona Agaga Paia
 2. Mo Keriso ina ia soifua pea ia te oulua, ma lua faaali atu ai lona mamalu ma ana galuega lelei i lua olaga
 3. Mo i latou uma o loo ia oulua lisi tatalo
 4. Mo le Atua ina ia taitai pea oulua e ala mai i lona Agaga Paia.

TUSI FAITAU E FAAAOGA I LUA TALOSAGA:

2 Koronito 6: 16 – “Pe faapefea foi ona feagai le malumalu o le Atua ma tupua? Auā o i tatou o le malumalu o le Atua soifua, pei ona fetalai mai o le Atua, Ou te nofo i totonu ia te i latou, ou te savali foi i totonu ia te i latou; e fai a’u mo latou Atua, efai foi i latou mo’u tagata.”

40-ASO O TALOSAGA MA ANAPOGI

ASO 5: O LE AGAGA PAIA MA LE USIUSITA'I

O le tasi o galuega a le Agaga Paia o le fesoasoani malosi lea ina ia faaalua Keriso i o tatou olaga. O le manaoga a le Atua o le faaali atu lea o Keriso i o tatou olaga, ma avea o tatou olaga o ata manino o le ola manumalo o lo tatou Faaola. O le tasi foi lea o le faanaunauga maua lava a Le Atua ina ua auina mai le Agaga Paia, lo tatou Fesoasoani, ina ia tatou maua le malosiaga e molimau atu ai.

O le Kerisiano faamaoni e mafai ona aafia i ituaiga usiusitai e lua; Muamua, o le usitai lea i mea i fafo, mā e vaaia. E aofia ai i le vaega lea le vaaia o le tagata ua tausi tulafono, fai taulaga faalialia, fai tofiga mo le vaaiga a tagata, auā o loo fia maua faamanuiaga o le faaolataga ma viiga i lea auala. E finagalo le Atua ina ia tatou talitonu ma usitai ia te Ia mai le loto. O lona 2 o ituaiga usitai o le usitai lea mai i totonu o o tatou tagata, ma e tupu lea ona o le loloto o lo tatou faanaunauga ia usitai i le Atua. O le usiusitai e na'o mea e vaavaai atu i ai, usiusitai i mea e iloa atu i fafo ae lē o iai le loto atoa e lē taliaina lea e le Atua (Salamo 51: 16, 17): “Auā ua e lē finagalo i se taulaga, a na e finagalo i ai ua ou avatu lava; ua e lē fiafia i se taulaga mū. O taulaga i le Atua, o le loto momomo lea; le Atua e, e te lē inosia le loto momomo ma le nutimomoia.” “Ua faalatalata mai ia te au lenei nuu i o latou laugutu, a o latou loto ua taumamao ia te a'u.” (Mataio 15: 8)

O se faataitaiga o le tulaga o le eseese o ituaiga usitai tatou te molimauina i o tatou olaga e pei o lenei; faapea la ua maliu lo'u tamā ma ua ou lē mautinoa pe a faapefea ona ou faailoa lo'u tulaga faanoanoa i lea mea. Ona ou alu lea ma faasoa i se uō mo sana fo'i fesoasoani. Ua ma talatalanoa ma faasoa, ma fai mai loa la'u uo: “Ia vaai oe, ua maliu lou tamā, ma o oe foi o lona atalii. Ou te manatu o se mea tatau tele lou amana'ia o lona maliu.” Ona o lea fautuaga, ua amata loa ona ou lagona le faanoanoa. O le tulaga la lenei ua ou faanoanoa ai, e foliga mai e le o se faanoanoa moni e sau mai i le loto ae o se faanoanoaga e foliga mai e amata ma mafua mai i fafo o le loto. E mafua lea faanoanoaga ona e foliga mai o se mea e tatau lava ona faataunuū, ona o a'u o le atalii o le toaina, e tatau ai lava ona ou faanoanoa. O se faanoanoaga moni lava e tupu a'e mai le ta'ele o le loto ona ua maliu si o'u tama. E tusa pau lava lea tulaga ma le auala o le usiusitai i le Atua. A faapea o loo mautū ma sa'o le mafutaga ma le Atua e ala lea i le faatumulia pea o le tagata i le mafuta mai o le Agaga Paia i taimi uma lava, e mautinoa lā o le usiusitai ma filifiliga e fai e mafua mai i le ta'ele o le loto ma e lē o se taumatematega. O faaosoosoga e 'aia le usitai ai pe a oo mai; ae ui i lea, e lē manumalo ia faaosoosoga ona o le mautū o le faanaunauga e usitai pea i le Agaga o le Atua ua faamausaliina i totonu o le loto o le tagata talitonu.

E auala mai i le faatumulia o o tatou loto ma olaga i le mafutaga ma le Agaga Paia, ma o le auala foi lea ua tusia ai lana tulafono i o tatou loto, ma tatou te usitai fo'i mai le ta'ele o o tatou loto. E lē tupu atoatoa lea tulaga ona o le talia o Keriso e ala i le papatisoga i le vai. E la le aposetolo o Paulo, “... ia lē aunoa le faatumulia o o tatou loto i le Agaga Paia ina ia le aunoa ona

40-ASO O TALOSAGA MA ANAPOGI

tumau pea le tulafono a le Atua i o tatou loto. “Aua foi nei onā outou i le uaina, o le mea e ulavale ai; a ia faatumuina outou i le Agaga.” (Efeso 5: 18)

Na faasautualua mai foi e le tamaitai perofeta o Elena Uaita lea manatu e faapea: “O le usitai moni lava e tupu a’e mai le taele o le loto, le loto o loo mafuta ai Keriso. A tatou maua lea tulaga e pei ona faanaunau i ai, e faaalua mai ai o Ia i o tatou manatu, o tala tatou te tautatala ai, faapea mea uma tatou te faia. O le malosiaga a le tagata e fai ai ana faaiuga uma e mautu le faapogai i mea lelei ma le paia. A tatou iloa le Atua e pei ona tatou maua le avanoa, o tatou olaga o ni ola e faapaiaina ma e usiusitai e le aunoa. O le faaalua lea o foliga o Keriso i o tatou olaga ona o le mafutaga tumau a le Agaga Paia i totonu o ʻō tatou loto.”

Tatalo: Ieova e, ave ese mai ia te a’u le loto agasala ma le agaga faamaualuga; i lou alofa, ia ou lata atu ia te oe; ia faatumuina a’u i lou Agaga ina ia ou ola ai i le fiafia moni i lau Faaolataga, ma ia foai mai ia te a’u Lou malosi.

FAAMALOSIGA MA TALATANOAGA:

1. Mai le lesona o lenei aso, o a ni mea taūa e manaomia ai le maua e tatou o le Agaga Paia?
2. O ā ituaiga o usiusitai e mafai ona maua e le Kerisiano?
3. O le ā le ituaiga usiusitai e moomia e le Atua?
4. O le ā se faamatalaga a le tamaitai perofeta o Elena Uaita i le taūa o le usitai mai le taele o le loto?

FAAGAIOIGA O TALOSAGA:

- Taumafai e faafesootai latou uma o loo iai i lau lisi tatalo ma ta’u atu iai o loo e tatalo pea mo i latou ma fesili iai pe o ā ni mea patino lava latou te mana’o e te tatalo ai mo i latou.
- Fesoota’i lou soa-tatalo ma talatanoa i ai e uiga i le lesona o lenei aso
- Tatalo faatasi ma lou soa-tatalo:
 1. Mo le Atua ina ia faatumuina pea oulūa ta’itoatasi i lona Agaga Paia.
 2. Mo le Atua ina ia tusia lana tulafono i lou loto.
 3. Mo i latou uma o loo ia oulūa lisi tatalo.
 4. Mo le Atua ina ia Ia faatumuina pea oulūa i Lona Agaga Paia.

FUAIUPU E FAAAOGĀ I LUA TALOSAGA: “Le Atua e, ia e faia se loto mamā mo a’u; ma ia e faafouina se loto mau i totonu ia te a’u. Aua e te lafoaiina a’u i ou luma; aua fo’i e te aveeseina lou Agaga Paia ia te a’u. Ia e faafoisia mai ia te a’u le olioli o le olataga mai ia te Oe; ia e taofimauiina foi o a’u ma le loto fiafia.” (Salamo 51: 10-12)

40-ASO O TALOSAGA MA ANAPOGI

ASO 6: FAANOANOAGA O LE AGAGA PAIA

E iai mea tatou te faia e faanoanoa ai le Agaga Paia. Afai tatou te lē sailia o ia i aso fai soo, ma tatou lē galulue e mulimuli i le auala na te taitaiina ai tatou, e avea lea ma mea e vaivai ai fo'i le tatou olaga faaKerisiano. E lē faamalosia i tatou e le Atua. O lo tatou taliaina pea i o tatou loto ma o tatou olaga o le papatisoga a le Agaga Paia, o le tele foi lea o le malosiaga e taitaiina ai tatou e le Atua i o tatou ala. Tatou te lagona pea le faamalosi mai o Ia i ō tatou manatu ma filifiliga e fai i lea aso ma lea aso. E le aunoa ona Ia u'unai pea tatou i le faanaunauga e usita'i ai i le Atua ma lana ta'ita'iga. E valaauina i tatou ia tatou suesueina le Afioga a le Atua ma tatalo pea. O le Agaga Paia na te faamalosia i tatou ina ia faaali atu lo tatou mana'o i le amiotonu ae inoino i le agasala. Ae pagā lea, o loo ia i tatou foi le saolotoga e filifili ai e teena lea unaiga mai a le Agaga Paia. A tatou filifili lā e teena lea musumusuga a le Agaga Paia, ona tatou amataina loa lea o le laasaga o le faanoanoaga a le Agaga Paia. Na tuuina mai e le aposetolo o Paulo fautuaga e ono maua mai ai se fesoasoani mo i tatou ia aua ai ne'i o tatou oo i lea tulaga faigatā. O ia fautuaga ua tuuina mai ina ia tatou maua pea le malosiaga e faatumau ai pea le galuega lelei a le Agaga Paia i o tatou olaga.

Faitau le Efeso 4: 24- 31

Faitau le 1Tesalonía 5: 14- 19

Na silafia lelei lava e Paulo o le faatasi mai o le Agaga Paia i le au faatuatua o le a u'unaia ai latou e fai mea o lo'o ta'ua i fuaiupu nei. Afai la tatou te lē usitaia lenei faamalosiga, e le taumate o i tatou o nisi o le a mafua ai se faanoanoaga tele lava o le Agaga Paia. Afai la ua e iloa o oe o se tasi ua mafua ai lea faanoanoaga tele, 'aua le avea lea mea e te faavaivai ai, ae faatoga atu loa i le Atua mo lana faamagaloga, auā e alofa mutimutivale lava o ia. Tatalo atu ma le faatuatuga e tali mai o Ia ma e faatumulia oe i se faafouga a le Agaga, auā e faamaoni lava o ia i ana folafolaga.

Na silafia fo'i e Tavita lea alofa mutimutivale o le Atua. Na ia faia ni agasala matuiā lava, e pei o le mulilua faapea foi ma le fasioti tagata. Na ia fulitua atu i le musumusuga mautinoa a le Agaga Paia i lona olaga i le taimi sa ia faia ai nei agasala matuiā. Ae ina ua faailoa ia te ia le loloto o nei agasala ua ia faia, na liliu atu i le Atua e ui i talosaga. “Ia ‘alo ou fofoga i a'u agasala, ma ia e solōi ese a'u amio leaga uma. Le Atua e, ia e faia se loto mamā mo a'u; ma ia e faafouina se loto mau i totonu ia te a'u. Aua e te lafoaiina a'u i ou luma; aua fo'i e te aveeseina lou Agaga Paia ia te a'u. Ia e faafoisia mai ia te a'u le olioli o le olataga mai ia te Oe; ia e taofimauiina foi o a'u ma le loto fiefia.” (Salamo 51: 9-12) A tatou iloa ua tatou solomuli ma tau mamao mai le Atua, aua le faama'imauiina se taimi, ae tatou liliu atu i le Atua ma faaali a tatou agasala, talia le faamagaloga e ui mai i le maliu a lona Alo, ma faafou ai le mafuta mai o le Agaga Paia i ō tatou olaga, e pei lava ona faia e le tupu o Tavita. Ona toe faamalosia ai lea o i tatou i o tatou loto ma manumalo ai iā Satani. Efeso 3: 16 -19: “...ina ia foaiina ia te outou e tusa ma le faula'i o lona mamalu, ia faamalosia outou i le mana e lona lava Agaga i le tagata i

40-ASO O TALOSAGA MA ANAPOGI

totonu. Ia nofo mau foi o Keriso i o outou loto i le faatuatua; ina ia maua'a ma faavaeina outou i le alofa; ia mafai ai ona iloa lelei e outou atoa ma le au paia uma, o le uiga o le lautele, ma le umi, ma le loloto, ma le maua luga, ia iloa foi le alofa o Keriso ua silisili ese e lē mailoa, ia faatutumuina outou i le tumu uma lava o le Atua.”

Tatou te auauna atu i se Atua e manumalo ma e alofa fo'i. Afai tatou te faagalo ia te ia ma fai lava o tatou loto ma sesē ese ai, ia tatou manatua o loo faatali mai o ia e toe talia tatou mo se faafouga e maoa'e.

Salamo 103: 8 – 13: “E alofa mutimuti vale ma alofa fua mai le Alii; e tele gese lona to'asā, a e tele lona alofa. E le aoai mai pea lava ia; e le faamoemoe foi lona toasa e faavavau. E le'i faia e ia ia i tatou e tusa ma a tatou agasala; e le I tauai mai foi o ia ia i tatou e tusa ma a tatou amio leaga. Auā e pei ona maua luga o le lagi i le lalolagi, e faapea ona tele o lona alofa i ē matata'u ia te ia. E pei ona vavā mamao o sasa'e ma sisifo, e faapea lava ona faamamao e ia ia i tatou o a tatou solitulafono. E faapei ona alofa mutimuti vale o le tamā i lana fanau, e faapea lava ona alofa mutimuti vale le Alii i ē matata'u ia te Ia.”

FAAMALOSIGA MA TALATALANOAGA:

1. Tusi i lalo ni amioga ma masaniga e mana'o le Agaga Paia e maua i le olaga o le Kerisiano faatuatua.
2. E faapefea ona fai e le tagata le mea e faanoanoa ai le Agaga Paia?
3. Afai o i tatou ua mafua ai faanoanoaga a le Agaga Paia, o le a la se mea tatou te faia e sui ai lea tulaga?
4. O lea ā se vaaiga a le Atua ia i tatou o lana fanau?

FAAGAIOIGA O TALOSAGA:

- Valaau ma faafesoota'i lou soa-tatalo ma faasoa manatu taūa o lenei faitauga.
- Tatalo faatasi ma lou soa-tatalo:
 1. Mo le Atua ina ia faaauau pea i lua olaga le papatisoga a le Agaga Paia
 2. Mo le Atua e faamagalo oe pe afai o oe o se tasi na mafua ai le faanoanoaga o le Agaga Paia
 3. Mo le Atua ia foai atu ia te oe le faanaunauga ina ia faatagaina i lou loto ma talia le u'unaiga a le Agaga Paia e faia mea tonu i taimi uma lava
 4. Mo i latou uma o loo ia oulua lisi tatalo
 5. Ina ia tatou saili pea le Agaga Paia

TUSI FAITAU IA FAAAOGA I LUA TALOSAGA:

(2 Nofoaiga Tupu 16: 9) “Aua o fofoga o le Alii e fetaufetuliai i le lalolagi uma, na te fesoasoani ia te i latou o e ua sao o latou loto ia te ia. Ua e fai faavalea lenei mea; o lenei, e afua i ona po nei ona iai o taua ia te oe.”

40-ASO O TALOSAGA MA ANAPOGI

ASO 7: O LE UAGA MULIMULI

Ia matuā faataūaina le savaliga ma le Agaga Paia i aso uma ina ia tuputupu ai pea le olaga faaleagaga ma sauni ai pea e maua le uaga mulimuli o le Agaga Paia; e saunia ai foi tagata o le Atua e fesaga'i ma faafitauli o aso mulimuli, a'o faatalitali atu mo le toe afio mai o Keriso Iesu. Ae pagā lea, o le to'atele latou te lē o iloa ma le mautinoa lenei mea; ua manatu i latou e faatali seia oo mai le ūaga mulimuli ona faato'ā maua lea o le manumalo i agasala o loo faia pea. E le i'u lelei lenei talitonuga, e pei ona fautua mai le tamaitai perofeta o Elena Uaita: “Na ou vaai ua toatele ua le faataūaina le taapenapenaga ua manaomia nei, ma ua tulimatai i le taimi o le faafouga ma le ūaga mulimuli ina ia fetau ai ma o latou manatu e tutū atu ai i le aso o le Alii ma ola ai i lana silafaga. Oi auē, le toatele o i latou o le a tutū i lea taimi ua aunoa ma se lafitaga! O i latou nei na lē faataūaina le taapenapenaga mo lea taimi, ma ua latou lē maua le faafouga e manaomia e i latou uma e sauni atu e fesilafa'i ma le mamalu o le Atua.” (Early Writings, pg. 71)

Ia tatou maua le manumalo i faaososoga ma agasala uma lava o ō tatou olaga pe a tatou fia maua le manuia mai le ūaga mulimuli o le Agaga Paia. O se tau faasesē tele lava a le tiapolo pe a tatou talitonu tatou te le tau faamamaina agasala i o tatou olaga i le taimi nei ma le asō. “O lenei, ia salamō ma ia liliu, ina ia soloiesea a outou agasala, ina ia oo mai ai le tausaga e filemu ai mai luma o le Alii.” (Galuega 3: 19)

“Ua tatou iloa lenei mea, na faasatauroina faatasi ma ia lo tatou tagata tuai, ina ia faaumatia ai le tino o le agasala, ina ia lē toe faapologaina i tatou i le agasala. Ia faapea foi la outou taofi, ua outou oti i la le agasala, a ua outou ola lava i la le Atua i lo tatou Alii o Keriso Iesu. O lenei 'aia nei malō le agasala i ō outou tino auga vale, i lo outou gauai i ai i ona tu'inaanau. Aua foi nei tuuina atu o outou tino i le agasala e fai ma a'upega a le amioleaga; a ia outou tuuina atu outou i le Atua, e pei o ē ua ola nai e ua oti, ma ia tuuina atu outou tino i le Atua e fai ma aupega a le amiotonu. Auā e lē pule le agasala ia te outou; auā ua outou le nonofo i le tulafono, ae o le alofa tunoa.” (Roma 6: 6, 11-14)

Fai mai fo'i le tamaitai perofeta o Elena Uaita: “Na ou iloa foi ua toatele ua lē maua le faafouga mai le ūaga mulimuli ia manumalo ai ona o loo taofi mau pea i uiga o le agasala, o loto faamaualuluga, manatu faapito, manao i mea a le lalolagi ma ona tu'inanauga, faapea ma faatinoga uma lava o upu ma uiga sesē.” (ibid)

E matuā foliga lava o se tulaga faigata ia mea i le taimi nei. Ae o le ki o le manumalo i faaososoga o le iloa lea pe faapefea ona faatagaina Iesu ia soifua i le manumalo e faaali atu i o tatou olaga. O le a talanoaina pea lenei mataupu mai le Tusi Paia i isi vaega e mulimuli mai o nei mataupu faasolo.

O le toe sasaa mai o le Agaga Paia i aso mulimuli na a'oa'oina mai e le Aposetolo o Peteru i le faaaogaina o aoaoga a le perofeta o Ioelu. O le mea na tupu i le aso Penetekoso, e pei ona talanoa mai ai Peteru, o le faataunuuina lea o le valoaga a le perofeta o Ioelu. Ta'ua e Peteru i le Galuega 2: 16-18: “Ao le mea lenei ua fai mai ai le perofeta o Ioelu, o ona aso e gata ai, o

40-ASO O TALOSAGA MA ANAPOGI

loo faapea mai le Atua, e i'u ina ou liligi ifo ai lo'u agaga i luga o tagata uma lava; ona perofeta mai lea o o outou atalii ma o outou afafine, e iloa faaaliga e o outou taulelea, e fai miti foi o outou toeaia. O ia aso foi ou te liligi ifo ai lo'u Agaga i luga o a'u auauna tane ma a'u auauna fafine, latou te perofeta mai ai."

Na faamatala mai foi e Elena Uaita faamanuiaga o le Ūaga Mulimuli e oo mai a'o le'i oo mai aso e gata ai ina ia taapena fanau a le Atua mo le toe afio mai o Keriso. "O le uaga mulimuli, le seleselega saito ua pa'e mai, o le faatinoga lea o le ata o le alofa tunoa faaleagaga e saunia ai le ekalesia mo le toe foi mai o le Alo o le Tagata. Ae vagana ai ua iai le uluai ūaga, o le a leai se ola; o le a le tupu se vao. Vagana ai ua faia le galuega a le uluai ūaga, e le mafai ona aoga se galuega a le ūaga mulimuli." O le tuputupu o le agaga atiae o le tagata i le alofa tunoa o Keriso, faatasi ai ma le galuega a le Agaga Paia, o le a mafai ai ona tatou iloa le uaga mulimuli pe a oo mai ia aso. Vagana ai o loo agai pea i luma o tatou olaga i aso fai soo, i le faapupulaina atu lea o le olaga manumalo o le Kerisiano, o le a tatou lē mafai foi ona iloa le matagofie o le Agaga Paia i lona pa'i mai i le ūaga mulimuli."

Afai e le'i faatumulia oe i le oo mai o le Agaga Paia, 'aua le toe faatali i se isi aso pe o taeao. Ia e faataūa le taliaina o ia i o tatou olaga i le taimi nei lava auā o le taliaina o le mea alofa e pei ona folafola mai, tatou te maua ai foi ma le tele o faamanuiaga ua Ia folafola mai. O le faatumulia o o tatou tagata e le Agaga Paia e maua ai se mafutaga vavā lalata ma le Agaga Paia, ma faaosofia ai se fiafiaga fou, malosiaga fou, ma avea ai tatou o molimau o le manumalo o Keriso e le i vaaia muamua lava i o tatou olaga. "Ua faasatauroina i ma'ua ma Keriso; ou te lē toe ola a'u, a o Keriso o loo ola i totonu ia te a'u, ma foaiina mai o Ia e Ia mo a'u." (Kalatia 2: 20)

FAAMALOSIGA MA TALATALANOAGA:

1. O a ni faatusa o loo faamatala mai ai le uaga mulimuli o le Agaga i le Tusi Paia?
2. O le a le mea ua matuai faataūaina ai le maua e le Kerisiano o le papatisoga a le Agaga Paia ina ia maua ai e ia faamanuiaga o le uaga mulimuli? O le a foi le mea ia faataūaina ai le maua e le Kerisiano o le uluai ūaga ae e le i oo mai le uaga mulimuli?
3. O a ni suiga i le olaga o le Kerisiano pe a ua maua le papatisoga a le Agaga Paia ina ia sauni atu ai mo le ūaga mulimuli?

40-ASO O TALOSAGA MA ANAPOGI

4. O le a le mea e taūa ai le aua le faatali mo le uaga mulimuli ona faato'ā aveese lea o agasala mai o tatou olaga?

FAAGAIOIGA O TALOSAGA:

- Faafesootai atu i lou soa-tatalo ma faatalatalanoa le faitauga o lenei aso;
- Tatalo ma lou soa:
 1. Mo le Atua ina ia faaauau lana faamalosiga ia te oulua
 2. Mo le Atua ina ia saunia oulua e maua le uaga mulimuli o le Agaga Paia
 3. Mo i latou uma o i luga o a oulua lisi tatalo.

TUSI FAITAU E FAAAOGA I TALOSAGA:

Salamo 34: 7: “E tolauapi le agelu a le Alii e siosiomia ai e o matatau ia te ia, e lavea'i foi o ia ia te i latou.”



40-ASO O TALOSAGA MA ANAPOGI

ASO 8: O LE AGAGA PAIA MA LE TOE AFIO MAI O IESU

O le tala lelei o le asō, ua lata le toe afio mai o Iesu. Ou te le fai atu lenei tala ona o le tele o tala e uiga i le au faatupu faalavelave, o le mau tala i taua i lea vaega ma lea vaega o le lalolagi, o faama'i e tele ua pepesi mai, pe o le mau faalavelave faanatura o loo molimauina i lenei vaitaimi. O nei mea uma o loo tutupu e ta'u mai ai ua lata tele mai le toe afio mai o Iesu. Ae o se tasi o mea ua faamalosia atili ai lenei talitonuga o le toe afio mai o Keriso, o le u'unaiga malosi a lona Agaga ina ia tatou malamalama o le faataūa o le faatumuina o ō tatou tagata i aso uma lava i le Agaga Paia.

I le taufaaiuga o le tusi o Faaaliga mataupu e ono o loo faamatala mai ai le toe afio mai o Iesu, ma tuuina mai ai se fesili: “O ai foi se na te mafaia ona tū atu?”

O le tali: “Ua mavae atu ia mea, ona a'u iloa ai lea o agelu e toafā o tutū mai i itū e fa o le lalolagi, o taofi i matagi e fa o le lalolagi, ina ia le agi atu le matagi i le fanua, po o le sami, po o se laau e tasi. Ua a'u iloa foi le tasi agelu ua ui a'e i le mea e alu a'e ai le lā, ua ia te ia le faamaufa'ailoga a le Atua soifua; ua alaga ia ma le leo tele i agelu e toafa na tuuina atu ia i latou ia faaleaga i le fanua ma le sami; ua faapea atu, “Aua tou te faaleaga i le fanua, pe o le sami, po o laaau, se'i matou faamaufaailogaina auauna a lo tatou Atua i o latou muaulu.” (Faaaliga 7: 1-3)

Ua na o i latou lava ua iai le faamaufaailoga a le Atua e tutū atu i le toe afio mai o Keriso. O loo taofiofi mamau lava e le Atua itu matagi uma o le lalolagi seia oo ina ua mae'a le faamaufaailogaina o le fanau a le Atua. Ma o se fesili taūa lā: Ae faapefea ona faamaufaailoga i latou o loo faatalitali? Ua fai mai le Tusi Paia, ua faamaufaailoga i tatou e le Agaga Paia. “Aua foi tou te faatigā i le Agaga Paia o le Atua, ua faamaufaailogaina ai outou ia te ia, seia oo i le aso e faaolaina ai.” (Efeso 4: 30) O le mataupu lena o le papatisoga a le Agaga Paia. O le faafouina pea i aso uma lava o loo tatou tuuina atoatoa o ō tatou ola i le Alii, ina ia tatou savavali pea ma le Agaga Paia, e faamaufaailogaina ai i tatou, ma saunia atu ai mo lona toe afio mai.

E le o faatali le Atua mo nisi faalavelave e faatupu e i latou o loo faatupuina nei faalavelave, pe o nisi faama'i pepesi mai, po o nisi faalavelave faanatura e oo mai. E leai. Ua ta'uina mai e le perofeta o Elena Uaita le mea o loo faatali ai Keriso: “O loo faatali o ia ma le faanaunauga loloto lava ia faaali atu o Ia e lana Ekalesia. Pe a faaali atu le amio ma uiga o Keriso i lea ata manino i ona tagata, ona toe fo'i mai lea o ia e ave a'e lana fanau.” E na o le papatisoga a le Agaga Paia e mafai ai ona tupu lenei mea i o tatou olaga. Na o le taliaina foi o le papatisoga a le Agaga Paia e mafai ai e agelu ona tuuina mai matagi e faaumatia ai le lalolagi. “E na o le papatisoga a le Agaga Paia e mafai ai ona maua lenei suiga moni i lana ekalesia ma sauni atu ai ona tagata mo faigata o le a oo mai.”

O loo iai se mea matautia o i le ekalesia. Ua tatou manatu lava o loo mautu i tatou e faatalitali atu mo le toe afio mai i totonu o le ekalesia auā tatou te tausia faamaoni le sapati moni, tatou te iloa le mea e tupu pe a oti le tagata, o le mau faailoga a le manu feai, ma le toe afio mai faalua o Keriso. O se manatu sese tele lea. E taūa nei aoaoga, ae e lē faasaoina i tatou ona o nei

40-ASO O TALOSAGA MA ANAPOGI

talitonuga. Ia manatua, o le au totoḡi sefuluai, tausī sapatī, ma o i latou na tausī i le tausīga o le soīfua maloloina na latou faasatauro Iesu. E leai, leai lava. E lē o le tele o mea moni tatou te iloa, ae taūa atu le tatou iloa o le tagata o lē na te mafaia ona faaola i tatou. Ia faamautinoa e loloto lo tatou iloa o le Faaola ma ia mafuta mai o ia i ō tatou ola i taimi uma, ona faato’ā tatou sauni lea mo lona toe afio mai.

O loo valaau mai le Atua i ona tagata ina ia o tatou mauaina le papatisoga a le Agaga Paia ma ia sauni atu ia pei o Iesu, ina ia taapena e talia le ūaga o aso e gata ai ao le’i toe afio mai o Ia. “Le au pele e, o le fanau i tatou a le Atua i nei ona po, a’o le’i faaalīa mai nei le uiga o i tatou a amulī; a ua tatou iloa, pe a faaali mai o Ia, ona foliga ai lea o i tatou ia te Ia, auā tatou te iloa tino ai lava o Ia.” (1Ioaṇe 3: 2)

Ae ui i lea, o loo iai le faafitauli i le ekalesia i aso nei. Ua ta’u mai o le tulaga o le ekalesia o Laotekaia o loo iai le tatou ekalesia, ma a tatou le faia se suiga, tatou te lē sauni atu mo le toe afio mai o Iesu. Ae o loo aumaia foi se fofō o le faafitauli o le ekalesia, ina ia pei ai i tatou o Ia, ma sauni atu ai mo Lona toe afio mai: ia tatou faataga Iesu e soīfua i totonu o i tatou. “Faauta ou te tu atu i le puipui ma ou tu’itu’i atu; ‘ai se tasi e faalogo mai lo’u leo, ma tatala mai le puipui, ou te ulufale atu ia te ia, ma te talisua foi ma ia, o ia foi ma A’u.” (Faaaliga 3: 20) E faapefea ona tatou faatagaina ia iai se mafutaga vavā lalata ma ia? “Ia iai se so’otaga ma le Atua. ia o’ofu i tatou i le malosiaga mai lūgā e ala mai lea i le papatisoga a le Agaga Paia, ina ia tatou ausia tapulaa maualuluga e maua pe a fesoasoani mai Keriso ia te i tatou.” (Review & Herald, April 5, 1892)

FAAMALOSIGA MA TALATALANOAGA:

1. Aiseā ua taofiofi ai e agelu matagi malolosi e faaumatia ai le lalolagi?
2. O le iloa o a’oa’oga moni o le Tusi Paia e lava lea e faaolaina ai i tatou? Aisea?
3. Mai faamatalaga o i le Tusi Paia, e faapefea ona faamaufaailogaina i tatou?
4. O le ā se aafiaga o la tatou mafutaga ma Keriso e mafua mai ona o le papatisoga a le Agaga Paia i o tatou tagata?
5. O le a le mea e saunia ai i tatou mo puapuagā e oo mai i le i’uga o le lalolagi?

FAAGAIIOIGA O TALOSAGA:

- Fesootai atu i lou soa-tatalo ma talatalanoa e uiga i le faitauga o lenei aso
- Tatalo faatasi ma lou soa-tatalo:


40-ASO O TALOSAGA MA ANAPOGI

1. Mo le Atua ina ia faau'uina pea i tatou e lona Agaga Paia
2. Mo le Atua ia saunia oe mo puapuaga ma faigata o le a tutupu mai i le i'uga o le lalolagi ae o lumana'i le toe afio mai o Keriso
3. Mo i latou ia oulua lisi tatalo.

TUSI FAITAU E FAAAOGAINA I LUA TALOSAGA:

“Ua latalata mai le Alii i e ua loto momomo; ua ia faaola foi i e ua loto nutimomoia.” Salamo 34:

18



40-ASO O TALOSAGA MA ANAPOGI

VAEGA LUA: O LE AGAGA PAIA MA LE TATALO

ASO 9: O LE FAANAUNAUGA I LE TATALO ONA O LE U'UNAIGA A LE AGAGA PAIA

A tatou taliaina le papatisoga a le Agaga Paia, ona tatou maua loa lea o se faanaunauga loloto ina ia tatou faifai pea lea mafutaga i le Atua e ala atu i le tatalo. “Ou te liligi ifo i luga o le aiga o Tavita, ma luga o ē nonofo i Ierusalema le Agaga o le alofa tunoa ma talosaga...” (Sakaria 12: 10) Tatou te filifili e talia lea faanaunauga loloto o le u'unaiga mai a le Agaga Paia, ona o le faatumulia pea o ō tatou loto i mea o le olaga nei. Pagā lea, e le taumate tatou te manaomia le molimauina i ō tatou olaga le taūa o mea e mafai ona faia e le Atua mo ō tatou olaga. O lea la e matuā faataūaina ai le talia o le faanaunauga e tatalo ma le faatauana mo le papatisoga a le Agaga Paia. Afai tatou te mananao e manumalo Keriso i o tatou olaga mai le tiapolo ma ana mailei e foliga feilafi ma suamalie, ia tatou mafuta atu i le Atua e ui atu i talotaloga faifai pea.

Ua leva lava ona iloa e le au Kerisiano le taūa o le tatalo. O le tele fo'i o taimi tatou te tatalo ai. Ae o ia talosaga e mafua ona o ni faafitautuli ua feagai ma i tatou ma a te'a foi ia faafitautuli, ona maūi foi lea o le taūa o le tatalo. O le faigata o ia tulaga ona ua mātetele lava i tatou e faamoemoe i lo tatou lava malosia e maua ai mea tatou te manana'o ai, faapea ma manaoga a le ekalesia. Ua tatou masani e faamoemoe lava i lo tatou tomai ma agavaa e fai ai le galuega a le Atua. Ua tele ni faagaioiga ma fuafuaga ua mafai ona tatou faia ona o malosia ua i ō tatou tagata. Ua tatou faamoemoe i le malosia o lima o tagata e fai ai le galuega a le Atua. Ona o le alofa mutimutivale o le Atua, ua ia faamanuia mai ai pea i ia taumafaiga. Ae ui i lea, o faamanuiga e sautuafua ona tetele atu pe a na faia ia mea faatasi ma le Agaga Paia e ala i le mafutaga loloto e maua ma ui mai i talotaloga e le aunoa. E pau lava lea o le auala e avea ai o tatou fuafuaga o fuafuaga a le Atua, ma a tatou mea e fai, o mea ia a le Atua. O le ituaiga mafutaga vavā lalata lea na iai ia Keriso ma lona Tamā. O lea na ia fetalai mai ai: “O a'u nei ma le Tamā, e tasi lava i ma'ua.” (Ioane 10: 30)

O mea uma lava na faia e Iesu na faia ia ma le ta'ita'iga a lona Tamā. O ana upu na tautala ai, o ana mea uma na fai, na taitaiina lava e le malosia mai le Atua le Tamā. “E te lē talitonu ea, o a'u o i totonu o le Tamā, o le Tamā foi o i totonu ia te a'u? O upu ou te tautala atu ai ia te outou ou te lē tautala fua na o a'u; a'o le Tamā fo'i o i totonu ia te a'u.” (Ioane 14: 10)

Na faapefea ona maua e Iesu lea tulaga vavā lalata ma lona Tamā? Na ui lea i lona mafuta atu i aso uma i le Atua. O le mafutaga loloto o ō lā loto ma mafaufau na mafai ai ona ia faatino lana galuega na afio mai ai i le lalolagi; o le auala fo'i lea na mafai ai ona ia manumalo ia Satani. “Afai tou te ōle atu se mea i lo'u Tamā, ou te faia lava.”

O le 40 aso o talosaga ua e filifilia e te au ai nei ua fuafua 'ina ia e maua ai fo'i lenei mafutaga vavā lalata ma le Atua. A'o faagasolo pea lenei 40 o aso, ia e lagona le pa'i mai o le Agaga Paia ina ia e maua le malosia e te manumalo ai i le tiapolo ma ana taumafaiga ia e

40-ASO O TALOSAGA MA ANAPOGI

toilalo i ana taufaasesē; ae ia avea oe o se molimau ola mo Keriso; ia avea oe ma sē tasi e faaali atu ai lona mamalu ma le matagofie o ona foliga.

“Ia taitaiina i matou i ala o le loto mauualalo. Ia tuuina i ō matou loto se faanaunauga ia avea matou ma tagata tatalo, ma ia matou liliu ese mai i ō matou ala sesē. Fa’afofoga mai i lā matou talosaga, faamagalo i matou, ma ia matou manumalo i o matou uiga solomuli ma le fefo’ifo’i a’i.”

FAAMALOSIGA MA TALOTALOGA:

1. O ā mea e māfuli ai tagata Kerisiano e faamoemoe i ai nai lo le tatalo?
2. O le ā le ituaiga olaga tatalo na faia e Iesu? O le a se faamatalaga a Iesu i le lā va ma lona Tamā?
3. O le a se ituaiga olaga tatalo e mana’o Iesu tatou te mauaina? E faapefea ona aafia o tatou olaga tatalo pe a iai le Agaga Paia?

FAAGAIOIGA O TALOSAGA:

- Fesootai i lou soa-tatalo ma faasoa iai le faitauga o lenei aso.
- Ia lua tatalo faatasi ma lou soa-tatalo
 1. Mo le Atua ina ia faaaauau pea lana galuega i lua loto e ala mai i lona Agaga Paia
 2. Mo le Atua ina ia aumaia ia te oulua le faanaunauga atili e mafuta atu ai ia i le tatalo.
 3. Talosaga mo i latou ia oulua lisi tatalo.

TUSI E FAAAOGA I LUA TALOSAGA:

“Afai e faamaulalo lo’u nu’u e ua ta’ua i lo’u igoa, ma latou tatalo, ma sailiili ia te A’u, ma liliu ese i ō latou ala leaga, ona ou faalogo ai lea mai le lagi, ma faamagalo i ā latou agasala, ma faaolaina le latou nuu.” 2 Nofoaiga Tupu 7: 14

40-ASO O TALOSAGA MA ANAPOGI

ASO 10: O IESU MA LONA AU SOO; O LE FAATA'ITA'IGA O LE TATALO

Tatou te molimauina pea le olaga tatalo o Iesu a'o galue o Ia i lenei lalolagi. A mae'a ona a'oa'o atu ma faamalolō i ō latou ma'i ma faaletonu uma, ua ta'u mai ia i tatou: "A ua maliu o ia i le mea tuufua ma tatalo ai." (Luka 5: 16) Na molimau mai Luka, a'o le'i valaauina ona soo e 12, "O aso lava ia ua maliu ae ai o ia i le mauga e tatalo; ua āoina lana tatalo i le Atua. Ua āo foi, ona valaau atu lea o ia i ona so'o, ua filifilia e ia ni o latou e to'asefulu ma le to'alua, ua faaigoa foi i latou e ia o aposetolo." (Luka 6: 12, 13) I luga o le mauga o le Liuga, "O loo tatalo ia, a ua lua ona fofoga, ua pa'epa'e ma pupula tele mai ona ofu." Na valaauina o Ia e lona Tamā i le tatalo. Na tali atu o ia i le loloto o lona manaomia 'ia tatalo. Ua ia iloa ua na o le tatalo lava e manaomia i taimi faapenei ina ia tasi i la'ua ma lona Tamā, ina ia maua e ia le faamalosiga e faataunuu ai lana galuega na maliu mai e fai i le lalolagi.

Na maua e Keriso le manumalo ia Satani e ui atu lea i le mafuta atu i le Atua e ala i le tatalo. A tatou faitau i taimi uma lava e faafetaia'i ai o Ia i olaga o alii ma tamaitai, faapea foi ma natura e ui mai i le ulufia o manu i agaga leaga, faama'i, o le oti, o afā, ma nisi lava auala, tatou te le molimauina Iesu o faato'ā mafuta atu i lona Tamā i le tatalo mo se fesosoani i lea lava taimi o faigata. Ae ua uma ona faaauppegaina Ia, ma ua uma ona taliaina e Ia le malosiaga mai lona Tamā i taimi paginoa e tatalo ai o Ia. A faasagatau mai lā Satani ma ana galuega leaga, e tali atu lava Iesu ma fetalai atu o Ia ma le mana ua faatumulia ai o Ia, ona malepe ai lava lea o aupega uma a le tiapolo. Na tulia temoni i le fetalai atu a Iesu; faamalolo i ē mama'i, faatutū mai latou na oti, ma faamalū afā.

E malamalama lava ia faata'ita'iga ua tuu mai. Na faatumauina le ō gatasi o Iesu ma lona Tamā ma manumalo ai i faafitauli uma ona o lona mafuta atu i le Tamā, e ui lea i talosaga fai fai pea. Ona lā o mai faatasi ai lea mai nei mafutaga i talosaga ma le malosi'aga e faafesaga'i ai fa'afitauli uma e tula'i mai i lea aso ma lea aso. Na faatumulia lava Keriso i lea malosiaga ma le tasi ma lona Tamā i taimi uma lava o lana galuega i lenei lalolagi. O taimi uma na feiloa'i ai o ia ma mailei a le tiapolo, na manumalo lava o Ia ona o lona malosi na maua mai i lona ola tatalo.

E le'i leiloa lea ola tatalo o Iesu a o mafuta o Ia ma ona so'o. O le tatalo o se mea faa'ogatotonu lea i la latou galuega. Ina ua tuputupu le ekalesia ma ua foliga mai ua tau le maua se taimi e mafuta ai le au soo i talosaga, na faatonuina ai le 'au faigaluega tiakono i ā latou galuega: "Ua tumau pea i latou i le a'oa'oga a le au aposetolo, ma le mafuta faatasi ma le tofitofiga o le areto, ma talotaloga." (Galuega 2: 42) O nei 'au faatuatua na mafuta latou ma talotaloga i le malumalu, i ō latou fale, faapea fafo i le natura. "Ua o fo'i i matou i le aso Sapati i tua o le a'ai i le auvai o le vaitafe, o le mea ua masani ona fai ai o tatalo; ua nonofo foi i matou i lalo, ma tautala atu i fafine e na potopoto ai." (Galuega 16: 13)

O aposetolo uma lava o tagata tatalo. Fai mai fo'i Paulo sa ia tatalo i le po ma le ao mo le au faatuatua. "O loo matou matuā ōle atu ai i le pō atoa ma le āo, ina ia tatou feiloai ma outou, e faa'atoatoaina ai mea e le'i atoa i lo outou faatuatua." (1Tesalonía 3: 10). Ona o le 'au aposetolo

40-ASO O TALOSAGA MA ANAPOGI

o tagata malosi i le tatalo, o i latou foi o ni tagata ua iai le malosiaga mai le Atua. O uluai Kerisiano o ni alii ma tamaitai foi i latou na malolosi i talosaga faifai pea, ma na mafai e le Atua ona ui mai ai ni vavega ma mea matautia na latou faia. Ona sa foai atu iai e Keriso le Agaga Paia e pei ona ia folafolaina mai, na faataalise ona o'o atu fo'i le tala lelei i le lalolagi. "Pe afai lava tou te tutumau i le faatuatua, o faavaeina, ma mausali, ma le lē faate'aeseina outou i le faamoemoe o i le tala lelei na outou faalogologo i ai, sa tala'iina atu foi i tagata uma lava i le lalolagi, o a'u foi o Paulo ua fai a'u ma auauna i ai." (Kolose 1: 23) Ua valaauina e le Atua soo se Kerisiano ina ia avea o ia ma se fitafita toa o le olaga tatalo.

FAAMALOSIGA MA TALATALANOAGA:

1. Aisea na faateleina ai e Iesu lona taimi e tatalo ai?
2. O le a se mea na aafia ai tele le au soo i le faataitaiga a Iesu i lona soifuaga tatalo?
3. Na faapei i se olaga tatalo o le au uluai Kerisiano?
4. O le a se suiga o lou olaga tatalo e te mana'o ai?

FAAGAIOIGA O TALOSAGA:

- Fesootai ma lou soa-tatalo ma talatalanoa le faitauga o lenei aso
- Tatalo ma lou soa-tatalo
 1. Mo le Atua ina ia taitai pea oulua e lona Agaga Paia
 2. Mo le Atua ina ia taitai oe e avea o se fitafita tatalo e pei lava o Iesu ma lona au soo
 3. Mo i latou uma o ia oulua lisi tatalo

TUSI E FAAAOGA MO TALOSAGA:

“Ua ou teu i lo'u loto lau afioga, ina ne'i o'u agasala ia te Oe.” Salamo 119: 11

12/27/2011

40-ASO O TALOSAGA MA ANAPOGI

ASO 11: AISEĀ E MANAOMIA AI LE TATALO?

E ui lava ina e toatele le au Kerisiano e talitonu i le faataūaina o le tatalo, ae o le toatele lava e lē malamalama i le mafuaaga o le manaomia o le tatalo. E fesiligia foi faapea afai o le Atua e Silisili ese ma pule āoāo, ma e faia lava lona finagalo, aiseā la tatou te manaomia e tatalo ia faia e ia mea ua finagalo lava ia e fai, pe ua ia fuafuaina e fai? Ua manatu nisi o le tatalo e mo le manuia lava o i tatou, ae e faia lava le finagalo o le Atua, pe tatou te ōle atu pe leai. O nisi foi manatu o se avanoa faapitoa o le tatalo atu i le Atua, ae e le manaomia tele mo se tau faia o sona finagalo i le lalolagi. O le mea moni lava, e matua manaomia lava e tatalo le fanau a le Atua. Aiseā lā ua faatonu mai ai i tatou e Iesu ia tatalo ina ia faia le finagalo o le Atua? “O lenei ia faapea outou ona tatalo, Lo matou Tamā e oi le lagi, ia paia lou suafa. Ia oo mai lou malo. Ia faia Lou finagalo, i le lalolagi e pei ona faia i le lagi.”

A le tatalo le au faatuatua, o le ‘a le faataunuuina foi faanaunauga a le Atua i le lalolagi. O loo faamaumau i le tusi o Kenese le foafoaina o le lalolagi ma le tagata: “Ona fetalai ane lea o le Atua, ina tatou faia ia o le tagata i lo tatou faatusa, ia foliga ia i tatou; ia pule foi i latou i i’a i le sami, ma manu felelei, ma manu vaefā, ma le lau’ele’ele uma, atoa ma mea fetolofi uma e fetolofi i le eleele. Ona faia lea e le Atua o le tagata i lona faatusa, o le faatusa o le Atua ia faia ai o ia; na faia e ia o i la’ua o le tane ma le fafine.” (Kenese 1: 26, 27). O le faaliliuina o upu Eperu “...i lo tatou faatusa...” e faailoa mai ai na faia lava le tagata, e pei foi o i tatou, e le Atua i lona lava faatusa. Ma na ia faia fo’i se tasi o mea ina ua faia le tagata: “...ia pule fo’i i latou...” I le lalolagi uma. Ona o Atamu o le sui lea o le Atua, na tofi ai o ia o le pule o ia i le lalolagi. “Ua ave fo’i le tagata, e le Alii le Atua, ma ua tuu ia te ia i le faatoaga i Etena e galue ai ma leoleo ai.” (Kenese 2: 15)

O le matafaioi ma le galuega a Atamu ia ana tausī i le lalolagi; o lona uiga ia ia puipui mea uma lava ina ne’i faaleagaina. O Atamu o le sui vaaia lea o le Atua ma faataunuuina le pule a le Atua i le lalolagi. O ia o le leoleo ma ia puipui i le lalolagi uma lava. O lea na fai mai ai le fai Salamo o Tavita i le tulaga o le tagata i le lalolagi: “Auā ua e faamaulalo ane teisi o ia i agelu; ua e faapaleina foi o ia i le mamalu ma le matagofie.” (Salamo 8: 5) A tatou vaai ma malamalama iai i le faaliliuina o upu Eperu o le “mamalu ma le matagofie”, ua tatou maua ai na tuuina atu lava i le tagata mamalu ma le pule a le Tupu lava ia. Ma o lea sa tuuina atu ia Atamu le pule uma a le Tupu ma na faalagolago uma lava mea e tutupu i le lalolagi iā Atamu ma ana faaiuga e fai.

O le tatalo lā, o se mea e matuā manaomia lava, auā e amata mai i le amataga, na fuafua lava e le Atua na te galue e ui mai i tagata e lē saoloto mai ia te ia, i le faataunuuina o lona finagalo i le lalolagi. E galue le Atua e ui mai i talosaga a ona tagata. A finagalo le Atua e faia se mea i le lalolagi, o nisi taimi na te valaauina tagata e ui i a latou talosaga ia faataunuuina ai le faaolataga i olaga o nisi. E tele na’uā ni tala faamaumau i le feagaiga tuai ma le feagaiga fou e faamaonia lea manatu. Ia tatou ōle atu ina ia “faia lona finagalo i le lalolagi.” Ia tatou ōle atu “ia foai mai mea e ‘ai e tatau ai.”

40-ASO O TALOSAGA MA ANAPOGI

Ina ua taga'i atu Iesu i le manaoga o le motu o tagata na ia fetalai atu i lona au so'o ina ia faia le talosaga lenei i lona Tamā: "Ua silafia e ia le motu o tagata, ona mutimuti vale ai lea o lona alofa ia te i latou, ona ua lailoa i latou ma tuulafoaia, e pei o mamoe e leai so latou leoleo. Ona fetalai atu ai lea o ia i ona soo, "E tele le saito e seleseleina, a o le 'au faigaluega e toaititi ia. O lea ia outou aoi atu ai i le Alii e ana le saito e seleseleina, ina ia aauina mai e ia ni e galulue i lana saito e seleseleina." (Mataio 9: 36 – 39)

E finagalo o Ia e auina atu le aufaigaluega i itu e fia o le lalolagi. Ae pagā lea, e manaomia ea e le au Kerisiano e tau ole atu ia te Ia se'i ona faia lenei mea? Na tatalo atu Paulo i le au faatuatua ina ia latou tatalo mo le faasalalauina o le tala lelei i nuu ese: "O le toe upu lenei, le au uso e, ia outou tatalo mo i matou, ia tele vave ma ia mamalu le afioga a le Alii, e faapei ona fai ia te outou." (2Tesalonias 3: 1)

O mea uma e pei o na ta'ua i luga o le fīngalo lava o le Atua ia, ae e manaomia lava e tatalo ma ole atu mo ia mea auā o le tatalo e tatala mai ai e le Atua le malosiaga e faataunuaina ai lona finagalo i le lalolagi. Ia manatua, o fuafuaga a le Atua e faaoga lava le tagata e ui atu ai lona finagalo, ae lē galue tu toatasi na o Ia mai ia te i tatou. O tatou tatalo e manaomia lava ina ia faailoa ma faia lona finagalo e le gata mo i tatou, ae mo i latou fo'i e manaomia a tatou talosaga.

FAAMALOSIGA MA TALATALANOAGA:

1. Auā e iai i le Atua le malosiaga e faataunuu ai soo se mea lava na te finagalo iai; mata lā na te faataunuaina lava lona finagalo pe tatou te tatalo atu ai pe leai? O le a sou manatu i lea mea?
2. O le a se mea sa tatau ia Atamu o na faia i le faatinoina o le finagalo o le Atua mo le lalolagi?
3. O le tatalo o se mea e tatau lava ona tatou faia, pe na'o se avanoa ua tuuina mai ia te'i tatou? Aiseā?
4. O le a sou manatu i se lagona a Satani i le taimi o āu talosaga i le Atua?

FAAGAIOIGA MA FAATINOGA O TALOSAGA:

- Fesootai lou soa-tatalo ma talatalanoa iai e uiga i le mataupu faitau o lenei aso.
- Ia lua tatalo faatasi ma lou soa-tatalo:
 1. Mo le Atua ina ia faaogaina pea oulua e ala mai ai lona finagalo
 2. Mo le Atua ina ia foai atu le malamalamaaga manino o le manaomia o le tatalo
 3. Mo i latou ia oulua lisi tatalo

40-ASO O TALOSAGA MA ANAPOGI

TUSI E FAAAOGA MO TALOSAGA:

“Ia e faate’a ese ia te a’u lea ala o le pepelo; ma ia e foai mai au tulafono ia te a’u i le alofa.”

Salamo 119: 29

12/27/2011



40-ASO O TALOSAGA MA ANAPOGI

ASO 12: IA TATALO I LE AGAGA

O loo feagai pea Kerisiano uma ma taua ma le fili, taua e aafia ai tulaga o le soifuaga amuli. O lenei taua e tauina pea e faatusa lava i taua i vā o malo o le lalolagi. O le taua lenei e tauina i le va o le malo o le Atua faasaga i le malo o le pouliuli. O lea taua ua faamatalaina mai e Paulo e pei o se tauiviga, e lata mai tele ma e aafia ai lava le tagata Kerisiano. “Auā tatou te lē tau ma tagata, a o alii sili, ma faipule, ma alii o le pouliuli o lenei lalolagi, atoa ma agaga leaga i mea o i le lagi.” (Efeso 6: 12) Ona faaauau lea o le faamatalaga a Paulo i le ofu tau e tataua ona ofu ai le Kerisiano ina ia manumalo ai. Ona faai’u lea o le faamalamalamaaga a Paulo e uiga i lea taua ma le auala e manumalo ai i le fili e faapea: “Ia outou tatalo i le Agaga i aso uma lava i talotaloga ma faatoga uma ; ia outou mataāla pea i lenei lava mea, ma matua tausisi i le faatoga mo tagata pa’ia uma lava.” (fuaiupu 18)

Maitau o loo faatonu mai Paulo ia tatalo “... i aso uma.” Ia tatou tatalo faatauana i taimi uma e lē aunoa; ia tatalo i le Agaga. O iinei tatou te maitauina ai afai tatou te manana’o tatou te malumalo i le tino, o le tatalo i le Agaga e tutusa lava ma le ofu i le ofu tau a le Atua.

O se fesili taua lā: O le ā le uiga o le tatalo i le Agaga? O le tali: o le tatou tatalo i le Agaga o tatalo ia e u’unaina e le malosi o le Agaga Paia. Ia taitaiina i tatou e le Agaga i le taimi e fetau e tatalo ai faapea foi ma mea tatou ōle atu ai. O le Agaga Paia e avea ia ma taitai o ō tatou olaga tatalo. Pe a tatou tatalo i le Agaga, o malosiaga o ia tatalo e mai le Agaga. O a tatou tatalo foi e suamalie ma lelei ma e maua mai ai foi tali o manuia. O lea lā, ua tatou iloa ai, o le tatalo i le Agaga, ia papatisoina i tatou i le Agaga. “O tatalo uma lava mai le Agaga e fausia e le Agaga ma e malie i le Atua.” (Desire of Ages, pg 189) O lā le aposetolo o Paulo: “E faapea foi le Agaga ona fesoasoani mai i lo tatou vaivai; auā tatou te lē iloa mea tatou te ōle atu ai ma lē tusa ai, a e peitai o le Agaga, e fautua o ia mo tatou ma le ōi e lē mafai ona talatalaina.” (Roma 8: 26) Faalatele le tamaitai perofeta: “Ia tatou ōle atu ia na o le suafa o Keriso, ae faatasi foi ma le faamalosiga a le Agaga Paia”. (Christ’s Object Lessons, pg. 147)

O le Agaga Paia e valaauina i tatou ia tatalo. E faaali mai e ia manaoga tatou te faaali atu ia te ia auā e fia faataunuina ma faatumu mai e le Atua manaoga uma o ō tatou loto. E pei foi ona tatalo atu Iesu ia Peteru: “Simona e, Simona e, faauta, ua manao tele Satani ia te outou, ia lulū ia te outou pei o le saito; a ua ou faatoga mo oe, ina ne’i mavae lou faatuatua; a o oe foi, pe a liua mai oe, ona e faamalosi ai lea i ou uso.” (Luka 22: 31, 32)

Na u’unaina e le Agaga Paia e tatalo mo Peteru ma ia faailoa atu foi le fuafuaga a Satani mo ia. E mafai foi ona faia e le Agaga Paia lea mea e ala atu ia i tatou. E ta’u mai lava e ia se tasi e manaomia a tatou talosaga. Atonu na te faaali mai le mafuaaga e manaomia ai ona tatou tatalo mo lea tagata; pe le faailoa mai foi se mafuaaga e ao ai ona tatou tatalo mo se tagata. A o le mea taua ia tatou le teena le musumusuga a le Agaga Paia tatou te tatalo.

“Ia matou tofoina lou alofa; taitai i matou ina ia matou faaali a matou agasala. Ia avatu matou ina ia faatumulia i matou i le fiafiaga i lau Afio a’o matou tatalo i le Agaga.”

40-ASO O TALOSAGA MA ANAPOGI

FAAMALOSIGA MA TALATALANOAGA:

1. O le taua faaleagaga e pei ona talanoa mai ai Paulo o loo tatou tau ai nei ma Satani, o le a se fautuaga mai e uiga i le aogā o le tatalo?
2. O le a se faapupulaga mai e Elena Uaita o le uiga o le tatalo i le Agaga?
3. Faamatala mai se taimi na musumusuina ai oe e te tatalo mo se tasi tagata.
4. E fia avea oe ma se Kerisiano e tatalo i le Agaga? O a ni laasaga e te uia ia faatino ai lea mea?

FAAGAIOIGA O TALOSAGA:

- Fesootai i lou soa-tatalo ma faasoa iai le mataupu matagofie o lenei aso.
- Tatalo faatasi ma lou soa-tatalo:
 1. Mo le Atua ina ia faaauau ona manumalo pea oulua i le faatasi mai o le Agaga Paia
 2. Mo le Atua ina ia taitaiina pea lua tatalo e le Agaga Paia
 3. Mo i latou uma ia oulua lisi tatalo

TUSI E FAAAOGA I TALOSAGA:

“Ia e faamalilie mai ia te i matou i le taeao i lou alofa; ina ia matou alalaga fiafia, ma ia olioli i o matou aso uma.” Salamo 90: 14

12/27/11



40-ASO O TALOSAGA MA ANAPOGI

ASO 13: TATALO UA FAATASIA I LE AGAGA

O le faatasia o Kerisiano i talosaga ona o se mafuaaga faapitoa o se tasi lea o tulaga taūa i le olaga o le Kerisiano. O nisi taimi e faapea o le faatasitasi o se to'a lua pe o le to'a tolu e tatalo o le uiga lea o le faatasia i le tatalo. I le taimi o talosaga e tatalo lava le tagata ia i le mea ua oso ane i lona mafaufau. I le tele o taimi e tai tutusa lava mea o loo tatalo atu ai, o manaoga e laititi lava ni eseese. E le o se faamatalaga lea a le tusi paia e faatatau i Kerisiano ua faatasia i talosaga. E leai, o le faatasia i talosaga o le to'a lua pe sili atu fo'i o Kerisiano o loo tatalo mo le mea lava e tasi. Ua faatasia i latou i le faanaunaga, le mafua'aga, ma le gatasi o mana'oga. A le mafai ona latou faatasi i se mea e tasi e tatalo ai, ona latou fai talosaga lea i le taimi e tasi ae tasi lava le mea e sii atu i talosaga, pe tatalo faatasi fo'i i luga o le telefoni. Ae faataūaina lava le faatasitasi e tatalo faatasi i se nofoaga e tasi.

I o tatou olaga taitoasi, o le tatalo faatasi ma nisi o le au faatuatua o se malosiaga tele lea e tete'e atu ai i le fili o Satani. Le mea lea na fautua mai ai Iakopo ina ia faatasia ai le au faatuatua pe tatou tatalo mo e mama'i, ae faasilia, ia tatou tatalo mo i tatou lava. “Ua ma'i ea so outou? Ina aami atu ia i toeaia o le ekalesia, ia latou tatalo mo ia, pe a uma ona faauu ia te ia i le suau'u i le suafa o le Alii. O le tatalo foi e faia i le faatuatua e faaolaina ai le ma'i, e faatuina foi o ia e le Alii; afai foi ua agasala, e faamagaloina o ia. O le mea lea ia feta'uta'ua'i ai a outou agasala, ma tatalo le tasi mo le tasi, ina ia faamalolō outou. Ua aogā tele le tatalo faatauana a le tagata amiotonu.” (Iakopo 5: 14-16)

E le gata i lea, ua tataua lava mo i latou o loo faatalitali atu e feiloai ma Iesu pe a toe faaali i lona toe foi faalua mai ona faatasia i talotaloga, o le tasi mo le isi. E le'i faia i tatou e ta'ito'atasi ma faasaga tau atu i le fili o Satani. Tatou te manaomia talosaga a isi ou uso a tagata e tau atu ai ma manumalo i le tiapolo ma ana 'au.

O le faatasia foi i talosaga e manaomia mo le tau avea i luga o le tala o le malo o le Atua i le lalolagi. E matuā tete'e tele Satani i se vaaiga ua agai ai i luma le tala o le malo o le Atua. E aga'i i luma le tala lelei o le malo o le Atua pe a tatalo faatasi le au faatuatua.

O faata'ita'iga o le faatasitasi o le au faatuatua i talotaloga o loo maua foi i le Feagaiga Tuai, e pei ona ta'ua i le tusi a le Poto o Solomona i le Failauga 4: 12: “Afai fo'i e faamanumalo mai se tasi i so laua; a e faapefea ona mafanafana o lē ua to'atasi?” O se fautuaga lenei i le taūa o le tutū faatasi e manumalo ai. “E tulia le toaselau e le toalima o outou, e tulia foi le sefulu o afe e le toaselau o outou; o ē fai outou mo latou fili e oti i latou i ō outou luma i le pelu.” (Levitiko 26: 8).

Afai tatou te tutū taitoatasi i le taua ma Satani ma ana faaosoosoga, e faigofie lava ona tatou pau'ū. Ae peita'i e malosi le tete'e atu pe a 'au ta'ito'alua; ma e malosi atu fo'i pe a to'atolu. O le mafua'aga lea e taūa le faatasitasi i talotaloga ma isi o le au faatuatua ona o le malosi'aga fo'i lea i faapotopotoga. “Ou te fai atu foi ia te outou, afai e loto gatasi se toalua o outou o i le lalolagi i se mea la te ōle atu ai, e faia lea mo i laua e lo'u Tama o i le lagi. Auā o le

40-ASO O TALOSAGA MA ANAPOGI

mea ua faapotopoto ai se toalua, po o se toatolu i lo'u igoa, ou te iai faatasi ma i latou." (Mataio 18: 19, 20)

A tatalo faatasi se toalua pe sili atu foi o le au faatuatua fa'atasi ma le Agaga, e le taumate e iai lava le mautinoaga e faafofoga mai le Atua ma tali mai foi ia latou talosaga. "O lenei foi le loto tele ua tatou maua i ona luma, pe afai tatou te ʻole atu ai se mea e tusa ma lona finagalo, e faafofoga mai o ia ia te i tatou. Afai foi ua tatou iloa, e faafofoga mai o ia ia te i tatou i se mea tatou te faatoga atu ai, ua tatou iloa e maua e i tatou mea tatou te faatoga atu ai ia te ia." (1 Ioane 5: 14, 15)

"Aua le tosina a'u e moomoo i mea a le lalolagi nei. Ia faasaga a'e o'u mata ia te oe. Toe faafouina lo'u olaga faaleagaga, ma fesoasoan mai ia mafai ona ou toe tuufaatasia le au faatuatua ia au ai i talotaloga fai faatasi."

FAAMALOSIGA MA TALATALANOAGA:

1. Faamatala mai le uiga o le "tatalo faatasi i le Agaga". O le a le mea e ta'ua ai le ituaiga talosaga lea?
2. Aiseā ua fai mai ai le Tusi Paia e sili atu le tatalo faatasi i lo le tatalo toatasi o le Kerisiano?
3. Aisea e le mana'o ai Satani i le au Kerisiano e tatalo ta'itoatasi?
4. O le a sau mea e mafai ona fai ia faatasia ai le au faatuatua i talosaga fai faatasi?

FAAGAIOIGA O TALOSAGA:

- Fesootai ma lou soa-tatalo ma faasoa iai le ta'ua o lenei faitauga.
- Tatalo faatasi ma lou soa-tatalo:
 1. Mo le Atua ina ia galue e taitai oulua e tatalo i le Agaga Paia
 2. Mo le Atua na te taitai faatasi oulua i talosaga e faatasi ai ma nisi o le au faatuatua
 3. Mo latou ia oulua lisi tatalo.

TUSI E FAAAOGA I TALOSAGA:

"Ia e liliueseina ou mata ne'i ou vaai i mea le aogā; ia e faaolaolaina a'u i ou ala." Salamo 119: 37.

12/27/11

40-ASO O TALOSAGA MA ANAPOGI

ASO 14: O LE FAASAOINA O TALOSAGA I LE AGAGA

Mo le tele o senituri, o le faasaoina o talosaga faifai pea e faataūaina mo le agai i luma o le malo o le Atua. Ae peitai, o i tatou o loo soifua ma ola i le itulalolagi i Sisifo, tatou te manana’o i ni tali faavavevave ma ia fo’ia faafitauli i se taimi puupuu lava. I le tele o taimi o le naunau ‘ia vave maua e i tatou tali o a tatou faafitauli, ua oo ai lava fo’i ina ua tatou manana’o ia faapena tali o a tatou tatalo. I nisi fo’i taimi, ua na o na tatou tatalo pe a iai se manaoga faavave, ae le tatalo faifai pea. O le tala moni lava, o le tatalo faifai pea e le o se mea e te filifili pe fai pe leai, ae o se mea e fai i taimi uma, e pei lava o le manaomia e le tagata le ea e manava ai, e le tau filifili pe manava le ea pe leai. E pei foi lea o le tatalo faatasitasi ma le au faatuatua, o se mea e manaomia i taimi uma pe afai tatou te fia manumalo i le ti’āpolo. O lea masani e aogā mo le Kerisiano lava ia, ae maise foi le tuufaatasiga o le ekalesia.

Na faamasani lava Iesu i le faasaoina o le tatalo. O le tele o taimi na tatalo ai i le po atoa. I le tusi a Luka 18 na ia fautua malosi ai lava le tatalo faatauana faifai soo: “Ua fetalai atu foi o ia le faataoto ia te i latou, ina ia tatalo soo e tatau ai, a e aua le faavaivai.” (Faiupu 1). O le mafuaaga o lenei faataoto ina ia aoaoina i tatou i le tatalo “soo e tatau ai.” Na a’oa’o mai ‘ia aua ne’i faavaivai mai le tatalo ae tutumau pea seia maua mai se tali, pe vave maua mai lea tali pe faatali umi, aua nei faavaivai ai i le tatalo. O le tatalo ia faatauana ma ia le aunoa ae aua le fiu pe vave faagata lea faatauana.

Faiupu 7: “Pe le faia ea e le Atua le faamasinoga mo ē na ia filifilia, o loo alalaga ia te ia i le āo ma le po? Pe faatuai ea o ia ia te i latou?” Ua manino i lea fetalaiga a Iesu lea manatu e tali mai lava le Atua ā tatou talosaga ma olega tusa lava pe olega atu i le āo atoa ma le pō. O talosaga faavavevave e le maua mai ai ni tali e pei o talosaga e faatauana ma e mai le loloto o le loto ua manaomia le faafofoga mai o le Atua. Na iite foi Elena Uaita i le vaivaiga o le itū faaleagaga o le au faatuatua i ona fo’i aso. Na ia fesili ai i le Atua pe aisea ua iai lea tulaga. O le tali: “Na ou fesili i le agelu pe aisea ua le o toe iai se faatuatua ma se malosi ia Isaraelu. O le tali mai: ua e vave faamaamulu le aao o le Atua. Ia faamalosi pea i talotaloga ma tuu atu pea ou mana’oga i le nofoalii, ma uu mau pea i le faatuatua. O folafolaga e mautinoa. Talitonu e maua mai lava mea e te ōle atu ai.” “Fai mai a Ia, vaai ia Elia. Na iai foi manaoga i puapuaga e pei ona e iai nei. Ae na ia tatalo lava faatauana, ma na ia manumalo i faaososoga ma lē faavaivai. E faafitu ona ia ōle atu i luma o le nofoalii o le Atua, ma na i’u lava ina ua vaaia le āo.”

E tele nisi o i tatou e vave faamaamulu le aao o le Atua. Ia tatou u’umau pea i le aao o Ieova a’o tatou tatalo pea ma le faatauana.

40-ASO O TALOSAGA MA ANAPOGI

FAAMALOSIGA MA TALATALANOAGA:

1. O le a le uiga o le tatalo ma le faatauana i le Atua?
2. E te manatu ea e faigofie i nei ona po, o tū ma aga ua lolofi mai a aafia ai lo tatou olaga le tatalo faatauana?
3. O le ā se aoaoga a Iesu e uiga i le tatalo fai fai pea?
4. O le a se tali mai a le agelu i le tamaitai o Elena Uaita e faatatau i le mafuaaga ua vaivai ai le ekalesia i le itu faaleagaga?


FAAGAIOIGA O TALOSAGA:

- Faafesootai lou soa-tatalo ma faasoa iai le mataupu faitauga o lenei aso
- Tatalo faatasi ma lou soa-tatalo:
 1. Mo le Atua ina ia faamanuia mai pea oulua e le Agaga Paia
 2. Mo le Atua ia taitaiina oulua ia iloa ona tatalo e le aunoa ma le faatauana
 3. Mo i latou ia oulua lisi tatalo

TUSI E AOFIA I LUA TATALO:

“Ia outou saga olioli pea lava; ia tatalo e lē aunoa.” 1 Tesalonia 5: 16, 17

12/27/11



40-ASO O TALOSAGA MA ANAPOGI

ASO 15: TATALO FAATAUANAU I LE AGAGA MO NISI

O le tatalo e le aunoa ma le faatauanaui e aoga lea i vaega uma lava o le olaga faaKerisiano, e aofia ai fo'i ma le taitaiina o nisi ia Keriso. Ia manino mai i nisi o mataupu sa talanoaina le taua ma le manaomia o ā tatou tatalo mo le faaolaina o i latou oi le li'o o tatou aiga ma uo. O lā le aposetolo o Paulo: “O lenei, e muamua i mea uma ou te apoapoa'i atu ia fai ōlega, ma tatalo, ma faatoga, ma faafetai mo tagata uma lava; mo tupu ma i latou uma ua iai le pule, ina ia tatou nonofo ma le lē atuatuvaile ma le filemu, i le amio Atua uma lava ma le amio matagofie; auā o le mea lelei lea ma le malie i luma o le Atua lo tatou Faaola.” 1 Timoteo 2: 1-3

Ia tatou feiloa'i ma le Atua i tatou talosaga ma le faatauanaui. O a tatou talosaga mo i latou ua leiloa pe ua fuitua i le Atua e avea lea e toe feiloa'i ai i latou ma le Atua, ma faamotusia ai o le faapologaina o ō latou olaga e le tiapolo ma ana mailei. O le tatalo o faato'esega ma le faatauanaui o le galuega faifai pea lea a le tagata Kerisiano e molimau atu ai i lē ua manaomia Keriso i lona olaga. “O mea uma fo'i mai le Atua ia, ua uma ona faaleleia e ia o i tatou ia te ia e ala ia Keriso Iesu, ua tuuina mai foi ia te i matou le galuega o le leleiga. O lenei, sa ia Keriso le Atua, ua faaleleia e ia le lalolagi ia te ia, ua le ta'ua a latou agasala ia te'i latou; ua ia tuuina mai foi ia te i matou le upu o le leleiga.” (2 Koronito 5: 18, 19).

Na tatalo foi Iesu mo le gatasi o loto o le au faatuatua ma le Atua: “E lē faapito la'u tatalo mo i latou nei a'o i latou foi e faatuatua ia te a'u ona o lā latou upu; ina ia tasi i latou uma, faapei o Oe le Tamā o i totonu ia te a'u, o a'u foi o i totonu ia te Oe, ia tasi i latou i totonu ia te i ta'ua; ina ia talitonu le lalolagi ua e 'auina mai a'u.” (Ioane 17: 20, 21) Na tatalo Iesu mo se leleiga atoatoa a lona Tamā ma le 'au faatuatua. E lē gata lā sa ia faia lenei ōlega i le 2000 tausaga talu ai, ae o loo ia faia pea lea ōlega mo tatou i le asō. “O le mea foi lea e mafai ai ia te ia ona faaola pea lava i ē faalatalata atu i le Atua ona o ia, auā o loo soifua pea ia e fautua mo i latou.” Eperu 7:25

I le tele lava o tusi a le Aposetolo o Paulo, na ia faia foi le ōlega i le Atua mo le au faatuatua i ekalesia i lea nuu ma lea nuu. E pei foi ona ia tatalo mo le ekalesia i Kolose: “O le mea lea o i maua foi ma te le'i mapu ai lava i le tatalo mo outou, talu le aso na ma faalogologo ai, ma te aioi atu foi ina ia atoatoa ona outou iloa lelei o lona finagalo i le poto uma atoa ma le mafaufau faaleagaga.” (Kolose 1: 9) Na silafia lelei lava e Paulo le tulaga o le au faatuatua i Kolose, ma na alofa tele foi o ia i le tulaga vaivai o iai. O lea na aioi ma ōlega faapitoa ai o ia mo i latou. E faamalosi mai foi o ia i le au Kerisiano ina ia faia lenei mea, o le tasi mo le tasi. . “Ia outou tatalo mo le Agaga i aso uma lava i talotaloga ma faatoga uma; ia outou mataāla pea i lenei lava mea, ma matuā tausisi i le faatoga mo tagata paia uma lava.” (Efeso 6: 18)

Na faaali e le Atua le faataūaina o le tatalo faatauanaui ina ua talanoa atu le perofeta o Samuelu i le tupu o Saulo e faapea: “O a'u foi, ia mamao ia te a'u ona ou agasala i le Alii i lo'u tuua o le fautua mo outou; ou te faasino foi ia te outou le ala lelei ma le tonu.” (1Samuelu 12: 23) O lenei faitauga tatou te maua mai ai le aoaoga o le agasala foi pe 'ā tatou le faia lea mea o le

40-ASO O TALOSAGA MA ANAPOGI

tatalo mo nisi. E pei foi ona fautua mai le tamaitai perofeta o Elena Uaita: “E ui ina e lē mau le Atua i malumalu na faia i lima, ae peitai, na te faamanuia na o le faatasiga a ona tagata. Ua folafola mai o Ia, pe a mafuta lana fanau e saili ia te ia, e faatasi mai o Ia i lona Agaga. A o i latou e faapotopoto e tapua’i atu ia te ia, ia tuu ese manatu ma mea leaga uma a le tiapolo. Vagana ai ua latou tapuai atu ia te ia i le agaga ma le faamaoni ma le matagofie o lona mamalu, ua fai fua ia mafutaga.”

A ‘o faatumulia le au Kerisiano i aso faisoo i le Agaga, o loo taitai foi le Keriso i ia talosaga faaōlega i le Atua le Tamā. E aumaia i mafaufau talosaga e fetau ai mo i latou o loo manaomia ia ōlega i le Tamā mo ō latou olaga. O le mea lea tatou te iloa ai le matuā tete’e o Satani ia ‘aia lava ne’i tatou tatalo o lē tasi mo le isi. E mana’o le tiapolo ia tatou manatu e le taua lenei mea o le tatalo mo i latou ua leiloa. E mana’o Satani ia tatou talitonu o le Atua e galue lava o ia mo le faaolataga o e ua le iloa, e tusa lava pe tatou te le tatalo mo i latou pe leai. Talosia tatou te lē talitonu i lona taufaasesē. O le mea lenā e osofa’ia ai e le tiapolo o tatou olaga tatalo i le faafetuleni mai o le tele o mea o le olaga nei e faagalogalo ai ona tatou tatalo fai fai pea, ma faaletonu ai lo tatou olaga faaleagaga.

FAAMALOSIGA MA TALATALANOAGA:

1. A tatalo faapuluvaga le Kerisiano mo se tasi, o le a tonu lava le mea o loo ia faia?
2. O faapefea ona osofai e Satani lou olaga tatalo?
3. E faapefea ona avea oe ma se tagata tatalo faapuluvaga atu mo nisi tagata?

FAAGAIOIGA O TALOSAGA:

- Faafesootai lou soa-tatalo ma talatalanoa iai e uiga i le mataupu o lenei aso.
- Ia lua tatalo ma lou soa-tatalo
 1. Mo le Atua ina ia fesoasoani atu pea ia te oulua e ala mai i lona Agaga Paia
 2. Mo le Atua ina ia taitai oe e fai ma se e mafai ona tatalo malosi mo nisi
 3. Mo i latou ia oulua lisi tatalo.

TUSI E FAAAOGA I LUA TALOSAGA:

“Ona ou sausuina lea o outou i le vai manino, ona mamā ai lea o outou; ou te faamamāina foi outou i lo outou leaga uma, ma a outou tupua uma; ou te avatu foi ia te outou le loto ma’a ai o outou tino, ma ou avatu ia te outou le loto aano; ou te tuuina atu lo’u Agaga i totonu ia te outou tou te savavali ai i a’u tulafono, tou te anaana fo’i i a’u faamasinoga, ma tou te faia.” (Esekielu 36: 25-27)

12/27/11

40-ASO O TALOSAGA MA ANAPOGI

ASO 16: TALOSAGA MO FOLAFOLAGA A LE ATUA I LE AGAGA

Ua tuuina mai e le Atua le tele o ana folafolaga mo o tatou manaoga uma. E faatumulia le Tusi Paia, mai le Fegaiga Tuai e oo foi i le Feagaiga Fou, i folafolaga na faia ma òlega ai foi ona tagata pe a faafeagai i latou ma faigata ma puapuaga. E faafaigofie lava le auala ua a’oa’o mai ina ia tatou faaalia ai manaoga i talosaga; 1. Òle: “Ia outou òle atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona tōina ai lea ia te outou.” (Mataio 7: 7) 2. Talitonu: “O le mea lea ou te fai atu ai ia te outou, o mea uma lava tou te òle mai ai i a outou tatalo, inā faatuatua ia o le a maua e outou, ona faia lava lea mo outou.” (Mareko 11: 24) 3. Talia: “Ona latou ave ese lea o le maa i le mea na tuu ai le ua oti. Ona tepa ae lea o fofoga o Iesu, ua fapea atu, “Lou Tamā e, ou te faafetai atu ia te oe, auā ua e faafofoga ma ia te a’u e lē aunoa; a e peitai ua ou fai atu ai, ona o le motu o tagata o loo vagavagai, ina ia talitonu i latou ua e auina mai a’u;” ua ia fetalai atu ia upu, ona alaga lea o ia ua leo tele, “Lasalo e, inā sau ia i fafo.” (Ioane 11: 41-43)”

I mau mulimuli nei, ua maitauina na faafetai Iesu i lona Tama mo le faafofoga ma talia o lana tatalo e ui ina e le’i iai se tali o le mea na òlega atu ai. E mautinoa lava folafolaga a le Atua. Ia ia i tatou le mautinoaga e faia e le Atua mea ua Ia folafola mai. “E le se tagata le Atua e tala pepelo ai o ia, po o se atalii o se tagata e salamo ai o Ia; ua fetalai mai o Ia, na te le faia ea? Ua fetalai mai o Ia, na te le faataunuuina ea?” (Numera 23: 19) E mafai lava ona Ia faia mea ua ia folafola mai: “Aue! Le Alii o le Atua, faauta, o Oe na e faia le lagi ma le lalolagi i lou malosi tele, ma lou aao faaloaloa, e lē faigata foi ia te Oe se mea e tasi.” (Jeremia 32: 17) “I soo se faatonuga ma soo se folafolaga i le Afioga a le Atua o loo iai le malosiaga o le Atua soifua, e mafai ai ona Ia fetalai, ona taunuu lea.” (Christ’s Object Lessons, pg 38)

Tatou te maua uma lava faamaoniga o le malosi ma le moni o folafolaga a le Atua i le Tusi Paia. E le iai foi se mea e faalavelave ai i le faataunuuina o mea ua Ia folafola mai. E pei foi ona tatou maua i le tala i le tupu o Iuta, o Iosefatu, ina ua ia faafesaga’i ma ‘au tau e toatele, o fili o Isaraelu. Na ia sauniuni lava mo ia tulaga; atiae au tau ma pa puipui. E silia i le miliona ‘au fitafita ua saunia lelei mo ia taua. Ae i na ua faafeagai loa ia ma au a le fili, na le manatu o ia i le malosi o ana fitafita, ae na vaai atu lava o ia i le Alii. Ioe, a tatou faafesagai ma faafitauli o le olaga, ia faapea foi lo ta vaai muamua i le Atua. E lē o lona uiga tatou te le taapenapena mo faigata ma puapuaga e oo mai. O le faigata, o le tatou tapa muamua lea ma faamoemoe le tagata lava ia o lona poto ma lona malosi e tali ai faafitauli e oo mai. Tatou te matele i le faamoemoe i a tatou taapenapenaga faale tagata ona faato’ā òle ma aapa atu ai lea i le Atua ma lona malosi. O le tali atu a le tupu o Iosefatu, o le tatou tali foi lea e tataua ona fai, i ni laasaga se 5:

1. Na amata lava talosaga a le tupu i le viiga o le Atua, ae maise lava e patino i faafitauli ua feagai ma ia (faiupu 6); na faamanatu e ia o le Atua e pule āoāo o Ia i malō ma atunuu uma; o i ona aao le malosi uma ma e leai se tasi e mafai ona tetee atu i lea malosi.
2. Na faamanatu e ia manumalo na ‘au mai e le Atua i taua ua te’a, ma e pei foi o le manumalo ua manaomia nei (Fuaiupu 7). O le manatuaina o mea lelei uma na faia e le

40-ASO O TALOSAGA MA ANAPOGI

Atua mo i tatou i taimi ua te'a e faamanatu mai ai ia i tatou le faamaoni o le Atua i taimu ua mavae ma e fesoasoani foi e faamalosia ai lo tatou faatuatua ia te Ia.

3. Na faamanatuina foi e le tupu i lana tatalo le folafolaga na faia e le Atua i lona nuu i taimi ua mavae i tulaga e pei foi o loo faafeagai ai nei ma ia (faiupu 8, 9).
4. Ona ta'u sa'o atu lea e le tupu o Iosefatu le faafitauli ua fesagai nei ma ia (faiupu 10-12)
5. Ua viia e ia le Atua ae e le'i iai se mea e faamaonia ai o le a manumalo i latou i le taua ma faafitauli o loo fesagai ai nei (faiupu 18, 19).

Matau le auala i talosaga mo folafolaga a le Atua ae le o le taulai manatu i faafitauli: vivii, manatua mea lelei ua faia mai taimi ua mavae, faamanatu folafolaga, ta'u le faafitauli, ma ia vivii.

FAAMALOSIGA MA TALATALANOAGA:

1. Manatu i se taimi na tatalo ai mo se folafolaga a le Atua, ma faatusa i se taimi na faasaga tonu ai lava lau tatalo mo se tali i se faafitauli sa feagai ma oe.
2. O ā ni vaega ta'ua lava o le tatalo a le tupu o Iosefatu? O ā fo'i ni vaega o lea tatalo e faigatā ia te oe ona faia i lou olaga tatalo?
3. Lisi i lalo ni folafolaga a le Atua e taua lava ia te oe.

FAAGAIOIGA O TALOSAGA:

- Faafesoota'i lou soa-tatalo ma faasoa iai le faituaga o lenei aso.
- Tatalo faatasi ma lou soa-tatalo
 1. Mo le Atua ina ia faatumulia pea oulua i le Agaga Paia
 2. Mo le Atua ina ia fesoasoani ia lua iloa ona tatalo mo ana folafolaga ae le o faafitauli o feagai ma ai
 3. Mo i latou ia oulua lisi tatalo

TUSI IA AOFIA IA OULUA TALOSAGA:

“Ia aoao mai ia te a'u, ona ou anaana lea i lau tulafono, ma ou tausia ma lo'u loto atoa.” Salamo 119:34

MANATU MULIMULI

---Aumai ia te a'u le faanaunauga e usita'i ai ia te Oe ma lo'u loto atoa. Fesoasoani mai ia te atu a'u ina ia ou iloa tatalo atu ia te Oe ma au folafolaga, ae le o'lega atu e na o o'u faafitauli.

12/28/11

40-ASO O TALOSAGA MA ANAPOGI

VAEGA TOLU: PAPATISOGA A LE AGAGA PAIA MA LE TALA'I ATU

ASO 17: GALUEGA O LE TALA LELEI E FAAIUINA I LE MALOSIAGA A LE AGAGA PAIA

Na valo'ia mai e Iesu "o le tala lelei o le malo e talaiina i le lalolagi uma e fai ma molimau i atunuu uma, ona oo mai ai lea o le i'uga." (Mataio 24: 14) Na valoia e le perofeta o Ioelu ūaga tetele o le Agaga Paia, o le Ūaga muamua, ma le Ūaga mulimuli: "O outou foi o le fanau a Siona e, ia outou fīafia ma olioli i le Alii lo outou Atua; auā ua ia foaiina faatatau mai ia te outou le ūaga muamua, na te faatotoina ifo foi le ūa mo outou, o le uaga muamua, atoa ma le uaga mulimuli i le masina muamua." (Ioelu 2: 23)

Na tautala foi le aposetolo o Peteru i lana lauga i le aso Penetekoso e faatatau faapea o le liligi mai o le Agaga Paia ua amataina i le aso lenā: A'o le mea lenei ua fai mai ai e le perofeta o Ioelu, "O ona aso e gata ai, o loo faapea mai le Atua, a i'u ina ou liligi ifo ai lo'u Agaga i luga o tagata uma lava; ona perofeta mai lea o outou atalii ma o outou afafine, e iloa faaaliga e o outou taulelea, e fai miti foi o outou toeaiina. O ia aso foi ou te liligi ifo ai lo'u Agaga i luga o a'u auauna tane, ma a'u auauna fafine, latou te perofeta mai ai; ou te faia foi vavega i le lagi i lugā, ma faailoga i le lalolagi i lalo, o le toto, ma le afi, ma le asuasua e faaniutu." (Galuega 2: 17-19)

O le uaga lea o le Agaga Paia ua ta'ua o le papatisoga a le Agaga Paia. "Sa faatasi o Ia ma i latou, ona fetalai atu lea o ia ia te i latou, ia le tuua Ierusalem, a ia faatali i le mea na folafolaina e le Tamā, "ua outou faalogo ai ia te a'u. Auā na papatiso lava Ioane i le vai; a o outou, e papatisoina outou i le Agaga Paia, e lē tele ni aso e va a'i." Ua potopoto i latou, ona latou fesili ai lea ia te ia, ua faapea mai, "Le Alii e, o ona po nei ea e te toe fuata'i mai ai le malō ia Isaraelu?" A ua fetalai atu o ia ia te i latou, "E le tusa ona outou iloa o ona po ma ona tausaga, ua tuu e le Tamā i lana lava pule. Ae peitai, o le a maua e outou le mana, pe a afio ifo le Agaga Paia i luga ia te outou e fai foi outou ma molimau ia te a'u i Ierusalem, ma Iutaia uma lava ma Samaria, e oo lava i le tulu'iga o le lalolagi." (Galuega 1: 4-8)

O le tusi o Galuega o loo faamatala mai ai le malosi o le galuega o le talaiga o le Tala Lelei ma le to'atele o i latou na liua mo Keriso. Soo se Kerisiano ua faitau i le tusi o Galuega e le taumate ua momoo i lea aso e pei o ia ona po na molimauina ai le vavega o galuega a le Agaga Paia i loto o tagata na faalogo i le Tala Lelei. Na amataina e le Atua ona faaali mai ai le faaogaina o ona tagata e molimau ma tosina mai le toatele 'ia talitonu iā Keriso ma lana Faaolataga. Atonu e le o le faifeau talai faapitoa, pe o TV ma letio e faa'umaina le galuega mulimuli, ae o le a faaumaina lava e tagata ta'itoatasi o le 'au faatuatua ua papatisoina e le Agaga Paia ma faatagaina e i latou o latou lava olaga e faaali atu ai Keriso ma lana faaolataga. Atonu e le o ni polokama fou pe o ni auala faatosina fou e faamaea ai e le Atua lana galuega. E faauma lava e le Atua lana galuega e ala atu i olaga ua tuu atoa i le Atua. O le mafuaaga foi lea na fetalai atu ai Iesu i lona au soo e faatali mo le papatisoga a le Agaga Paia ae e le'i o atu e

40-ASO O TALOSAGA MA ANAPOGI

folafola le tala lelei i le lalolagi. Na latou mana'omia e faatali mo le malosiaga mai le Agaga Paia.

A maua e le Kerisiano ua faatumulia e le Agaga Paia lea tulaga maualuga, ona molimauina loa lea o le matautia o le aafiaga o le lautele i le taliaina o le uaga mulimuli, ma molimauina le liliu mai o tagata e toatele e talia Keriso ma lona toe Afio mai. O le talanoaina o lenei tulaga maoa'e i le talia e le toatele o lenei feau i aso mulimuli e faataūaina ona o le toatele foi o le au faatuatua o le a mananao ia faaaogaina latou e molimau atu lea fe'au i le atu laulau; o i latou ia ua sauni e feiloai ma le Matai pe a toe Afio Mai.

FAAMALOSIGA MA FAATALATALANOAGA:

1. Ua e lagonaina le malosiaga o le Agaga Paia ina ia mafai ai ona e molimau atu i nisi?
2. O le ā sou manatu i se mea taūa tele lava i le tau faa'umaina o le galuega a le Atua?
3. E fia avea oe ma se tasi o le au galulue i le tau faamae'aina o le galuega i nei aso mulumuli?

FAAGAIOIGA O TALOSAGA:

- Faafesootai lou soa-tatalo ma faasoa iai le faitauga o lenei aso
- Tatalo ma lou soa-tatalo
 1. Mo le Atua ina ia faauuina pea oulua e lona Agaga Paia
 2. Mo le Atua ina ia taitaiina oulua ia avea oulua o ni molimau mautu mo Iesu e ala atu i lua olaga faapaiaina.
 3. Mo le Atua ina ia liligi ifo le uaga mulimuli o le Agaga Paia
 4. Mo i latou ia oulua lisi tatalo.

TUSI IA AOFIA I TATALO:

“Le Alii e, ua ou faalogo i le tala ia te oe, ua ou mata'u ai; le Alii e, ua e toe faaolaolaina lau galuega i ia tausaga, o ia tausaga ia e faailoa mai ai; ia e manatu i le alofa a o 'e to'asā.”
Sapakuka 3: 2.

MANATU MULIMULI:

“Ia taitai ese matou mai ia matou agasala; ia iai Lou alofa i luga o i matou ma faamagalo i matou; ia viia lou Suafa e ala mai i galuega tetele o lau faaolataga. Saunia i matou mo le uaga mulimuli, ma ia liligiina ifo lou Agaga ina ia mafai on faauma lau galuega.”

12/28/11

40-ASO O TALOSAGA MA ANAPOGI

ASO 18: O LE AGAGA PAIA MA LE MOLIMAU ATU.

O le ekalesia Aso Fitu o le Toe Afio Mai, faatasi ai ma nisi o le au Kerisiano, ua leva ona latou faatali mo le toe afio mai o Keriso. O le faataoto o taupou e toasefulu o loo aoao mai ai le faatuai o le taunuu mai o le faatoafaiavā. O le a le ogatotonu o lea faatuai mai? Ou te talitonu e lua lava mafuaaga o le faatuai mai: 1. E le i saunia tagata o le Atua. 2. O le galuega o le talaiina o le tala lelei i le laolagi, le faaleoina atu o le lapataiga i le toe Afio Mai ma mea e tutupu i lea faaali mai, e le'i tala'ia. E le'i alu atu i itu e fa o le lalolagi le feau a agelu i le Faaaliga 14 e pei ona faailoa mai ae le'i Afio Mai Keriso. “Na a'u iloa foi i le tasi agelu ua lele i le taulotoa'iga o le lagi, ua ia te ia le tala lelei e faavavau e folafola atu i ē nonofo i le lalolagi, i atunuu uma, ma ituaiga, ma gagana eseese, ma nuu, ua faapea atu ma le leo tele, “Ia outou matata'u i le Atua, ma avatu ia te Ia le viiga, auā ua oo mai le itūaso o lana faamasinoga; ma ia outou ifo i lē na faia le lagi, ma le fanua, ma le sami, atoa ma puna o vai.”

“Ona mulimuli atu ai lea o le tasi agelu, o lona lua, ua faapea atu, “Ua pa'ū, ua pa'ū Papelonía o le aai sili, o le ua faainu i nuu uma i le uaina o le toasā i lana faita'aga.” Ona mulimuli atu ai lea ia te i la'ua o lona toatolu o agelu, ua faapea atu ma le leo tele, “Ai se tasi e ifo i le manu fe'ai ma lona faatagata, ma talia le faailoga i lona muaulu pe o lona lima, e inu lava ia i le uaina o le to'asā o le Atua, ua liligiina atu e lē suia i le ipu o lona to'asā, e puapuagatia foi ia i le afi ma le teiō i luma o le au agelu paia ma luma o le Tama'i Mamoe. O le asu fo'i o lo latou puapuaga e alu a'e e faavavau, favavau lava; latou te lē maua foi se filemu i le āo ma le po o ē ua ifo i le manu fe'ai ma lona faatagata ma sē na te talia le faailoga o lona igoa.” O le mea lenei ua fia maua ai le onosai o le au paia; oē ua tausi i poloaiga a le Atua ma le faatuatua iā Iesu.”

“Na ou faalogo foi i le leo mai le lagi, ua faapea mai ia te a'u, “ia e tusi: Amuia e ua oti, o e ua oti o i le Alii e amata i nei ona po.” “O lea lava,” ua fetalai mai ai le Agaga, “ina ia latou malolō i ā latou galuega tigā; auā foi o ā latou galuega e mulimuli ia te i latou.” Na a'u iloa, faauta foi, o le āo sinasina, ua tietie foi i le āo le tasi ua pei o le atalii o le tagata, ua i lona āo le palealii auro, ua i lona aao foi le selesaito ma'ai.” (Faaaliga 14: 6-14)

E tele ni mea matautia e tutupu i lenei lalolagi ae e le i toe afio faalua mai Keriso. I taimi ua mavae, na le'i saunia tagata mo mea o le a tutupu e pei ona faailoa mai ia i latou, e pei lava o lapataiga na ala mai ia Noa i le lolo, lea na ia fau ai le vaa. E le'i oo mai le lolo, ae na oo lava ina taunuu lea faaumatiaga tele o le lalolagi. Ua oo mai lea foi lapataiga i le “vaa”, o le ekalesia, ina ia sauni, ona oo mai ai lea o le i'uga.

Na faapefea ona tau faao'o atu e Keriso le lapata'iga i tagata o ōna po o Noa i le faaumatiaga o le a oo mai? Fai mai le aposetolo o Peteru i lana tusi muamua lava, na “faaosofia” Keriso e le Agaga Paia, pe na toe faatu mai o Ia mai le tuugamau, le Agaga na “tala'iina” le feau na ui atu ia Noa, o alii ma tamaitai (o agaga ia), o i latou na falepuipui ma faapagotāina e Satani: “Aua o Keriso foi na maliu o ia faatasi mo agasala, o le amiotonu mo e amioletonu, ina ia

40-ASO O TALOSAGA MA ANAPOGI

taitaliina e ia o i tatou i le Atua; na fasiotia o ia i le tino, a ua faaolaina mai i le Agaga; na ia maliu atu ai, ma tali atu ai i agaga i le fale puipui; o ē na lē faalogo anamua, ina o faatalitali mai le onosai o le Atua anamua i ona po o Noa, a o saunia ai le vaa, na faasaoia ai tagata e toaititi, e toavalu lava ia, i le vai.” (1 Peteru 3: 19-20)

O loo faaaogā foi e le Tusi Paia, e pei o le Numera 27: 15-16, le upu o le agaga e faasino i ē o loo soifua. O le faaaogaina foi o le upu o “falepuipui”, pe o pagota, o loo faaaogaina e faasino i alii ma tamaitai o loo i lalo o le malosi o Satani i le agasala ma le sesē (Isaia 42: 6, 7). O lea ia tatou iloa ai mai le Tusi Paia o Keriso lava, e ala mai i le Agaga Paia, na fetalai mai e ui mai ia Noa, o lē sa lauga ma lapatai atu i le lalolagi o ia ona po, e sauni o le lolo o le a oo mai. E faapea foi ona po ua lata mai ai le toe Afio Mai faalua o Keriso (Mataio 24: 37). O le a fetalai mai Keriso i le Agaga Paia, e ui i Kerisiano ua faatumulia i le Agaga Paia ina ia saunia i latou e tau alagaina le feau o le Toe Afio mai.

I totonu o le ekalesia Aso Fitu o le Toe Afio mai, e faapea foi ma nisi ekalesia e talitonu i le Toe Afio faalua mai o Iesu, ua tele taimi ma tamaoiga ua faaalu i le taapenaina o prolokalama, fuafuaga, ma auala e ave atu ai le feau o le faaolataga i le lalolagi. E le o teena i lenei faitauga le taapenapena lelei o fuafuaga nei; ae o le popolega, o le faamoemoe tele lea o le au faatuatua i polokalama ma auala eseese ua fuafuaina e faauma ai le galuega a le Atua. Uso e, e leai. E le o mea nei e faaumaina le galuega. O failauga maoae, o koneseti o musika malie, pe o polokalama e faaalu i satellite e uma ai le galuega. O le Agaga Paia e faaumaina le galuega, le Agaga o le Atua e ala atu i alii ma tamaitai ua faatumuina ma ua maua le papatisoga a le Agaga Paia.

FAAMALOSIGA MA TALATALANOAGA:

1. O le a lou silafia ua mafua ai ona le i toe afio faalua mai Iesu?
2. O lea se faatusatusaga a Iesu i aso o Noa ma aso nei?
3. O le ā, pea o ai foi, e te manatu o le a faaaoga e le Atua e faaumaina lana galuega i le lalolagi?
4. O le a se mea e te faia ina ia avea ai oe ma se tasi e filifilia e le Atua e faauma lana galuega?

FAAGAIOIGA O TALOSAGA:

- Fesootai i lou soa-tatalo ma faasoa iai le mataupu faitauga o lenei aso.
- Tatalo faatasi ma lou soa-tatalo

40-ASO O TALOSAGA MA ANAPOGI

1. Mo le Atua ina ia fesoasoani mai pea ia te oulua ina ia faatasia lua agaga i le manatu e tasi o le manaomia lea o le savavali faatasi ma Iesu ma le Agaga Paia
2. Mo le Atua ina ia molimau e ui atu ia te oulua i le Agaga, e pei foi ona ia faia ia Noa
3. Mo i latou i lisi tatalo.

TUSI IA FAAAOGĀ I TALOSAGA:

“Ia e taitaiina atu a’u i le ala o au poloaiga; auā ou te fiafia lava i ai.” Salamo 119: 35

12/28/11



40-ASO O TALOSAGA MA ANAPOGI

ASO 19: O LE MANAOMIA O LE PAPATISOGA A LE AGAGA PAIA I LE MOLIMAU ATU.

O le manaomia tele o le papatisoga a le Agaga Paia mo le molimau atu o loo manino mai lava lea i le Feagaiga Fou. Tatou te iloa lea i le olaga o Iesu, e pei ona molimau Luka i le fetalaiga a Iesu: “Ua i o’u luga le Agaga o le Alii, auā ua na faau’u ai ia te a’u e folafola le tala lelei i ē matitiva; ua auina mai a’u e ia e faamalolō i ē loto momomo, e tala’i le saolotoga i le tafeaga, ma ia pupula mata o ē tauaso, e tuu sa’oloto i ē ua faasauaina, e tala’i le tausaga e finagalo malie mai ai le Alii.” (Luka 4: 18, 19) “O Iesu o le Nasareta, o lē na faauuina e le Atua i le Agaga Paia ma le mana, o ia sa femaliuai ma agalelei ma faamalolō atu i ē ua faatoilaloina lava e le tiapolo; auā sa ia te ia le Atua” (Galuega 10: 38)

Na silafia e Iesu le taūa o le galuega e faia a o faatumulia o ia i le Agaga Paia. O le mafuaaga lena na fetalai atu ai i ona soo ina ia faatali mo le folafolaga o le papatisoga a le Agaga Paia ae le’i o atu e folafola le tala o le faaolataga (Galuega 1: 4, 5). Na fetalai atu foi Iesu o le a latou maua le malosiaga e molimau atu ai pe a latou maua le papatisoga a le Agaga Paia (faiupu 8). Na faia e le au soo le mea na faatonuina ai latou e Iesu. Sa latou faatali ma loto gatasi i talosaga mo le folafolaga o le papatisoga a le Agaga Paia (faiupu 14). O le tali iā latou talosaga mo aso e 10, na alu ifo le Agaga Paia i le aso o le Penetekoso ma e na faatumuina ai i latou i lea aso i le papatisoga a le Agaga Paia e pei ona folafola mai ia te i latou.

O le mea na tupu na sosoo ane ai sa faaalia ai le mafuaaga taūa lava i le papatisoga a le Agaga Paia. Na faaaogaina e le Atua i latou nei ua faatumulia i le Agaga Paia e tala’i atu le matagofie o le Atua (faiupu 7-11). Na faagaganaina foi e le Atua i latou ia ave ai i lalo pa o le eseese o gagana ina ia latou molimau atu i le Faaola manumalo i le au Iutaia sa iai i lenā aso. E tolu afe i latou na faatumulia i le Agaga i lena aso i le lauga a Peteru, le soo na papatisoina e le Agaga Paia, ma na amata ai lava le tuputupu o le ekalesia (faiupu 47).

Na iloa e uluai Kerisiano le manaomia o le papatisoga a le Agaga Paia i na ia latou ola le soifuaga faale Atua ma molimau atu ai mo le Alii. O le papatisoga a le Agaga sa faataūaina lava, auā ina ua talia Iesu o le Faaola e alii ma tamaitai Samaria, ma papatisoina latou i le vai i le galuega a le soo o Filipi, na auina ane loa Peteru ma Ioane ia feiloai ma i latou, faaee o la lima i ō latou luga, ma tatalo mo le papatisoga a le Agaga Paia. (Galuega 8: 12-17)

Tatou te molimauina foi le taūa o lenei mea i le valaauiina o Saulo i le auala i Tamaseko, ina ua faaali Keriso ia Saulo i le faaaliga: “Ua alu atu o ia ua latalata i Tamaseko, ona faafuasei mai ai lea ona pupula faataaliolio mai ia te ia o le malamalama mai le lagi. Ona pa’ū lea o ia i lalo i le eleele, ua faalogo atu i le siufofoga, o loo faapea mai ia te ia, “Saulo, Saulo e, se a le mea ua e sauā mai ai ia te a’u?” Ona fai atu lea o ia, “Le Alii e, o ai ea oe?” Ona fetalai mai lea o le Alii, “O a’u o Iesu ua e sauā mai iai; o le mea faigata ia te oe ona e aa i tui.” Ua gatete ia, ma ua mata’u ua faapea atu, “Le Alii e, se a le mea e te finagalo ai ou te faia?” Ona fetalai mai lea o le Alii ia te ia, “Tu ia oe i luga, ina alu ia i le aai, ona ta’uina atu lea ia te oe o le mea e tusa ona e

40-ASO O TALOSAGA MA ANAPOGI

faia.” A ua tutū tagata na o malaga ma ia, ua le mafeganavai; ua lagona lava e i latou le siufofoga, a e le iloa atu se tasi. Ua tu i luga Saulo nai le eleele; ua pupula ona mata a ua le iloa se tasi; ua fetagofi i latou i ona lima, ua taitai ia te ia i Tamaseko. Ua tolu foi aso e le o vaai ai o ia, ua le ‘ai, e lei inu.”

“Sa i Tamaseko le tasi soo, o Anania le igoa; ua fetalai mai foi le Alii ia te ia i le faaaliga, “Anania e, ina tu ia i luga, ina alu i le ala o lona igoa o Sa’o, inā saili le tagata i le fale o Iuta, o Saulo le igoa, o le Taso; auā faauta mai, o loo tatalo ia; ua na iloa atu foi i le faaaliga le tagata, o Anania le igoa, o loo ulufale atu, ma faaee lona lima i ona luga, ina ia toe vaai o ia.” Ona tali atu lea o Anania, “Le Alii e, ua ou faalogo i tagata e toatele i lena tagata, i mea leaga e tele ua na faia i ou tagata paia i Ierusalem; e ana foi le pule mai le au ositaulaga sili, e fusifusi uma lava i e ua valaau i lou suafa iinei.”

Na faasinoina e Iesu Anania e alu ma faaee ona lima ina ia pupula ai mata o Saulo, ma ia papatisoina o ia e le Agaga Paia. “Ona alu lea o Anania, ua ulu atu i le fale, ua na faaee atu foi ona lima i luga ia te ia, ua faapea atu, “Lo’u uso e Saulo, ua auina mai a’u e le Alii o Iesu, sa faaali ia te oe i le ala na e sau ai, ina ia e toe vaai, ma ia faatumuina oe i le Agaga Paia.” Ona pau’ū loa lea o mea nai ona mata peiseai ni una; ona toe vaai loa lea o ia, ua tu foi i luga, ma ua papatisoina (faiupu 17, 18). Ona o le faatumulia o Saulo i le Agaga paia, “ua atili ai le faamalosi o Saulo.” (Fuaiupu 22). O le upu “faamalosi” e lē na o se malosi o le tino; o le malosiaga lea e tautalaina i lenei aso ia Saulo, o le malosi faaleagaga ma le malosiaga e tala’i atu ai le tala lelei. O lenei malosiaga e molimau atu ai na maua mai i le papatisoga a le Agaga Paia ina ua tatalo Anania mo Saulo.

FAAMALOSIGA MA TALATALANOAGA:

1. O le a le taimi na maua ai le malosiaga e Iesu e faia ai lana galuega? Ma e faapefea se faamatalaga a le Tusi Paia i le galuega a Iesu ina ua faatumulia o ia i le Agaga Paia?
2. O le a le mea na fai atu ai Iesu e faia e le au soo ae le’i amata ona o atu e talai?
3. O a ni faamanuiaga na maua e le uluai ekalesia ina ua latou maua le papatisoga a le Agaga Paia?

FAAGAIOIGA O TALOSAGA:

- Faafesootai lou soa-tatalo ma faasoa iai le faitauga o lenei aso ma ia
- Tatalo faatasi ma lou soa-tatalo
 1. Mo le Atua ina ia faatumuina pe oulua i le Agaga Paia
 2. Mo le Atua ia molimau atu e ala atu ia te oulua i le malosi o le Agaga Paia e pei ona ia faia i le ekalesia muamua
 3. Mo i latou i lisi tatalo.

40-ASO O TALOSAGA MA ANAPOGI

TUSI E FAAAOGAINA I TALOSAGA:

“Ua pipii atu lo’u ola i le efuefu; ia e faaolaola mai ia te a’u e tusa ma lau afioga.” Salamo 119: 25

O SE TOE TATALO:

Ua taumamao i matou mai le tulaga e tatau ona matou iai i le itu faaleagaga. Toe faafouina o matou ola faaleagaga e pei ona e folafola mai. Aumai ia te i matou le malosi matou te molimau atu ai mo oe. 1/2/12

✓ 12/27/11



40-ASO O TALOSAGA MA ANAPOGI

ASO 20: PAPATISOGA A LE AGAGA MA LE TAPENAGA O LE AUALA O LE TOE AFIO MAI O KERISO

Na valoia mai e le perofeta o Malaki le auina mai e le Atua o Elia, e ui mai i le “feau faa-Elia”, a’o lumanai le toe afio mai o Iesu Keriso. “Faauta, ou te auina atu ia te outou o Elia le perofeta, a o lei oo mai le aso o le Alii e sili, ma le matautia.” (Malaki 4: 5) E lua faatinoga o lenei valoaga. O le tasi, o le afio muamua mai lea o le Mesia; o lona lua, o lona toe afio faalua mai lea.

O le evagalia a Luka o loo faamatalaina le galuega a Ioane le Papatiso, o le faataunuuga lea o le valoaga muamua: “E muamua atu foi o ia i ona luma ma le agaga ma le malosi o Elia.” (Luka 1: 17) Na muamua mai le galuega a Ioane le Papatiso ma le agaga ma le malosi o Elia. O le a la le mea e faasino tonu i ai lenei faamatalaga? O long uiga, na faatumulia o ia i le Agaga ma na ia lauga atu le feau o le Agaga ina ia sauni tagata uma o ia aso mo le afio mai o le Mesia, “aia e sili o ia i luma o le Alii; e le inu o ia i le uaina po o le ‘ava malosi; e faatumuina foi o ia i le Agaga Paia, e afua i lona fanau mai.” (Luka 1: 15) Na faatasia lauga a Ioane le Papatiso ma le Agaga Paia. Toatele na faalologo iai, ma e toatele foi i latou na papatisoina. “O ona po ia na sau ai Ioane le Papatiso, ua talai atu i le vao o Iutaia, ua faapea atu, “Ina salamo ia outou; auā ua latalata mai le malō o le lagi.” Auā o ia lava lenei na fai mai ai le perofeta o Isaia, ua faapea mai, O le leo o lē ua alaga i le vao, inā teuteu ia outou le ala o le Alii, ia faasasa’o ona ala. A o Ioane ia, sa ofu i le fulufulu kamela, ma le fusi pa’u i lona sulugatiti; a o ana mea e ai, o sē akerise ma le meli vao ia. Ona o atu ai lea ia te ia o Ieruselema, ma Iutaia uma, atoa ma le itu uma o Ioritana; ua papatisoina foi i latou i Ioritana e ia, ua ta’u atu e i latou a latou agasala.” (Mataio 3: 1-6)

Na silafia lelei lava e Keriso le valoaga a le perofeta o Malaki ma na ia faaaoga lea e molimauina ai le galuega a Ioane le Papatiso. “Auā ua vavalo mai le au perofeta uma ma le tulafono, ua oo lava iā Ioane. Afai foi tou te loto ina talia, o Elia lava lea na tuu e sau. O le ua i ai taliga e faalogo ai, ina faalogo mai ia o ia.” (Mataio 11: 13-15)

O le valoaga a Malaki e aafia ai le lapataiga mo le au faatuatua i le taimi a’o lumanai le toe afio faalua mai o Keriso, ua ta’ua o le fe’au a agelu e toatolu (Faaaliga 14: 6-12). O le feau lenei o aso mulimuli a Elia e mo le saunia o alii ma tamaitai mo le toe afio mai o Keriso. E pei ona manaomia Ioane le Papatiso ia ave atu lana fe’au ma le faatumulia o ia i le Agaga Paia, o le au faatuatua foi i aso nei e matuā tataui foi ona faatumulia i latou i le Agaga Paia a o talaiina le feau faa-Elia i nei ona po. E mafai ona alu foi la lea feau ma le malosi tele auā o loo ave e le au faatuatua ua faatumulia i le Agaga Paia, pei lava ona iai ia Ioane le Papatiso.

Aisea ua lē avea ai lenei feau o le toe afio mai ma le malosiaga e tataui ai? Ua tau 150 tausaga o laugaina lenei feau. Faitau miliona ma miliona talā ua faaaluina ma o loo fuafuaina pea mo le talaiina o lenei lava feau. Ae o le ā se faaletonu o iai e foliga ua faatuai ai le toe afio mai o Keriso? E iai le talitonuga o le tatou le malamalama ma le lē maua o le papatisoga a le Agaga Paia ua mafua ai le faatuai o le Toe Afio Mai. O lona uiga e lē o faamanuia mai le Atua i

40-ASO O TALOSAGA MA ANAPOGI

galuega o fai nei i le talaiina o le feau o le toe Afio mai. O le faatuai, ona tatou te lē o aapa ma ōlega faatauana, le tagata taitoatasi, mo le faamanuiaga ma le malosiaga o loo fia liligiina mai e le Atua i ona tagata e ala mai i le papatisoga a le Agaga Paia. A tupu lea mea, o le a faataalise loa ona alu le feau faa-Elia i le agaga ma le malosi o Elia.

FAAMALOSIGA MA FAATALATALANOAGA:

1. O a faatinoga se lua o valoaga a le perofeta o Malaki e faatatau i le feau faa-Elia?
2. O le a le feau faa-Elia mo aso nei?
3. O le a le mea e manaomia e tupu i le faaleagaga ina ia faataunuuina ai le faalua o le feau faa-Elia?
4. O le a se mea o le a tupu i le feau mulimuli a le Atua pe a aveina ma le “agaga ma le malosiaga” faa-Elia?

FAAGAIOIGA O TALOSAGA:

- Faafesootai lou soa-tatalo ma faasoa iai le feau faitau o lenei aso.
- Ia lua tatalo faatasi ma lou soa-tatalo
 1. Mo le agaga o le Atua ina ia faauuina oulua
 2. Mo le Atua ina ia taitaiina ona tagata ma lana Ekalesia ia avea o nisi e faatumuina i le Agaga Paia
 3. Mo i latou Ia oulua lisi tatalo.

TUSI IA AOFIA I TALOSAGA:

“Ia e faauai atu lo’u loto i au tulafono, a e aua ne’i i le matapeapea.” Salamo 119: 36

O SE TOE TATALO:

“Ia tosina a’u ia ou mana’o pea i au fautuaga ma liliu ese a’u mai le mana’o i tupe ma tulaga siitia o lenei olaga. Faatumu a’u i lou agaga ina ia ou malosi ai e pei o Elia.”

1/2/12



40-ASO O TALOSAGA MA ANAPOGI

ASO 21: O LE FAAFITAULI A LE EKALESIA I LAOTIKAIA

Ua tuuina mai e le Atua le tala faasolopito o le ekalesia Kerisiano i le tusi o Faaaliga. Faaaliga 2 ma le 3 ua faamatala mai ai taimi o ekalesia e fitu ma tala faasolopito e feagai ma ekalesia e fitu i Asia. E faatatau foi i vaega taimi o ekalesia e fitu, e amata mai i ona po o le au aposetolo e oo mai i ona po nei.

O le ekalesia lona fitu ua faamatala mai i le Faaaliga 3:14-21:

“Ia e tusi foi i le agelu a le ekalesia o i Laotikaia: o mea nei ua fai mai ai le Amene, o le Molimau moni ma le faamaoni, o le amataga o mea na faia e le Atua. Ua ou iloa au galuega, e te lē maalili, e te lē vevela fo’i, Ou te loto ina ia e maalili, pe vevela. O lenei, ua e faaleogalua, e te lē maalili, e te le vevela foi, o le mea lea ou te luai atu ai ia te oe i lo’u gutu. Auā ua e fai mai, Ou te se mauoa, ua faaatamaoagaina a’u, ou te lē mativa foi i se mea e tasi; a ua e le iloa o oe o le malaia, ma le pagatia, ma le mativa, ma le tauaso, ma le lē lavalavā. Ou te fai atu ai ia te oe, ina ia e faatau atu ia te a’u o le auro ua faamamaina i le afi, ina ia e tamaoiga ai; ma ofu sisina ina ia e ofu ai, ina ne’i iloa le mā o lou lē lavalavā; ma le vaimata e nini a’i ou mata, ina ia e pupula ai. Ou te aoai atu ma sasa ia i latou uma ou te alofa i ai; o lenei, ia e vilivilita’i, ma ia e salamō. Faautea, ou te tu atu i le puipui ma tu’iutu’i atu; ai se tasi e faalogo mai i lo’u leo, ma tatata mai le puipui, ou te ulufale atu ia te ia, ma te talisua foi ma ia, o ia foi ma a’u. O lē manumalo ou te avatua ia te ia ma te nofofo faatasi ma a’u i lo’u nofoalii, e pei o a’u foi ona ou manumalo, ua ma nonofo foi faatasi ma lo’u Tama i lona nofoalii.”

O le vaegā taimi lenei o le ekalesia ua ta’ua o Laotikaia. O le aai o Laotikaia na lauiloa ma ta’uta’ua ona o vai vevela ma vai malulu sa faaaogaina mo ta’elega e le gata e aoga i le togafiti ai o gasegase ae maise foi o le fiafia o tagata e faamalū ai ona e lelei i le faalogo. O nei ona po ua malamalama ma faamaonia e tagata su’esu’e le aoga tele o lona ituaiga togafiti, a e ua maoa’e i le faamalamalamaina o lenei fuaiupu 16 le tulaga faaleogalua o le ekalesia i ona po nei, ua le malulu pe vevela. Ua faailoa mai le lē fiafia o le Atua, ua matuā faailoa ai pe afai e tumau pea i le tulaga faaleogalua, o le a ia luai atu o ia i lona fofoga.

Aiseā e faigata ai le tulaga faaleogalua i le silafaga a le Atua? O le tali e vaaia lea i Lona naunau i le ekalesia. Ua finagalo le Atua i le ekalesia ia vevela pe maalili; e manaomia ia avea e pei o se togafiti, se fofō i lenei lalolagi. Ia tatou iloa, o le ekalesia faaleogalua e leai se aogā; e leai se aogā e maua e tagata latou te fesoota’i atu iai. E finagalo le Atua ia avatua le ola i soo se mea e alu iai. Ua uiga tutusa foi ma le fetalaiga a Iesu o tatou o le “masima o le lalolagi”.

“O outou o le masima o le lalolagi outou; a e afai e magalo le masima, pe se a se mea e faamāi ai? E leai se mea e toe aogā ai, na ona lafoaiina i fafo, ma solia e tagata” (Mataio 5:13).

O le masima, pe a faaaoga i togafiti ma fofo e faia i le vai vevela ma le vai malulū e aogā ia. Ua fetalai mai Iesu i le Faaaliga o ē tumau i le faaleogalua o le a ia luai atu i lona fofoga. I le

40-ASO O TALOSAGA MA ANAPOGI

Mataio ua ta'ua ai afai e magalo le masima e lafoaiina i fafo. O loo tutusa lava fetalai a Iesu i le Faaaliga ma le Mataio. Afai e leai se aoga i le Atua ma Lana galuega o le a lafoaiina e Ia.

Ua faailoa mai e Iesu le tafe atu o le ola mai lana ekalesia (Ioane 7:38, 39). “O sē faatuatua ia te a'u, e faapei ona fai mai o le Tusi, e tafe mai o vaitafe mai totonu ia te ia, o le vai ola lava.” Ua fetalai atu o ia lena upu i le Agaga, e maua e i latou ua faatuatua ia te ia; auā o ona po ia e le'i maua ai le Agaga Paia, auā e lei oo Iesu i lona mamalu. E ala i le papatisoga a le Agaga Paia e tafe atu le ola mai le ekalesia.

Ua tatou iloa manino foi le lapataiga faanatinati i Kerisiano Laotikaia e matuā taūa. Ua tataua ona tatou ala mai lo tatou tulaga pagatia, ma faatagaina le Atua ia suia i tatou mai le pei o se togafiti poo se fofo lē aoga i se togafiti poo se fofo aogā pe afai e tatou te sauni e feataia'i ma Iesu pe a afio mai o Ia. O le upu moni e faanoanoa ai ona o Kerisiano Laotikaia latou te lē o iloa le tulaga mata'utia faaleagaga o loo iai:”Auā ua e fai mai, Ou te se mauoa, ua faatamaoagaina a'u, ou te lē mativa foi i se mea e tasi, a ua e le iloa o oe o le malaia, ma le pagatia, ma le mativa, ma le tauaso, ma le lē lavalavā.

MAFAUFAUGA MA TALATALANOAGA:

- O le a le uiga o le Tusi Paia pe a fetalai mai le Atua o le ekalesia i aso nei ua faaleogalua?
- Ai se a e finagalo ai le Atua ia vevela pe maalili?
- O le a le mea e tupu i sē e le suia mai le tulaga faaleogalua?
- O le a lou manatu i ni uiga vaaia o se faapotopotoga/mafutaga ua faaleogalua?
- O le a lou manatu i ni uiga vaaia e te iloa ai o oe le Kerisiano faaleogalua?

FAAGAOIOIGA O TALOSAGA:

Valaau lou soa-tatalo ma talatalanoa i le faitauga o lenei aso.

Tatalo ma lou soa-tatalo:

- ✓ Ia faaauau e le Atua ona papatiso taitoatasi oulua e Lona Agaga Paia.
- ✓ Ia aumaia e le Atua Lana ekalesia mai le tulaga faaleogalua o Laotikaia.
- ✓ Tatalo mo e o loo I lau lisi tatalo.

IA AOFIA LE MAU LEA MAI LE TUSI PAIA I LAU TATALO

“Ia e liuliu alo mai ia te a'u, ma alofa mai ia te a'u; auā o a'u ou te toatasi ma puapuagaina. Ua faateleina puapuaga o lo'u loto; ia e aveeseina a'u i mea ou te tigā ai. Ia e silasila mai i lo'u puapuaga ma lo'u tigā; ma ia e faamagaloina a'u agasala uma lava” (Salamo 25:16-18).

O SE TOE TALOSAGA PU'UPU'U: Ia e alofa mai auā ua matou pagatia ma mafatia faaleagaga. Faamagalo mai a matou agasala ma aumai i matou mai le tulaga o Laotikaia.

40-ASO O TALOSAGA MA ANAPOGI

ASO 22: O LE TALI I LE TULAGA O LE EKALESIA LAOTIKAIA

O le fesili taūa mo le ekalesia i le asō—Pe faapefea ona suia le togafitiga/fofō le aogā i le togafitiga/fofō aogā? O le feau mai le Atua i Laotikaia ua tatou maua ai le tali. Ua fetalai mai Iesu o loo ia tū i le puipui ma ua ia mana’o ia ulufale i ō tatou olaga.

“Faauta ou te tu atu i le puipui ma tu’itu’i atu, ai sē tasi e faalogo mai i lo’u leo ma tatala mai le puipui, ou te ulufale atu ia te ia; ma te talisua foi ma ia, o ia foi ma a’u” (Faaaliga 3:20).

E faapefea ona faaulufale mai o Ia i totonu? E ala i le papatisoga a le Agaga Paia.

“Ou te fai atu foi i le Tamā, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau; o le Agaga lea e tupu mai ai le upu moni, e le mafai e le lalolagi ona talia o ia, auā ua le vaaia o ia, ua le iloa foi ia; a o outou, ua outou iloa o ia, auā e tumau pea ia ia te outou, e iai foi o ia i totonu ia te outou. Ou te lē tuua outou o matuaoti, ou te sau ia te outou” (Ioane 14:16-18).

I nei fuaiupu ua ta’u atu ai e Iesu i le au soo e sau o ia ia te i latou pe a afio mai le Agaga Paia e faatasi ma i latou. Na tupu lena mea i le aso Penetekoso. E ala i le papatisoga a le Agaga Paia le afio o Iesu i le tagata talitonu: “O le tasi foi o ana poloaiga, o loo tumau lea i totonu ia te ia; o le mea foi lenei ua tatou iloa ai o loo tumau o ia i totonu ia i tatou, auā o le Agaga ua ia foaiina mai ia te i tatou” (1Ioane 3:24).

O le a le mea e faia e le papatisoga a le Agaga Paia mo le Kerisiano faaleogalua? O le faatumuina i le Agaga o le Atua e aumaia le faafouga i lē na te taliaina, auā o le faafouga ona pau lena o le tali i le faafitauli a Laotikaia. Na’o le faafouga e mafai ai e le ekalesia ona avea o le togafitiga ma fofō i le lalolagi. Na o le faafouga e mafai ai e le ekalesia ona ausia le tulaga faaleagaga e mafai ai e le Atua ona faaaogaina o ia o se auala malosi e laveaiina ai ali’i ma tama’ita’i mai le pule a le pouliuli.

Na iloa foi e Elena Uaita le taūa tele ma le faanatinati o le faafouga ina ua ia tusia e faapea: “O le faafouga o le amio atua faamaoni i totonu ia te i tatou o le manaoga aupito sili ma e faasilisili ona taūa nai isi mana’oga uma. O le sailia o le tulaga lena o la tatou galuega muamua” (Feau Filifilia, tusi 2, Itulau 121). Na ia malamalama foi i le va feagai o le maua o le papatisoga a le Agaga Paia ma le faafouga:

“O le papatisoga a le Agaga Paia pei o le aso Penetekoso e taita’i ai i le faafouga o le tapuaiga moni ma le faatinoina o galuega ofoofogia” (Feau Filifilia, tusi 2, Itulau 57).

O le papatisoga a le agaga Paia na te tuuina atu i le Kerisiano Laotikaia le malosi e manaomia e toe faaolaola ai le itū faaleagaga, ma le malosi e molimau ai. Na silafia lelei e Iesu le taūa tele o le mea e tupu pe a afio ifo le Agaga Paia ma liligi mai e pei o le malosi o le ūaga muamua i le aso Penetekoso. Na ia fetalai mai faapea: “Ua ou sau e lafo le afi i le lalolagi; se a

40-ASO O TALOSAGA MA ANAPOGI

se mea ou te toe manao iai, pe ana mu nei lava?” (Luka 12:49). O le ā le afi o loo tautalagia e Iesu? O le afi o le Agaga Paia:

“Ua tali atu Ioane ia te i latou uma, ua faapea atu, o a’u nei le papatiso atu ia te outou i le vai, a o lē maliu mai, e silisili o ia ia te a’u, e lē aoga a’u ona tatala le nonoa o ona seevae, o ia lava na te papatiso atu ia te outou i le Agaga Paia ma le afi” (Luka 3:16).

E faapefea ona maua le papatisoga a le Agaga Paia ma lagona ai le faafouina? O le auala e tasi e sau ai le tagata o le talitonu—tatalo ma ta’uta’u folafolaga a le Atua. O le papatisoga a le Agaga Paia na maua e le ulua’i ekalesia i le aso Penetekoso o le iuga o lo latou tatalo ma le loto gatasi i aso e 10 ma ta’uta’u i folafolaga a le Atua. “Sa faapotopoto foi o i latou ma ia, ona fetalai atu lea o ia ia te i latou, ia lē tu’ua Ierusalema, a ia faatali i le mea na folafolaina e le Tamā, ua outou faalogo ai ia te a’u. Auā na papatiso lava Ioane i le vai, a o outou, e papatisoina outou i le Agaga Paia e le tele ni aso e va a’i. A e maua e outou le mana, pe a afio ifo le Agaga Paia i luga ia te outou; e fai foi outou ma molimau ia te a’u i Ierusalema ma Iutaia uma lava, ma Samaria, e oo lava i le tuluiga o le lalolagi. Ua finafinau pea i latou nei uma lava ma le loto gatasi i le tatalo ma le aoi, atoa ma fafine, ma Maria le tina o Iesu, atoa foi ma ona uso” (Galuega 1:4,5,8,14).

Na faamausalī foi Elena Uaita e faapea: “O le faafouga manaomia e faamoemoe iai o le tali lea i talosaga” (Feau Filifilia, Tusi 1, itulau 121). O Kerisiano uma i aso nei e manaomia le tatalo i le tatalo a Tavita: “E te le toe faaolaola mai ea ia te i matou; ina ia fiafia lou nuu ia te oe?” (Salamo 85:6)

MAFAUFAUGA MA TALATALANOAGA:

- O le a le fofō mo le faafitauli a Laotikaia?
- O le a le manaoga aupito sili ona taūa i le ekalesia ua ta’u mai e Elena Uaita?
- O ā mea e lua ua tatau ona faia e le ekalesia ina ia maua ai le faafouga moni?
- Na faapefea ona maua e le au soo le mana faafolaola o le Agaga Paia?
- O le a sou manatu i se mea vaaia i le olaga o le ekalesia Kerisiano ua faatumuina ma faafouina e le Agaga Paia?

FAAGAOIOIGA O TALOSAGA:

- Valaau lou soa-tatalo ma talatalanoa fasoa iai lenei faitauga.
- Tatalo ma lou soa tatalo:
 - ✓ Ia faaauau e le Atua ona papatisoina taitoatasi oulua e Lona Agaga Paia.
 - ✓ Tatalo mo i latou o loo i lau lisi tatalo.

IA E AOFIA LE MAU LEA MAI LE TUSI PAIA I LAU TATALO: “E te le toe faaolaola mai ea ia te i matou; ina ia fiafia lava lou nuu ia te oe?” (Salamo 85:6).

1/2/12

40-ASO O TALOSAGA MA ANAPOGI

ASO 23: TATALO MA LE TALAIGA O LE TALA LELEI

Ua a'oa'o mai e le Afioga a le Atua e manaomia e tagata taitoatasi ma le ekalesia ona maua le faafouga: “E te lē toe faaolaola mai ea ia te i matou; ina ia fiafia lou nuu ia te oe?” (Salamo 85:6). O le tatalo e manaomia ma e tataua ona maua e mafai ai ona faatoilaloina Satani ma ana 'au ae faaolaina ai ē ua le iloa: “Auā o auupega a lo matou nei taua e le faaletino ia, a e faamalolosia e le Atua e lepetia ai 'olo; o loo lepeti i lalo masalosologa, ma mea maua luga uma ua faasiasia i le mataupu a le Atua, o loo faato'ilaloina manatu uma ia anaana ia Keriso” (2 Korinito 10:4, 5).

E manaomia le tatalo e le Kerisiano ina ia tumau lona malosi i le Alii: “Ia outou tatalo i le Agaga i aso uma lava i talotaloga ma faatoga uma; ia outou mataala pea i lenei lava mea, ma matuā tausisi i le faatoga mo tagata paia uma lava” (Efeso 6:18). O se mea ou te maofa ai ona o le tatalo e pei e foliga mai e leai se mana ma e leai sona uiga i le tagata ma lona natura ae manaomia tele ma e iai le mana i le tagata faaleagaga. Aiseā e taūa ai ma manaomia le tatalo i le galuega a le Atua?

O i latou e iloa o i fafo atu ma Keriso o loo latou ola i lalo o le pule a Satani ma o i latou e mata'utia le tulaga ua i ai. Ua afaina lo latou iuga e faavavau pe afai e le suia i latou. Peitai, e leai so latou malosi e suia ai i latou lava. O loo faamatala mai e Paulo o latou mafaufau ua faatauasoina e Satani: “Afai foi ua ufitia la matou tala lelei, ua ufitia ia i ē ua fano; ua faatauasoina manatu o ē lē talitonu e le atua o le lalolagi nei, ina ne'i pupula atu ia te'i latou le malamalama o le tala lelei i le mamalu o Keriso, ua tusa o ia ma le Atua” (2 Korinito 4:3, 4). O ē ua le iloa ua tauaso i le tala lelei, ua tauaso auā ua ufitia mai la latou vaai. O le upu “ufitia” ua faaliliu mai le upu Eleni “kalupsis”, ufiufi mata.”

O le ki i le faaolaina o ē ua le iloa o le aveesea lea o le ufiufi mata ua faatauasoina ai i latou. Afai e faapoopo le fasi upu lea o le “apo” i le upu Eleni o le ufiufi mata ua avea loa ma upu lea o le “faaaliga” pe o le aveesea o le ufiufi mata. O le mea lea e manaomia ai e i latou ua le iloa le faaaliga o le upu moni a le Atua. E le manaomia e i latou nisi faamatalaga—e manaomia le aveesea o le ufiufi mata ina ia latou malamalama ma latou “vaai i le moni o le tala lelei”. O le fesili taua ua tula'i mai: Pe faapefea ona tupu lena mea o le aveeseina o le ufiufi mata i olaga o ē ua lē iloa?

O le tatalo faapuluvaga, po o le ōlega faatauana, o le a aveesea ai mai le mafaufau o le tagata lē talitonu le ufiufi mata lea na mafua ai le tauaso faaleagaga. O Satani na te faatupu fua i le mafaufau o manatu sesē, o mafaufauga ua mausali i lē ua le fia iloa. Ae o le tala lelei a le Atua ua ia tuuina i le Kerisiano le pule e faatoilalo ai 'olo a Satani ae ia anaana ia Keriso” (2 Korinito 10:4, 5). O fuaiupu nei e lua e matuā taūa tele i le faamalamalamaina o le tatalo faapuluvaga mo ē ua lē iloa. O loo faamanino mai foi e Elena Uaita le manaomia o lenei ituaiga tatalo a o tatou galulue mo agaga, auā ona pau lenā o le auala e mafai ai ona pa'i atu i loto o

40-ASO O TALOSAGA MA ANAPOGI

tagata. E le o se tatou galuega, a o le galuega a Keriso o lē o loo i o tatou autafa, o Ia na te tosina loto” (Talaiga, itulau 341).

O le tusi e taua “O le Ekalesia Tatalo” o loo faamatala mai ai le finagalo o le Atua mo ē e le’i faaolaina. Talu ai o i tatou e talitonu ia Keriso e iai lo tatou avanoa e tuuina atu ai talosaga i luma o le nofoalii o le alofa tunoa mo ē ua leiloa:

IA AOFIA I LAU TATALO:

*Ia tosina i latou ia te Ia: “E le mafai e sē tasi ona sau ia te A’u, pe a le tosina mai e le Tamā ua auina mai a’u; ou te toe faatuina foi o ia i le aso gataaga” (Ioane 6: 44).

*Ia latou saili ia iloa le Atua: “Ina ia latou saili i le Alii, pe mafai ona latou tautagotago ma latou iloa o ia; a e peitai e lē mamao o Ia ma tatou taitoatasi” (Galuega 17: 27).

Ia latou talitonu i le Afioga a le Atua: “O le mea lea matou te faafetai ai i le Atua, o i matou lava e le aunoa, auā na talia e outou le afioga a le Atua na outou faalogo mai ai ia i matou, ua lē talia e outou le afioga a le Atua, na outou faalogo i upu a tagata, a e peitai o le upu a le Atua, (e moni lava lea) ua matuā galue foi lea i totonu ia te outou o ē faatuatua” (1Tesalonias 2: 13)

*Ia saisaitia Satani ia aua ne’i faatauasoina i latou i le upu moni ae ia faatoilaloina o ia ina ia aua ne’i manumalo ia te i latou. (2Korinito 4: 4; 10 :4, 5, siitia i luga).

*Ia galue le Agaga Paia ia te i latou: “A maliu mai foi o ia, na te faailoa atu i le lalolagi le agasala, ma le amiotonu, ma le faamasinoga. O lē agasala, auā ua le faatuatua mai ia te A’u; o le amiotonu, auā ou te alu atu i lo’u Tamā, tou te le toe vaai mai foi ia te A’u; o le faamasinoga, auā ua faamasinoina le alii o le lalolagi nei. Ua totoe ia te A’u mea e tele e fai atu ai ia te outou, a e tou te le mafaia ona talia i nei ona pō. A e a maliu mai o ia, o le Agaga lea e tupu mai ai le upu moni, e ta’ita’i e ia ia te outou i upu moni uma; auā e lē tautala fua ia na o ia, a o mea uma e faalogo i ai o ia, e tautala a’i lava, ma faailoa mai ia te outou mea e oo mai” (Ioane 16:8-13).

Ua faailoa mai e Iesu le tafe atu o le ola mai lana ekalesia (Ioane 7: 38, 39). “O sē faatuatua ia te au, e faapei ona fai mai o le Tusi, e tafe mai o vaitafe mai totonu ia te ia, o le vai ola lava.” Ua fetalai atu o ia lena upu i le Agaga, e maua e i latou ua faatuatua ia te ia; auā o ona po ia e lei maua ai le Agaga Paia, auā e le’i oo Iesu i lona mamalu. E ala i le papatisoga a le Agaga Paia e tafe atu ai le ola mai le ekalesia.

MAFAUFAUGA MA TALATALANOAGA:

- 1) O le a se fautuaga mai a le tamaita’i perofeta o Elena Uaita e faatatau i le tatalo mo e ua leiloa?
- 2) O le a se mea e faia e a tatou talosaga mo i latou o loo tatou molimau atu iai?
- 3) O le a se faatinoga e te faia mo e o loo e talosia i au talosaga, i latou o loo i lau lisi tatalo?

40-ASO O TALOSAGA MA ANAPOGI

FAAGAOIOIGA O TALOSAGA:

Valaau lou soa-tatalo ma talatalanoa faasoa iai le faitauga o lenei aso.

Tatalo ma lou soa-tatalo:

- ✓ Ia faaāuāu e le Atua ‘ona papatiso taitoatasi oulua e Lona Agaga Paia.
- ✓ Ia faafouina lou olaga faapea fo’i lau ekalesia.
- ✓ Ia avea oe o se fitafita tatalo a le Alii mo e ua leiloa.
- ✓ Tatalo mo e o loo i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ia oo mai foi ia te i matou le matagofie mai le Alii lo matou Atua; ia e faatumauiina ia te i matou le galuega a ō matou lima; o le galuega lava a ō matou lima ia e faatumauiina.” (Salamo 90: 17)

O SE TOE TALOSAGA:

Ia e alofa mai aua ua matou pagatia ma mafatia faaleagaga. Faamagalo mai a matou agasala ma aumai i matou mai le tulaga o Laotikaia.

1/2/12



40-ASO O TALOSAGA MA ANAPOGI

ASO 24: O LE AUALA TALA'IGA A KERISO

O loo faailoa manino e Elena Uaita le auala na faia e Iesu i Lana molimau atu: “Na fefiloi faatasi le Faaola ma tagata sa ia naunau ia faamanuia i ai. Na ia faailoa lona tiga alofa ia i latou, ma ia auauna i o latou mana’oga ma ia maua lo latou talitonuga. Ona ia valaauina lea o i latou, ia mulimuli mai ia te a’u.” (Ministry of Healing, p. 143).

Talu ai o le auala lea na molimau ai Keriso, afai tatou te maua le papatisoga a le Agaga Paia ma amata ona soifua Keriso i totonu ia te i tatou, o le a ia saili e faailoa lana auala o le molimau mai ia i tatou. O le a ia ta’ita’iina i tatou ina ia fefiloi ma le faapotopotoga o tatou aiga ma uo, ma le faanaunaga o o tatou loto mo lo latou lelei. O le lelei ma le manuia aupito i sili, o lo latou iloa lea o Iesu Keriso e avea ma o latou Faaola.

O le auala a Keriso o le amata lea e ia ona fesoota’i i e latalata ia te ia. E finagalo o Ia ia tatou faia foi faapena. Afai e faigata ia te oe, e manaomia lou tatalo ina ia fesoasoani mai le Alii ia te oe, ma na te faia lava! Manatua, o Iesu o loo i totonu ia te oe o loo ia faaosofiaina oe ia e faia le mea lene. A o ‘e faaauau pea ona e tuuina atu oe lava na te pulea vaega uma o lou olaga, o lau molimau atu o le a faasolo ina pei o lana auala na molimau atu ai.

A o tatou faaauau pea le tatalo mo le papatisoga a le Agaga Paia, e faateleina foi ona aliali ma tino mai i o tatou loto: “O le faamoemoe foi e le mā ai, auā ua faamaligi mai le alofa o le Atua i o tatou loto e le Agaga Paia ua foaiina mai ia te i tatou.” (Roma 5:5).

O lenei alofa o le a vaaia i la tatou auaunaga i nisi. O le a amata ona latou talitonuina e taūa i latou ma o le a faigofie foi ona faasoa mai ni mea o loo popole ai. O tagata uma e iai mea e tiga ai, o faamoemoega le taunuu, o mea e le o fiafia ai, ma faafitauli o loo latou faafeagai ai i lea aso ma lea aso. O le mafuaaga tonu lenā na ta’ita’i ai oe e Keriso ia te i latou. Na te silafia o latou manaoga, na te silafia o oe lene e iai le tali mo i latou. E finagalo Keriso ia faaalua le tali ia te i latou a e auala atu ia te oe. E finagalo ia faaalua o Ia i tagata e auala ia te oe. Na tusia e Elena Uaita e faapea: “O le fefaauoa’i faa-Kerisiano ua le o galueaiina e tagata o le Atua. Ae maise ia i latou ua latou tofo i le alofa o Keriso e ao ina faalateleina lo latou malosi fefaauoa’i, auā o le auala lene e manumalo ai agaga mo le Faaola” (Testimonies for the Church, vol. 6, p. 172). “E ala i le fesoota’i ma mafuta i tagata, e papa’i atu ai le mana lavea’i o le tala lelei” (Thoughts From the Mount of Blessing, p. 36).

E faapefea ona faaogā nei mea uma e le Kerisiano ua faatumuina i le Agaga Paia? Muamua, tatalo ia faaāuā le faatumuina o oe i le Agaga Paia ma tuuina atu ia te oe le naunau alofa mo agaga e pei ona i ai ia te Ia. Tusi se lisi o i latou o lou aiga ma uo e te iloa latou te le iloa Keriso, pe iloa foi ae e lē o iloa le taūa o le feau o le Afio faalua mai o Keriso. Amata ona e tatalo mo i latou nei i aso uma, faaogā ai ta’iala e pei ona tusia i faitauga ua te’a. Sosoo ai ma lou tatalo ia aumai e le Atua ni avanoa ia te oe ina ia mafai ai ona e fesoasoani ia te i latou. E tatau ona tatou malilie ia faaaluina le taimi ma le malosi e faalatalata ai i tagata. O la tatou sini ia

40-ASO O TALOSAGA MA ANAPOGI

faamaoni lo tatou alofa ma lo tatou fia fesoasoani ia te i latou. A iai se avanoa e te fesoota'i ai ma ē o loo e talosia, ia mataala mo le avanoa ua avatu e le Atua e te faasoa ai ma i latou.

Ia e manatua pea o le Atua ua uma ona ia saili ia tosina mafaufau ma lagona o tagata ia te Ia. O le tele o taimi Na te manaomia ia faa-avanoa i tatou ia faaaogaina e avatu ai se upu faamalosia ia te i latou. E avatu e le Atua ia te oe upu e te tautala ai. Na te silafia upu o loo manaomia e fia faalogo ai i latou ma o le mana o le Agaga Paia na te avatu upu e te tautala ai.

MAFAUFAUGA MA TALATALANOAGA:

- 1) Lisi mai mea taua o le auala a Keriso mo le molimau atu.
- 2) O le a sou manatu o le ā le mafuaaga na filifilia ai e Keriso lea auala i Lana molimau atu?
- 3) O le a le mea e tatau ona faia e Kerisiano pe afai latou te lē naunau e molimau mo Iesu?
- 4) O le a se mea faapitoa e tatau ona ōle atu ai le Kerisiano i le Atua e faatatau i le molimau atu?
- 5) O le a sau fuafuaga i le faatinoina o le auala a Keriso mo le molimau atu?

FAAGAOIOIGA O TALOSAGA:

- Valaau lou soa-tatalo mo le faasoa iai ma talatalanoa i le faitauga o lenei aso.
- Tatalo ma lou soa tatalo:
 - ✓ Ia faaauau e le Atua Lana papatisoga taitoatasi ia te oulua e Lona Agaga Paia.
 - ✓ Ia aumaia e le Atua le faafouga i lou olaga faapea Lana ekalesia.
 - ✓ Ia ta'ita'iina e le Atua oe a'o e molimau atu i nisi pei ona molimau Iesu i isi tagata.
 - ✓ Tatalo mo i latou o loo i lau lisi tatalo

IA AOFIA LE MAU LEA MAI LE TUSI PAIA I LAU TATALO:

“E faapea foi la'u upu e alu atu 'ai lo'u gutu, e lē foi fua mai ia te a'u; a e peitai e faia le mea ou te loto iai, e manuia foi i le mea ou te auina atu ai.” (Isaia 55:11).

O SE TOE TALOSAGA:

Ia faamanuia lau afioga na folafolaina ma ia faamalamalama i lenei faapotopotoga. Ia ausia le mafuaaga na ala ai ona e tuuina mai ia te i matou.

1/2/12

40-ASO O TALOSAGA MA ANAPOGI

VAEGA FA: PAPATISOGA O LE AGAGA MA LE MAFUTA ATU IA KERISO

ASO 25: O LE AUALA E FAATO'Ā MAUA AI

O le tumau ia Keriso o se tasi lea o aoaoga aupito moni i le Tusi Paia ma e mafai ona malamalama i ai le Kerisiano. O mea uma e faalagolago i le masani i le moni o le tumau ia Keriso ma Keriso e tumau i le tagata talitonu. Peita'i, o Kerisiano uma ua faato'ā maua lenei upu moni matagofie o Keriso ua soifua ia te i tatou ua mulimuli i le auala faigofie e pei o isi uso o loo malaga faatasi. Ua latou talia Keriso e avea ma Faaola ae ua mafatia i avega ma vevesi i la latou savaliga faa-Kerisiano ua le sologa lelei i le usiusita'i ma ua leai se fua i le auaunaga. Ua latou faanaunau i se savaliga faamaoni e talafeagai ma le savavali faatasi ma le Alii, a e le'i maua lava. Ua latou tauivi ma agasala e pa'ū soo ai ma e foliga mai o agasala lava e manumalo i lea taua. Latou te tatalo ma faitau le Tusi Paia, ae foliga mai lava e le o maua ai le manumalo o loo naunau i ai. Atonu ua mavae ni tausga o lenei tauiviga ua latou taunuu i le tulaga o le loto faavaivai ma le lē lavā. O lagona o le lē mafaia o se mea ua lofituina ai. O se olaga manumalo faifai pea i le agasala ua foliga mai e lē mafai ona ausia. Ona oo lea i se isi aso ua faato'ā iloa o le moni o mea lilo o le faatasiga ma Keriso—Keriso ua soifua i totonu ia te i latou. Ina ua faato'ā iloa lena tulaga, ona matuā maofa loa lea i le faigofie o lenei upu moni ofoofogia lea ua tele tausaga peiseai na 'alo ma sola ese mai lo latou iloa. Ua le toe tutusa o latou olaga talu ina ua maua lenei upu moni.

O lo latou olioli i le Alii ua loloto ma ua tumau. O ō latou olaga ua manumalo faifai pea e oo lava i agasala na pa'ū soo ai. Ua le toe lagona le mamafa o le avega pe o le popole vale i la latou auaunaga mo le Alii ma ua fua mai galuega ua faia mo le Alii.

O le upu moni i le tumau ia Keriso ma Lona tumau ia te i tatou ma e faapefea ona tatou iloaia o le olaga o le Kerisiano manumalo e faigofie lava. Peita'i, e pei e solasosla--ona toatele lea o Kerisiano ua latou lē maua atoatoa ai. O le asō o loo valaau mai ai le Atua ia tatou mauaina lenei masaniga ofoofogia ia Keriso. Aiseā? Ua lata le afio mai o Iesu. O i latou ua saunia e failoa'i ma Ia ua pei lava o Ia: “Le au pele e, o le fanau i tatou a le Atua i nei ona po a e le'i faaalua mai nei le uiga o i tatou a amulī; a ua tatou iloa, pe a faaali mai o Ia, ona foliga ai lea o i tatou ia te ia, auā tatou te iloa tino ai lava o ia” (1 Ioane 3:2).

O ō tatou olaga masani i aso faisoo ua avea o le manumalo atoatoa ia Keriso pe afai e foliga ia Iesu i le taimi e afio mai ai o Ia: “Auā ua valaauina outou ona o lea lava mea; auā na tigaina Keriso lava o le sui o outou, ua tuuina mai ai e ia le faaa'oa'o mo outou, ina ia outou mulimuli atu i ona tulagaaao. O le na le agasala lava, na le iloa foi se pepelo i lona fofoga; o le sa agateleina, a e le'i toe agatele atu, na faatigaina o ia, a e le'i faamata'u atu, a ua tuuina atu o ia e ia i le na te faamasino tonu” (1Peteru 2: 21-23).

40-ASO O TALOSAGA MA ANAPOGI

O lea, o lenei upu moni matagofie mai le Tusi Paia e lē faatauvaā i Kerisiano auā o loo soifua Iesu i o tatou taimi. O Iesu ua lata tele lona toe afio mai, ma ua valaauina i tatou e le Atua i se faamasinoga vavā lalata ma Ia e maua luga atu i lo se tulaga na tatou i ai muamua.

O lenei vaega o le Faitauga e patino i le sini o le ta'ita'iina lea o latou uma e faitau ai ina ia malamalama ma ia vava lalata i le tumau mai o le Atua ua Ia ofoina mai ia te i tatou; o Keriso i totonu o i tatou, o le famoemoega o le manuia mo Ona tagata: “Na finagalo foi le Atua ona faailoa atu iai le uiga o le silisili o le lelei o lenei upu lilo i nuu ese, o Keriso lea o loo ia te outou o le faamoemoe i le manuia” (Kolose 1:27).

Pe afai e maua ma malamalama i lenei upu moni, o le a faailoa e le tagata talitonu ma folafola atu e mai le ta'ele o lona agaga: “O Keriso ua faia mea uma.” O le saolotoga na aumai e Keriso e avea ai mea uma na mitamita ai tagata o otaota. E leai se mea e mitamita ai se tasi ona o le manumalo i le agasala ma faaosoosoga. O le mamalu e tuuina atu lea i le Atua ma e faalauiloa pea e o'o i le faavavau: “Ina ne'i mitamita se tagata e toatasi i ona luma. A ua fua mai ia te ia ona i ai outou ia Keriso Iesu, o lē ua avea ai mo tatou poto mai le Atua, o le amiotonu foi, ma le paia, ma le faaolataga; ina ia faapei ona tusia, O le mitamita, ia mitamita o ia i le Alii” (1Korinito 1: 29-31).

MAFAUFAUGA MA TALATALANOAGA

1. Faamatala le auala o le tele o Kerisiano o e ua latou lua'i maua le upu moni ia Keriso “i le faamoemoe i le manuia” ua mulimuli ai.
2. E faapefea ona suia le olaga o le Kerisiano ina ua malamalama ma faamasani ai i lenei upu moni?
3. Ai se a e manaomia ai e le Kerisiano ona malamalama ma faamaoni e ola ai i lenei upu moni?
4. O le a lou naunau ia e malamalama ma faamasani e ola ai i lenei upu moni o le tumau ia Keriso ma tumau Keriso i totonu ia te oe?

FAAGAOIOIGA O TALOSAGA

- Valaau i lou soa tatalo ma talatalanoa i ni mea taūa o le faitauga o lenei aso.
- Tatalo ma lou soa tatalo:
 - ✓ Ia faaauau e le Atua ona papaatisoina taitoatasi oulua e Lona Agaga Paia.
 - ✓ Ia aumai e le Atua le faafouga i lou olaga faapea foi Lana ekalesia
 - ✓ Ia faaavanoa e le Atua lou malamalama i le upu moni o le Tusi Paia e uiga i le Tumau ia Keriso.
 - ✓ Tatalo mo i latou i lau lisi tatalo.

40-ASO O TALOSAGA MA ANAPOGI


IA AOFIA LE MAU LEA MA LE TUSI PAIA I LAU TATALO:

“Auā faauta mai, e ufitia le lalolagi i le pouliuli, e ufitia foi nuu i le pogisa; a e afio a’e Ieova i ou luga, ma le pupula o Ieova e aliali mai i ou luga. E o mai nuu ese i lou malamalama, o tupu foi e o mai i latou i le pupula o lou alu a’e” (Isaia 60: 2,3).

TATALO MULIMULI

Aveese i matou mai lo matou pouliuli faaleagaga. Le alii e, afio i totonu o i matou ma faaali lou mamalu ma lau amio e auala atu ia te i matou. Ia tosina nisi e toatele i le pupula o le upu moni ua e tuuina mai ia te i matou.

✓ 1/2/12



40-ASO O TALOSAGA MA ANAPOGI



ASO 26: O LE TAUIVIGA A LE KERISIANO

O le aso nei ua ou faaautuina ai le faitauga “O le tuiviga a le Kerisiano,” auā o le tagata talitonu e leai se tauiviga e pei o le Kerisiano. O le tagata e le’i liūa e le o i ai le Agaga o le Atua ma o loo pulea pea ia e le loto i la le tino. E pei ona fai mai Paulo “o le loto i la le tino o le ita lea i le Atua; auā e le usisusita’i i le tulafono a le Atua, e le mafai foi i ai” (Roma 8:7). O le tagata e le se Kerisiano e le usita’i i le tulafono a le Atua auā o le Atua na te tuuina i le loto o le tagata ma o lea e mafai ai. E usita’i atonu ona i ana lava mafuaaga, manatu faaptio, vaaiga a tagata, po o isi lava mafuaaga. Atonu foi na ola a’e i se aiga e lelei le faavae ma ta’iala ma avea ma mafuaaga ua i ai lona loto fuaia ifo ua ta’ita’iina ai o ia i se ola i se olaga faaaloologia.

Peta’i o le Kerisiano e usita’i ona ua tuuina e le Agaga le faanaunauga ia usita’i i lona loto: “A ia faafetai i le Atua, e ui lava ina fai outou ma auauna a le agasala, a ua outou gaua’i nei ma le loto ia faaa’oa’o i le mataupu na tuuina atu ia te outou” (Roma 6:17).

O le ua fanaufouina ua naunau tele ia faia le finagalo o le Atua i lona olaga. Ua ta’ua e Paulo lenei fiafia “... i le tulafono a le Atua i le tagata i totonu.” (Roma 7: 22). I lalo ifo o le folafolaga o le feagaiga fou, ua amata ona tusia le tulafono i lona loto ma le mafaufau: “Auā ua ta’ua o ia ua le sao le na muamua, ona fetalai atu lea o ia ia te i latou, O loo fetalai mai le Alii, Faauta mai, e oo mai ona aso ou te osi ai se feagaiga fou ma le aiga o Isaraelu atoa ma le aiga o Iuta; e le pei o le feagaiga na ou faia ma o latou tamā, i le aso na ou tago atu ai i o latou lima e ta’ita’i atu ia te i latou nai le nuu o Aikupito, auā o loo fetalai mai le Alii, ua le tumau i latou i la’u feagaiga, ona ou tuulafoai ai lea ia te i latou; a’o le feagaiga lenei ou te faia ma le aiga o Isaraelu pe a mavae atu ia aso, o loo fetalai mai ai le Alii, ou te tuuina atu a’u tulafono i o latou mafaufau, ma ou tusia i o latou loto; e faia foi a’u mo latou Atua, e fai foi i latou mo’u nuu.” (Eperu 8:8-10).

“O loo faaalua outou, o outou o le tusi a Keriso, ua saunia e i matou, e lei tusia i le vaitusi, a o le Agaga o le Atua soifua; ua le tusia i papatusi maa a’o papatusi aano o le loto” 2 Korinito 3:3).

Peita’i, o le tagata talitonu fou na te vave iloa e i ai le isi faanaunauga malosi o loo ia te ia—o le mana’o lea i le agasala. Ae ina ua ia te ia le Agaga o le Atua, ua ia iloa lona mana’o i

40-ASO O TALOSAGA MA ANAPOGI

le agasala, a e o aso muamua sa ia le manatu mamafa i ai. O lenei ua iloa e le Kerisiano e lua natura o Ioo nonofo ia te ia: o le isi e naunau ia mulimuli i le agasala, a e o le isi e naunau ia usita'i i le Atua. O loo faamatala manino e Paulo lenei fete'ena'iga o loo faia pea e Kerisiano uma lava i le Roma 7:14-25:

“Auā ua tatou iloa o loo i la le Agaga le tulafono, a'o a'u ou te i la le tino, ua faatauina atu a'u e fai ma tagata o le agasala. Auā ou te le iloa mea ou te faia; auā o le mea ou te faia ou te le loto i ai, a o le mea ou te inoino i ai o lea ou te faia. Afai foi ou te faia le mea ou te loto i ai, ma te 'au upu faatasi ma le tulafono, e lelei ia. O lenei, e le o a'u e toe faia lea mea, a o le agasala o loo nofo i totonu ia te au. Auā ua ou iloa e leai se mea lelei ua nofo i totonu ia te au, o lo'u tino lea; auā ua ia te a'u le loto atu, a ou te le'i iloa ona fai o le mea lelei; auā ou te le faia o le mea lelei ou te loto i ai, a o le mea leaga ou te lē loto ai, o le mea lea ou te faia. Afai foi ou te faia le mea lea ou te le loto i ai, ua lē o a'u e toe faia, a o le agasala o loo nofo i totonu ia te a'u. O lenei, ua ou iloa peiseai se tulafono ua ia te au; pe a ou loto atu i le lelei e fai, ua ia te a'u le leaga. Auā ou te fiasia i le tulafono a le Atua i le tagata i totonu. A ua ou iloa le tulafono ese i o'u tino, o loo tau le taua i le tulafono a lo'u mafaufau, ua fai foi a'u ma tagata o taua i le tulafono a le agasala o loo i o'u tino. Auē o a'u le tagata malaia! O ai se laveai ia te a'u ai le tino o lenei oti? Ou te faafetai lava i le Atua, auā o Iesu Keriso lo tatou Alii. O lenei foi o a'u nei lava ou te auauna i le tulafono a le Atua i lo'u mafaufau, a o le tulafono a le agasala i lo'u tino.”

O Kerisiano uma latou te malamalama i le tauiviga o loo ta'ua e Paulo. O Kerisiano latou te feagai ma tauiviga i aso fai soo, lea masina i lea masina, lea tausaga i lea tausaga, a e le maua lava le manumalo o loo latou mananao i ai. O Kerisiano uma foi e malamalama i le mea moni o le tulafono o le agasala o loo nofo i totonu ia te i latou ma o loo sii taua i le lagona mai le Atua ia usiusita'i i Lana tulafono. Pei ona fai mai Paulo, o ia e fiasia i le tulafono a le Atua. E matuā naunau foi e usita'i i le Atua i mea uma lava; ae peita'i, ua ia iloa e lē mafai ona ia faia faapea. O lona natura aagasala o loo le aunoa ona saili e fai ia ma pologa i le tulafono a le agasala.

Ina ua mautinoa le lē mafaia ona usita'i i le Atua ona o le malosi o le agasala i lona olaga, na alaga ai Paulo: “Auē o a'u le tagata malaia! o ai se lavea'i ia te a'u ai le tino o lenei oti?” Ona ia tautino lea o le laveaiga mai le tulafono o le agasala ua ala iā Iesu Keriso lo tatou Alii” (fuaiupu 24, 25). I le Roma 8:14 ua ta'uina mai ai e Paulo le tali o lenei faafitauli i le olaga o le tagata talitonu: “O lenei, ua leai se faasala i e o ia Keriso Iesu, o ē le savavali i la le tino, a e i la le agaga; aua o le tulafono a le Agaga o le ola ua iā Keriso Iesu, ua tuusaunoa mai lea ia te a'u mai le tulafono a le agasala ma le oti. Auā o le mea na lē mafaia i le tulafono, ina ua vaivai ia ona o le tino, ua faia lea e le Atua i lona auina mai o lona lava Alo, ua tino tagata agasala, o le taulaga foi mo agasala, na ia faasalaina ai le agasala i le tino; ina ia atoatoa ai le amiotonu i la le tulafono ia i tatou, oē le savavali i la le tino, a e i la le Agaga.”

O le tali mo le Kerisiano pagātia o le faatagaina lea o Iesu Keriso e ala i le tulafono le Agaga o le ola e faasaolotoina ai tatou mai le tulafono a le agasala ma le oti. I se isi faaupuga, e tataua

40-ASO O TALOSAGA MA ANAPOGI

ona faataga Iesu ia soifua o Ia ia te i tatou e ala i le papatisoga a le Agaga Paia. O loo ta'ua e Paulo lenā tulaga o i lana tusi i tagata Kalatia: “Ou te fai atu, ia outou savavali i la le Agaga, ona le faia lea e outou o le tu'inanau o le tino. Auā o le tino ua tu'inanau lea e tetee atu i le Agaga, ua tu'inanau foi le Agaga e tetee atu i le tino; ua feteenai ia mea, o le mea lea tou te lē fai ai mea tou te loto i ai.” (Kalatia 5: 16, 17).

Ua ta'ua e Paulo o le amiotonu e mana'omia o le tulafono e faa'atoaina i totonu ia te i tatou pe a afio Iesu ia te i tatou e ala i le papatisoga a le Agaga Paia: “Ina ia atoatoa ai le amiotonu i la le tulafono ia i tatou, o ē lē savavali i la le tino, a e i la le Agaga” (Roma 8:4).

MAFAUFAUGA MA TALATALANOAGA

1. O le a le eseese o le Kerisiano ma le lē Kerisiano i uiga ma lagona e faatatau i le agasala?
2. E faapefea ona faamanino mai e Paulo le feteenaiga a le Kerisiano ma le agasala?
3. O le a le tali ua ta'u mai e Paulo i le feteenaiga a le Kerisiano ma le agasala?
4. O le a se mea na tupu ia te oe e faatatau i le tauviga ma le agasala?

FAAGAOIOIGA O TALOSAGA

- Valaau lou soa tatalo ma talatalanoa iai e uiga i le faitauga o lenei aso.
- Tatalo ma lou soa tatalo:
 - *Ia faaaau e le Atua ona papatisoina taitoatasi oulua e le Agaga Paia.
 - *Ia aumaia e le Atua le faafouga i lou olaga faapea le ekalesia.
 - *Ia ta'ita'iina oe e le Atua ia maua le faamaoni ma tumau ia Keriso ma manumalo ai i le agasala.
 - *Tatalo mo i latou i lau lisi mo talosaga.

IA AOFIA LE MAU LEA MAI LE TUSI PAIA I LAU TATALO:

“Ina ia foai atu ia te outou e le Atua o lo tatou Alii o Iesu Keriso, o le Tamā e ona le mamalu, le Agaga e ona le potu ma le faaaliga, ina ia outou iloa lelei o ia, ia faapupulaina mata o outou loto, ina ia outou iloa le uiga o le faamoemoe ua i lona valaau mai, ma le uiga o le faulaigamea lelei o i lana tofiga ua silisili mo le au paia; ma le uiga o le silisili ese lava o lona mana ua ia i tatou o ē faatuatua, e tusa ma le galuega a lona mana tele lava” (Efeso 1:17-19).

ÕLEGA MULIMULI:

Aumai le potu ma le malamalama ia te i matou ina ia matou alolofa faamaoni ma matou lagona ai le agaga faafetai ia te oe. Faapupula o matou mata ia matou iloa lo matou pagatia i le agasala ma lau faamagaloga ma lou alofa mai.

40-ASO O TALOSAGA MA ANAPOGI

Ta'ita'i mai ia matou iloa le silisili ese o le faamoemoe ua ia iesu. Faavaai i matou ma matou talitonu ai i le tele o lou mana e avanoa mo i matou e faato'ilalo ai soo se mea e tuuina e Satani i o matou olaga. E ala i lou mana, faafo'i atu i matou ia te oe ma faafouina ai i matou.

1/2/12



40-ASO O TALOSAGA MA ANAPOGI

ASO 27: UA LEPETIA LE MALOSI O LE AGASALA

E tele vaega o le tala lelei ia Iesu Keriso. O le isi o le faato'ilaloina lea o le malosi o le natura agasala i le satauro mo i latou uma o ē talia ma talitonu iā Iesu Keriso. “Ua tatou iloa lenei mea, na faasatauroina faatasi mai ia lo tatou tagata tuai, ina ia faaumatia ai le tino o le agasala, ina ia lē toe faapologaina i tatou i le agasala.” (Roma 6:6). “Ia faapea foi lo outou taofi, ua outou oti i la le agasala, a ua outou ola lava i la le Atua i lo tatou Alii o Keriso Iesu.” (Fuaiupu 11).

Ina ua maliu Iesu i luga o le satauro, o le malosi o le natura agasala i olaga talitonu uma ua lepetia. O se tala moni lenā. Peita'i, e avea o le mea moni pe afai e faatuatua i ai. O lona uiga o oe na e lē alofa, na lē loto faamagalo, loto ita, na tu'inanau, mafaufauga ma lagona leaga, ma isi lava uiga leaga uma. Ua lepetia le malosi o na uiga ma amio faapena.

O le faafitauli e feteenai ma le tele o Kerisiano pe a latou faitau le Tusi Paia ua faapea loa e mafai ona latou tausia tulafono a le Atua e ala i le fesoasoani mai o le Atua. Faata'ita'iga, afai o le Kerisiano e loto ita, ua ia manatu afai na lepetia le malosi i le loto ita i le satauro o le a mafai ona ia taofi lona ita pe afai e se tasi se mea e faaita mai ai. Ua ia lagona le pei ua matu'u atu se avega auā o lea ua ia maua le manumalo. Atonu e oso ane se taavale a se isi i luma o lana taavale pe lafo mai foi e se isi se upu le talafeagai Ia te ia. O le taimi lenā e toe oso a'e ai lona ita. Ua taumafai e taofi lona ita ae peita'i e tumau lava. Na te lē manao i na lagona ae foliga mai e leai sona malosi e tete'e ese ai. Ua ia amata ona fesiligia pe ai se ā ua le te'a ai ae pei e tuputupu a'e pea lenei lagona. Ua ia manatu loa atonu na te le'i ōle atu i le Atua pe o le le'i maua e ia mai le Atua le malosi e tatau ona ia maua ina ia fesoasoani ia te ia ma lana taumafaiga ina ia manumalo i le loto ita. Ua ia aioi i le Atua ina ia aveese ia te ia le loto ita, ia na maua le mana o loo manaomia e maua ai e ia le manumalō. A e ui i lea o loo faaauau lava ona manumalo mai le agasala ia te ia. Ua faateleina le fenumia'i ma lagona to'ilalo. Ua na fesiligia lona faamaoni ma ua ia lē maua ai se to'afilemu i lana savaliga ma le Atua.

E moni lava o le malosi o lō tatou natura agasala na lepetia i le satauro. Peita'i, e lē faapea ua tatou talitonu o le a amata ona tatou usita'i i le tuuina atoa o lō tatou malosi e usiusita'i le tuuina atoa o lo tatou malosi e faia ai. Manatua, e leai so tatou lava malosi e usiusita'i ai i le Atua, e ui lava o lo tatou natura agasala na lepetia i le satauro. E le faapea o le iloa ma talitonu i le upu moni ua lava lena. E leai.

E tasi le auala tatou te maua ai le manumalo. O le manumalo i le faaosoosoga ma le agasala e faato'ā tupu pe afai tatou te talitonu i le upu moni i le faasatauroina o lo tatou natura agasala ma ia faatagaina Iesu e aumai ia te i tatou le manumalo. E tatau ona tatou malamalama e faato'ā tatou manumalo i le agasala ma le faaosoosoga pe afai tatou te faataga Iesu ia faatinoina lona soifua manumalo i ō tatou olaga:

“Auā ua lē iloa e i latou le amiotonu mai le Atua, ma ua saili e faatū la latou lava amiotonu, ua latou lē usiusita'i ai i le amiotonu mai le Atua. Auā o le uiga o le tulafono o Keriso lea, e oo

40-ASO O TALOSAGA MA ANAPOGI

mai ai le amiotonu i e faatuatua uma lava.” (Roma 10:3, 4). “Auā o lo’u ola ua ia Keriso lea; a o lo’u oti, o lo’u manuia lea” (Filipi 1:21).

MAFAUFAUGA MA TALANOAGA

1. O le a le mea na tupu i le malosi o le natura agasala o le Kerisiano i le satauro?
2. Afai ua iloa e sē tasi ua talitonu i le upu moni, o lona uiga ea ua mafai e ia ona usiusita’i atoatoa i le Atua?
3. O le a le isi mea e ao ina talitonu i ai le Kerisiano ina ia manumalo ai i le agasala e le aunoa?
4. Pe ua faaosoosoina ea oe i se taimi ina ia e talitonu e lē o oe o se Kerisiano faamaoni ona o le faafitauli o le agasala i lou olaga?
5. Pe ua e ōle atu ea i le Atua ina ia aveesea se agasala faapitoa mai lou olaga, a e foliga mai e lē faafofoga pe tali mai ia te oe, ma faaauau ai pea le tauiviga i lou olaga?

FAAGAOIOIGA O TALOSAGA

- Valaau i lou soa-tatalo ma talatalanoa iai e uiga i lenei faitauga.
- Tatalo ma lou soa-tatalo:
 - ✓ Ia faaāuāu e le Atua ona papatisoina taitoatasi oulua e le Agaga Paia.
 - ✓ Ia aumaia e le Atua le faafoūga i lou olaga faapea le ekalesia.
 - ✓ Ia tuuina mai e le Atua se faaaliga pe faapefea ona faataga Iesu ia avea oe ma auala e soifua ai Lona soifuaga o le manumalo i totonu ia te oe ma faailoa atu ai i nisi.
 - ✓ Tatalo mo latou i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ina ia foaiina ia te outou e tusa ma le faula’i o lona viiga, ia faamalosia outou i le mana o lona Agaga, i le tagata i totonu; ia nofo mau Kerisso i o outou loto i le faatuatua, ina ia maua’ a outou, ma ia faavaeina i le alofa, tou te mafai ai ona iloa lelei e outou atoa ma le au paia uma, o le uiga o le lautele, ma le umi, ma le loloto, ma le maua luga, ina ia iloa foi le alofa o Keriso ua silisili ese e lē ma iloa, ia faatutumuina outou i le tumu uma lava o le Atua” (Efeso 3:6-19).

TATALO MULIMULI:

Ia faatumuina i matou i lou Agaga Paia. Faamalosia matou i le mana o lou Agaga ina ia mafai ai ona matou tutū ma tetee atu i osofaiga a le fili. Faatumu matou i lou alofa ma ia faapupula o matou mata ia malamalama ai i le alofa o Keriso ina ia faailoa le alofa o Keriso i nisi e ala i a matou upu ma amio.

40-ASO O TALOSAGA MA ANAPOGI

ASO 28: E AUMAIA E KERISO LE MANUMALŌ

Se'i vaganā ua malamalama ma faagaoioi e le Kerisiano le uiga o le faatagaina o le manumalo ua tuuina mai e Keriso, e lē mafai lava ona ia maua le usiusita'i faifai pea o loo ia naunau i ai. I le faitauga o le asō, o le a ou tuuina atu ai pe faapefea ona faatagaina Keriso ia maua'a lona soifuaga ia te oe. A 'e malamalama loa ma e ola ai i lenei upu moni, o le a le toe tutusa lou olaga faa- Kerisiano. O le a le toe faaluafesasi lou usita'i ma folafolaga le taunuu i le Atua. O le a faasolo ona e manumalo e ala ia Keriso i faaososoga ma agasala uma e tuu mai e Satani i ou luma.

Mata 'ea e mafai ona maua se usiusita'i faapena? E mafai ea ona tatou maua le manumalo i faaososoga ma le agasala i o tatou olaga? O le ituaiga o olaga nā o loo valaauina i tatou ia tatou ola ai:

“Ua tatou iloa lenei mea, ua faasatauroina faatasi ma ia lo tatou tagata tuai, ina ia faaumatia ai le tino o le agasala, ina ia lē toe faapologaina i tatou i le agasala” (Roma 6:6). “Ia faapea foi la outou taofi, ua outou oti i la le agasala, a ua outou ola lava i la le Atua i lo tatou Alii o Keriso Iesu. O lenei, aua ne'i malō le agasala i ō outou tino auga vale, i lo outou gaua'i ai i ona tu'inaanau; aua foi ne'i tuuina atu o outou tino i le agasala e fai ma auupega a le amio leaga; a ia outou tuuina atu outou i le Atua e pei o ē ua ola nai e ua oti, ua ia tuuina outou tino i le Atua e fai ma auupega a le amiotonu. Auā e lē pule le agasala ia te outou; auā ua outou le nonofo i le tulafono, a o le alofa tunoa” (fuaiupu 11-14).

Ua faaopoopo mai foi Elena Uaita e faapea: “O le tagata e lē lava lona faatuatua ma talitonu e mafai e Keriso ona taofia mai o ia mai le agasala, e lē lava lona faatuatua e ulufale ai i le malō o le Atua.” (Manuscript 161, 1897, p. 9).

O le ā la le tali pe faapefea ona tatou ola i se olaga o le Kerisiano manumalo i aso uma? O le tali o le faatagaina lea o Iesu ia soifua lona soifuaga manumalo ia te i tatou; o le upu moni o loo a'oa'oina i le Tusi Paia: “Ou te tu'u Ieova i o'u luma e le aunoa; auā o i lo'u itu taumatau o ia, e le faagaetia ai lava a'u” (Salamo 16:8) “E te leoleoina ia fifilemu lava lē ua mausali lona loto; auā ua ia faatuatua lava ia te oe. Inā faatuatua ia outou ia Ieova e faavavau lava; auā o Ioa, Ieova, o le papa e faavavau ia.” (Isaia 26:3, 4) “Inā tumau ia outou ia te a'u, o a'u fo'i ia te outou. Faapei o le la e lē mafai ona fua pe 'a na o ia, pe afai e lē mau i le vine, e faapea foi outou, pe afai tou te lē tumau ia te a'u. O a'u nei o le vine, o lā outou. O lē tumau ia te a'u, ma a'u ia te ia, o ia lava e fua tele mai; auā e lē mafaia e outou ona faia se mea e tasi pe a a'u lē i ai” (Ioane 15: 4,5).

O le finagalo o Keriso ia faatumuina i manatu mamā, tonu, ma le paia. Pe afai tatou te ōle atu ia te ia ina ia soifua o ia ia i tatou e ala i le papatisoga a le Agaga Paia, ma pe afai tatou te talitonu iai e mafai ona faaalua lona alofa, lona paia, ma le tonu i ō tatou mafaufau—na te faia lava faapena e ala i le faatuatua; talitonu e mafai ona faaalua o ia i ō tatou olaga. Na faapea mai Paulo:

40-ASO O TALOSAGA MA ANAPOGI

“Ua faasatauroina faatasi i ma’ua ma Keriso; a e ou te lē toe ola a’u, a o Keriso o loo ola i totonu ia te a’u; o le ola foi ou te ola ai nei i le tino, ou te ola ai lava i le faatuatua i le Alo o le Atua, o le na alofa mai ia te a ‘u, ma foaiina mai o ia e ia e fai mo’u sui.” (Kalatia 2:20).

“Ina ia foaiina ia te outou e tusa ma le faula’i o lona viiga, ia faamalosia outou e le mana o lona lava Agaga, i le tagata i totonu; ia nofo mau Keriso i ō outou loto i le faatuatua, ina ia maua’ a outou, ma ia faavaeina i le alofa” (Efeso 3:16, 17).

Ina ia faatumauina le mausalī ia Keriso e tatau ona tatou manatua ua tumau Keriso ia te i tatou. Na fetalai mai e mafai pe afai tatou te talitonu ia te Ia. E tupu lenā mea pe afai tatou te maua le papatisoga a le Agaga Paia i aso taitasi:

“Ou te fai atu foi i le Tamā, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau; o le Agaga lea e tupu mai ai le upu moni, e lē mafai e le lalolagi ona talia o ia, auā ua lē vaaia o ia, ua lē iloa foi o ia; a o outou, ua outou iloa o ia, auā e tumau pea ia ia te outou. Ou te lē tuua outou o matua oti, ou te sau ia te outou” (Ioane 14:14-18). “O le tausī foi i ana poloaiga, o loo tumau lea i totonu ia te ia. O ia foi o i totonu ia te ia; o le mea foi lena ua tatou iloa ai o loo tumau o ia i totonu ia i tatou, auā o le Agaga ua foaiina mai ia te i tatou” (1 Ioane 3:24).

Afai e afio Iesu i totonu ia te oe, o lona finagalo ua ia te oe: “Auā po o ai ua na iloa le finagalo o le Alii na te a’oa’oina atu o ia? A ‘ua tatou maua le finagalo o Keriso.” (1 Korinito 2:16). Ua ia te i tatou lona Agaga o le alofa, olioli, filemu, onosa’i, agalelei, faatuatua, agamalū, ma le lē gaoiā—o fua uma ia o le Agaga; ma e fai mai Paulo, “e le faatulafonoina mea faapena.” (Kalatia 5: 22)

O le afio o Keriso i totonu ia te i tatou e ala i le papatisoga a le Agaga Paia, ua tatou iloa ai mea e fiafia ma mea e le fiafia i ai o ia. O lona finagalo, o lona faamagalo, e umi lava se lisi e faaopoopo mai. O uiga lelei o Keriso ua i totonu ia te i tatou, ae ala lea pe a ua tumau Keriso ia te i tatou.

Pe faapefea la ona faatinoina lenei upu moni? E mulimuli i le laasaga lenei. Afai ua e iloa le faaosoosoga i le agasala:

1. Filifili loa ia liliu lou mafaufau mai faaosoosoga: “Le au uso e, o le toe upu lenei; o mea uma ua moni, o mea uma ua ta’uleleia, o mea uma ua tonu, o mea uma ua mamā, o mea uma ua matagofie, ma mea uma ua logoleleia, afai foi o se i si amio lelei, po o se tasi mea e viia, ia outou manatunatu i ia lava mea” (Filipi 4:8).
2. Talitonu o le malosī o le uiga tosina o le natura agasala ma faaosoosoga e pulea ai oe ua faato’ilaloina.
3. Talitonu o loo afio Keriso i totonu ia te oe, ma ia ōle atu ia te ia na te faaalua ona uiga manumalo i le lua va feagai ai ma faaosoosoga.

40-ASO O TALOSAGA MA ANAPOGI

4. Talitonu o le a Ia faaalua Ia lava i lenā tulaga, ia mautu i le talitonuga lena, ma ‘aia le faatauvā i le faaosoosoga. Afai tatou te tauivi ma le faaosoosoga o lona uiga ua taula’i la tatou vaai i le faaosoosoga ma taumafai e tete’e atu i lo tatou lava malosia ae ua tatou lē taula’i le vaai ia Iesu na te aumaia le manumalo: “O lenei, o i tatou foi, o loo ua vagavagaia e le faapotopotoga o ē matamata mai e faapea ona toatele, ina tatou tuu ese ia mea mamafa uma, atoa ma le agasala e faalavelavegofie ia i tatou, ia tatou taufetuli ma le onosai i le ala tanu o i o tatou luma, ma ia vaavaai atu ia Iesu o le na te faaatoatoaina le faatuatua; o lē na onosai i le satauro, na faatauvaa ia te ia le ma ona o le olioli sa tuu i ona luma, ua nofo foi o ia i le itu taumatau o le Atua” (Eperu 12: 1, 2).
5. Faafetai ia te Ia ona o lana laveaiga ia te oe.

MAFAUFAUGA MA TALATALANOAGA

1. E tusa ai ma le Tusi Paia ma Elena Uaita, e mafai ea ona ola usiusita’i i taimi uma lava?
2. O le a se a’oa’oga a le Tusi Paia e uiga i le afio o Iesu i le tagata Kerisiano? Aumai ni mau.
3. O le a se aogā o le afio o Keriso i totonu ia te oe?
4. O a ni laasaga e faatagaina ai Iesu na te avatu ai le manumalo i faaosoosoga?
5. E faapefea ona e fuafua e te faaagaina lenei a’oa’oga i lou lava olaga?

FAAGAOIOIGA O TALOSAGA

- Valaau lou soa-tatalo ma talatalanoa iai e uiga i le faitauga o lenei aso.
- Tatalo ma lou soa-tatalo:
 - ✓ Ia faaauau e le Atua le papatisoina taitoatasi o oulū e lona Agaga Paia.
 - ✓ Ia aumaia e le Atua le faafouga i lou olaga faapea foi lana ekalesia.
 - ✓ Ia ta’ita’iina oe e le Atua ina ia faatagaina Iesu ia faaalua lona soifuaga manumalo i lou olaga pe a faa-osoosoina oe e le agasala.
 - ✓ Tatalo mo i latou o loo i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ia ia te ia o lē na te mafaia ona faia o mea uma e faasilisili lava i mea tatou te ōle atu ai ma mafaufau i ai, e tusa ma le mana o loo matuā galue i totonu ia te i tatou” (Eperu 3:20).

40-ASO O TALOSAGA MA ANAPOGI

TATALO MULIMULI:

Ia faapupula mai ia matou malamalama ina ia ‘aua ai ne’i matou masalosalo i lou malosi e lavea’i ai matou mai le agasala. Ia faaolalolaina i matou ta’itoatasi faapea lau ekalesia, ma ia faasalalau atu lau tala lelei i lo matou nuu.

Fesoasoani mai ina ia matou talitonu o le mana aupito malosi i le iunivesa o loo soifua i totonu ia te i matou e ala lea i lou agaga paia.

1/2/12

JESUS
is the
ANSWER

40-ASO O TALOSAGA MA ANAPOGI

ASO 29: TA'UAMIOTONUINA I LE FAATUATUA

O le ta'uamiotonuina i le faatuatua o le vaai lea ia Iesu ma faaalua o Lana amiotonu ma Lona soifuaga i o tatou olaga. E finagalo le Atua ia tatou vaai ia Keriso mo le manumalo ae lē o i tatou lava: “O lenei, o i tatou foi o loo ua vagavagaia e le faapotopotoga o ē matamata mai e faapea ona toatele, inā tatou tuu ese ia o mea mamafa uma, atoa ma le agasala e faalavelave gofie ai i tatou, ia tatou taufetuli ma le onosa'i i le ala tanu oi o tatou luma, ma ia vaavaai atu ia Iesu o lē na te ta'ita'iina ma lē na te faaatoatoaina le faatuatua; o le na onosa'i i le satauro, na faatauvaai ia te ia le mā, ona o le olioli sa tuu i ona luma, ua nofo foi o ia i le itū taumatau o le nofoalii o le Atua.” (Eperu 12: 1, 2)

O le amiotonu i le faatuatua moni lenā ma o le finagalo foi lenā o le Atua mo Kerisiano uma. O Oswald Chambers na ia faaupuina ai lenei upu moni matagofie i lana tusi, *My Utmost for His Highness*, o le faitauga mo Iulai 23 e faapea: “A ua fua mai ia te ia ona iai outou iā Keriso Iesu o lē ua avea ai mo tatou . . . le faaolataga” (1 Korinito 1:30).

O LE ITU O LE OLA: O le mea lilo o le faapaiaina o le aumaia lea o uiga lelei atoatoa o Iesu Keriso o se mea alofa mo a'u, e le auaua'i mai, a e tuuina mai e ala i le faatuatua i le mautinoaga ua avea o ia ma o tatou faaolataga. O le faapaiaina o le faaalua lea o le paia o Iesu i lo'u olaga. “O le mea lilo matagofie i le olaga faapaiaina e lē o le taumafai lea e faata'ita'i ia Iesu, peitai o le faailoa atu lea o Iesu i Ona uiga lelei i lo'u tagata. O le faapaiaina “o Keriso lea i totonu ia te oe.” (Kolose 1: 27). O lona soifuaga matagofie lea ua foaiina mai ia te a'u ua tuuina mai i le faapaiaina—ua foaiina mai o le mea alofa a le Atua e ala i lona alofa tunoa. Pe ou te loto malie ea e avea le faapaiaina e le Agaga Paia o se mea moni ia te a'u e pei ona iai i Lana Afioga?

O le faapaiaina o le tuuina mai lea o uiga lelei ma paia o Iesu Keriso ia te a'u. O le mea alofa o Lona onosai, alofa, paia, faatuatua, mamā, amioatua ua faaalua i olaga uma o ē ua faapaiaina. O le faapaiaina o le tuuina mai lea e Iesu o le paia lea na faaalua ia te Ia, ae o lenei, ua Ia faaalua ia te a'u.

O le faapaiaina e le o se mea faafoliga. O le atoatoa o le faapaiaina ia Iesu Keriso ma le mea lilo o le faapaiaina e atoatoa ma o uiga matagofie o Iesu e mafai ona ou tufaina atu. O le mafuaaga lena na mautinoa ai le amataina o se olaga pulea lelei, faatuatua, ma le amio Atua, “o leoleoina e le mana o le Atua” (1 Peteru 1:5).

Po ua e iloa le matagofie o lea upu moni? O la tatou vaega o le vaai lea ia Iesu i lo tatou faatuatua ma talitonu i folafolaga e faaalua Keriso ma Lana amiotonu e i tatou. Pe a oo mai manaoga leaga ma faaososoga, tatou te lē tau ma i latou. Tatou te liliu atu ia Keriso o loo soifua i totonu o i tatou ma fesili atu ina ia faaali Lana amiotonu. (Eperu 12: 1, 2). Ona tatou faatali lea ma faatuatua ma talitonu e faia lava e Ia. Afai e faailoa le atoatoa o Keriso i Ona tagata ona faamalamalamaina ai lea o le lalolagi i Lona pupula ma Lana amio. “Ua mavae ia mea, ona ou iloa atu lea o le agelu o loo alu ifo i le lagi, ua ia te ia le pule sili; ua malamalama foi le lalolagi uma i lona pupula” (Faaaliga 18:1).

40-ASO O TALOSAGA MA ANAPOGI

O tagata o Iesu ua pei lava o Ia: “Le au pele e, o le fanau i tatou a le Atua i nei ona po, ae le’i faaaliga mai nei le uiga o i tatou a amuli; a ua tatou iloa, pe a faaali mai o ia, ona foliga ai lea o i tatou ia te ia, auā tatou te iloa tino ai lava o ia” (1 Ioane 3:2).

Pe afai e afio mai o Ia, ona latou mafai ai lea ona tutū atu i luma o Keriso ma lona mamalu a e lē faaumatia i latou. O le folafolaga lena a le Atua i Lana fanau, ma e faataunuaina pe afai tatou te a’oa’o ia tatou ola ma tutupu ia Iesu e ala i le faatuatua mo lana faaaliga ia te i tatou: “O lenei, ia iā te ia na te mafaia ona leoleoina ia te outou ina ne’i pa’u’ū, ma tuuina atu ia te outou ua le ponā i luma o lona lava mamalu ma le fiafia tele.” (Iuta 24).

MAFAUFAUGA MA TALANOAGA

1. E tusa ai ma le faitauga o lenei aso, o le a le finagalo o le Atua mo Kerisiano uma?
2. O le a le ta’uamiotonuina i le faatuatua moni?
3. Ta’u mai i au lava upu le faamatalaga a Oswald Chambers.
4. E faapefea ona e fuafua e faatino le ta’uamiotonuina i le faatuatua i lou lava olaga?

FAAGAOIOIGA O TALOSAGA

- Valaau lou soa-tatalo ma talatalanoa iai e uiga i le faitauga o lenei aso.
- Tatalo ma lou soa-tatalo:
 - ✓ Ina ia faaauau e le Atua ona papatisoina taitoatasi oulua e Lona Agaga Paia.
 - ✓ Ina ia aumaia e le Atua le faafouga i lou olaga faapea Lana ekalesia.
 - ✓ Ina ia ta’ita’iina oe ia faatagaina Iesu ia faaaliga o Ia i lou olaga ma ia e faatinoina le ta’uamiotonuina i le faatuatua moni ia Keriso.
 - ✓ Tatalo mo ē o i lau lisi tatalo.

IA AOFIA LE MAU LEA MAI LE TUSI PAIA I LAU TATALO

“Auā ou te liligi atu le vai i le nuu naumati, ma vaitafe i le eleele mātūtū; ou te liligi atu lo’u Agaga i luga o lau fanau, ma la’u faamanuia i luga o ē tutupu mai ia te oe. E tutupu a’e i latou i totonu o le mutia, e pei o garava i auvai o vaitafe” (Isaia 44:3, 4).

TATALO MULIMULI:

Ua mātūtū faale-agaga i matou e pei o le laueleele matutu—liligi mai lou agaga i o matou luga ina ia toe faaolaolaina ai i matou ma tutupu a’e ai i le atoatoa o keriso.

40-ASO O TALOSAGA MA ANAPOGI

ASO 30: O TULAFONO A LE ATUA MA LE TUMAU IA KERISO

E ò faatasi le usiusita'i i tulafono a le Atua ma le tumau ia te ia. E le mafai ona e faia le tasi ae tuu le isi. Ua fetalai Iesu “Afai tou te tausia a'u poloaiga, ona tumau lea o outou i lo'u alofa; pei ona ou tausia poloaiga a lo'u Tamā, ma ou tumau i lona alofa.” (Ioane 15: 10) O Iesu, le Agaga Paia, ma le tulafono a le Atua e le mafai ona tuu eseese. Afai tatou te tumau ia Keriso o le a avea poloaiga e sefulu o se tasi o vaega taūa o lo tatou olaga auā o le Agaga Paia na te tusia ia i ò tatou loto. “O loo faaalua outou, o outou o le tusi a Keriso ua saunia e i matou, e le'i tusia i le vaitusi, a o le Agaga o le Atua soifua; ua lē tusia i papatusi maa, a'o papatusi aano o le loto.” (2 Korinito 3: 3).

Auā o le mea moni, o Iesu ao le'i liu tino tagata na ia tuuina poloaiga e sefulu iā Mose, o le Atua lava na ia tuuina tulafono na faaali ia Mose, e pei ona molimau: “O a'u o le ola, o loo ola lava.” “E te fai atu i le fanauga a Isaraelu ia faapea o a'u o le ola; o Ia na auina mai a'u ia te outou” (Esoto 3:14). Ua faapea mai fo'i Iesu ia te'i latou, “E moni, e moni, ou te fai atu ia te outou, sa a'u i ai, a o le'i leai se Aperamo” (Ioane 8:58).

I tusi a Paulo ua tatou maua ai le tele o faatonuga e uiga i tu ma amio e finagalo le Alii ia faaalua i o tatou olaga. E matuā manino lava faatonuga e faatatau i le amio:

“Ina ia outou to ese le tagata tuai o loo ua leaga, e tusa ma le amioga faaānamua, e tusa ma tu'inaanau e faasesē ai; a ia toe fuata'iina mana'o o outou loto, ma ia oofu outou i le tagata fou ua faia e foliga i le Atua, i le amiotonu ma le amio lelei e faamaoni. O lenei, ia outou tuu ese le pepelo, ia tautalatala faamaoni taitasi ma lē la te tuaoi; auā o itu tino lava i tatou o le tasi i le tasi. A outou ita, aua le agasala ai; aua nei goto le lā o ita pea outou. Aua foi ne'i tuuina e outou se mea e mautū ai le tiapolo. O le gaoi aua ne'i toe gaoi, ae lelei inā faamalosi o ia i galuega a ona lima i mea aogā, ia maua e ia se mea e avatu i lē ua mativa. Aua ne'i alu atu se upu leaga ai o outou gutu, na o le upu lelei e ati a'e ai i mea e aogā, e tupu ai le lelei i ē faalogologo i ai. Aua foi tou te faatigā i le Agaga Paia o le Atua, ua faamau faailogaina ai outou ia te ia seia oo i le aso e faaolaina ai. Ia te'a ma outou upu faafiufiu uma lava, ma le lotoa, ma le ita, ma le leo tele, ma le upu leaga, atoa ma le loto leaga uma lava. A ia outou feagaleleiai, ia femutimutivaleai lo outou alofa, ia fefaamagaloai outou, faapei ona faamagaloina outou e le Atua iā Keriso.” (Efeso 4:22-32)

Aiseā ua tele ai le avanoa na tuuina i le Tusi Paia ia faailoa mai ai *amio ua finagalo le* Atua ia tatou mulimuli i ai? O le mafuaaga auā e tataua ona tatou iloa tu ma amio e tataua ona ia te i tatou ina ia tatou iloa ai i taimi e faaosoosoina ai i tatou ia faia se amio sesē. Afai tatou te lē iloa le finagalo o le Atua, tatou te lē mafai foi ona filifili ia faatagaina Keriso e faaali lenā vaega o lana amio ia te'i tatou. Mo se faata'ita'iga, afai o le tagata faatuatua na te lē iloa e sesē le taofi umi lona ita ma fai se upu faitio i sē ua sesē mai ia te ia, na te lē liliu ese lona ita ma lona le fiafia. Na te lē filifili foi ia faatagaina Keriso e faaali lona faapalepale ma le onosa'i i le tulaga ua tula'i mai auā na te lē o iloa o ia uiga e sesē. O lea foi la e lē mafai ona faaali le amio a

40-ASO O TALOSAGA MA ANAPOGI

Keriso i lenā tulaga ua tula'i mai. E lē mafai foi la ona faatupuina a'e le amio a Keriso i lenā vaega o lona olaga.

Afai e soifua Keriso i totonu na te sailia ina ia faaali atu o loo ia soifua i totonu ia te i tatou. O lona uiga na te saili e soifua Tulafono e Sefulu i ō tatou olaga pei ona ia faia a'o femaliua'i i le lalolagi: "Lo'u Atua e, ou te fiafia e fai Lou finagalo; o loo i totonu lava ia te a'u lau tulafono" (Salamo 40:8). I le ma lea, o Poloaga e Sefulu e fesoota'i ma le alofa. Na faamalamalamaina lelei lava e Iesu ina ua ia a'oa'o e faapea:

"Faauta foi ua sau le tasi tagata, ua faapea mai ia te ia, Le a'oa'o lelei e, se a se mea lelei ou te faia ou te maua ai le ola e faavavau? Ona fetalai atu ai lea o ia ia te ia. Se a le mea e te ta'ulelei mai ai a'u? E leai se tasi e lelei, ua na o le toatasi, o le Atua lea. Afai e te fia oo i le ola, ia e tausi i poloaga. Ua fai mai o ia ia te ia, Po o le fea? Ona faapea atu ai lea o Iesu, aua e te fasioti tagata; aua e te mulilua; aua e te gaoi; aua e te molimau pepelo; Ia e ava i lou tamā ma lou tinā; ma ia e alofa atu i lē lua te tuaoi, ia pei o oe lava ia te oe." (Mataio 19:16-10)

"Ona fesili faatofotofo mai ai lea ia te ia o so latou, o le a'oa'o tulafono, ua faapea mai, Le A'oa'o e, o lē fea poloaga o i le tulafono ua sili? Ona fetalai atu ai lea o Iesu ia te ia, E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaga muamua lenā ma le sili. E faapea foi lona lua. E te alofa atu i lē lua te tuaoi, ia pei o oe lava ia te oe. O na poloaga e lua ua autu ai le tulafono uma ma le au perofeta." (Mataio 22:35-40)

Ua a'oa'o mai foi e le aposetolo o Paulo o le alofa ma Tulafono e Sefulu e faatatau i le faatinoia i le olaga o le tagata: "Aua ne'i ia te outou se mea e tasi a se tasi tagata; a e tau lava o le fealofani, auā ai sē alofa atu i sē tasi tagata, ua atoatoa ona faia e ia le tulafono. Auā o upu ia, Aua le mulilua, aua le fasioti tagata, aua le gaoi, aua le molimau pepelo, aua le tu'inanau, afai foi ua toe se isi poloaga, o loo ua aofia i lenei upu, Ia e alofa atu i lē lua te tuaoi, ia pei o oe lava ia te oe. E le agaleaga atu le alofa i le la te tuaoi, o lenei, o le alofa o le atoatoa lea o le tulafono." (Roma 13:8-10).

O poloaga muamua e fā e faailoa ai lo tatou alofa i le Atua; a'o le ono mulimuli ua ta'u mai ai pe faapefea ona tatou alolofa i isi tagata. Afai lā ua tumau Keriso i totonu ia te'i tatou, o Tulafono e Sefulu e fesootai lelei. E le mafai ona ia te oe le tasi e aunoa ma isi. Na tusia foi e Ioane lena fesootaiga i lana tusi muamua: "O le mea foi lea tatou te iloa ai ma tatou iloa o ia, pe afai tatou te tausi i ana poloaga. O sē faapea, Ua ou iloa o ia, ae le tausi e ia ana poloaga, o le pepelo lava lea, e lē o i totonu ia te ia le upu moni. A'o lē tausi i lana afioga, e moni, ua atoatoa le alofa i le Atua i totonu ia te ia. O lē faapea o loo tumau ia i totonu ia te ia, e tataua ona savali o lena tagata faapei ona savali o ia." (1 Ioane 2:3-6).

Ua faailoa mai e Ioane le fesootaiga lelei o le iloa o Iesu, o Tulafono e Sefulu, o le alofa, ma le tumau ia te Ia. Ua fai mai afai tatou te tumau ia Keriso e tatou te "savavali" pea o le ola e

40-ASO O TALOSAGA MA ANAPOGI

pei ona ia soifua. Aiseā? Auā o le a tatou ola e faailoa atu o loo soifua o Ia i totonu o i tatou, ma o tatou olaga e usiusita'i i Tulafono e Sefulu.

MAFAUFAUGA MA TALANOAGA

1. E faapefea ona fesootai le tumau ia te Ia ma Tulafono e Sefulu?
2. Na faapefea ona faafesoota'i e Iesu le alofa ma Tulafono e Sefulu?
3. O ai na tuuina mai Tulafono e Sefulu i le Mauga o Sinai?
4. O fea ua tusia ai e le Atua Tulafono e Sefulu i nei aso, ma e faapefea ona tusia?
5. E faapefea ona faatino le lesone o lenei faitauga i lou olaga i lenei vaiaso?

FAAGAOIOIGA O TALOSAGA

- Valaau lou soa-tatalo ma talatalanoa iai e uiga i le faitauga o lenei aso.
- Tatalo ma lou soa-tatalo:
 - ✓ Ia faaauau e le Atua ona papatisoina taitoatasi oulua e Lona Agaga Paia.
 - ✓ Ia aumaia e le Atua le faafouga i lou olaga faapea foi le ekalesia.
 - ✓ Ia tusia e le Atua Ana Tulafono e Sefulu i lou loto ma ia ta'ita'iina oe ia faatagaina Iesu ia faaalua lona soifua usiusita'i i Tulafono e Sefulu i lou olaga.
 - ✓ Tatalo mo i latou i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ua oo mai ona po e galue ai Ieova; ua solia e i latou lau tulafono” (Salamo 119:126).

TALOSAGA MULIMULI:

Ia aveese lo matou soli o au tulafono mai ia te i matou—tuu mai ia te i matou le agaga o le usiusita'i.

1/3/12

Love Seeks the
Best for Others
Not Pleasure

40-ASO O TALOSAGA MA ANAPOGI

ASO 31: TUMAU IA KERISO MA AUAUNA ATU

O le auauna atu mo le Alii e mafai ona avea ma avega mamafa i nisi taimi, e tumu i le faaatu ma le popole, ae le'i oo ina malamalama ma iloa lelei le tumau faamaoni ia Keriso ma ua tumau foi Keriso ia te ia. Peita'i, a masani loa i le mea lilo o le fesootaiga ma Keriso, o le a suia loa mea uma. O le auauna atu mo le Matai o le a avea o se mea fiafia. O foliga pei o se avega ma le popole vale o le a mavae ese.

O loo tusia e Elena Uaita le to'afilemu o Iesu a o ia auauna i tagata o le lalolagi. I le faamatalaina o Lana tali atu i Ona soo i le taimi o le afā ina ua fefefe i latou: “Ina ua fafagu mai Iesu ina ia maua ai se fesoasoani, na toafilemu lava o Ia. E le'i i ai se foliga mata'u pe popolevale i lona leo ma ona fofoga auā sa leai se fefe i Lona finagalo. Peitai sa Ia le faalagolago ia te ia o se malosi faale-Atua. E lē ona o Ia o le Alii o le lagi ma le lalolagi na ala ai ona ia toafilemu, auā o lana pule na Ia tuu ina ua afio mai o le tagata. Na Ia fetalai mai: “Ou te le mafaia se mea e tasi, pe a na o a'u.” (Ioane 5: 30). Na Ia talitonu ma faatuatua i le mana o Lona Tamā. O Lona faatuatua i le alofa o Lona Tamā—na faalagolago i le mana o lana upu e malū ai le sami ona o le mana o le Atua.” (Desire of Ages, p. 336).

Na tuuina mai e Elena Uaita se lu'iga ia te i tatou ina ia faatuatua i le Atua e faapea: “E pei ona mapu atu Iesu i le tausiga a le Tamā, e faapena foi ona tatou mapu atu i le tausiga a lo tatou Faaola. Auā pe a na fai e talitonu le au soo ia te Ia, se manū e le popolevale i latou. O lo latou fefefe i le taimi o puapuaga na iloa ai lo latou lē talitonu. I lo latou taumafai e faaola ia te i latou lava, na galo ai Iesu; na faato'ā latou tapa atu ia Iesu ina ua pagatia a latou taumafaiga ma latou ole atu loa ia te Ia mo Lana fesoasoani.

E faafia ona faapei o le mea na tupu i le au soo a tatou foi taumafaiga? Pe a faamalumalu mai afā o faaosoosoga, ua fe'emo mai uila, ma lofia tatou i galu, ua tatou fetau ma le afā na o tatou lava, ua galo ai e i ai Lē e mafai ona fesoasoani mai. Ua tatou talitonuina lo tatou lava malosi seia oo ina leai se faamoemoe, ma o le a tatou fano, ona tatou faato'ā manatua ai lea o Iesu, ma tatou valaau loa lea ia te Ia ina ia faaolaina i tatou. E le faaleaogaina la tatou valaau ia te Ia. . . . Pe o le laueleele pe o le sami pe afai e i ai Iesu i o tatou loto, e leai se mea o le a tatou fefefe ai. O le faatuatua ola i le Faaola e malū ai le sami o le olaga, ma ia laveaiina i tatou i le auala na te silafia e sili mo i tatou.” (Ibid).

Pe a tatou masani faamaoni i le tumau ia Keriso ma tumau o Ia i totonu ia te i tatou, o Lona faatasi mai o se mea moni. O lo tatou mapu atu ia te ia o se mea moni, ua le na o se faaupuga. O le fefe, popole, ma le atuatuavale o le olaga o le a te'a ese. O le avega o le auauna atu o le a siitia ma fesui ai i le mapu atu i le faatasi mai o Iesu. E pei ona fai mai Elena Uaita e tatau ona te'a ese lo tatou faalagolago ia i tatou lava ma liliu atu ia Keriso.

Afai tatou te tumau ia Keriso, o le a iai lo tatou fesootaiga ma Iesu e pei ona i ai foi lo laua fesootaiga ma Lona Tamā, o lea na mafai ai ona i ai le mautinoaga e fetalai ma galue le Tamā e auala atu ia te Ia. “E te le talitonu ea, o a'u o i totonu o le Tamā, o le Tamā foi o i

40-ASO O TALOSAGA MA ANAPOGI

totonu ia te a'u? O upu ou te tautala atu ai ia te outou, ou te le tautala fua na o a'u; a o le Tamā o loo nofo i totonu ia te a'u, o ia lava na te faia galuega.” (Ioane 14:10).

MAFAUFAUGA MA TALANOAGA

1. Afai e te fefe ma lē mautonu i au auaunaga mo le Alii, o le a le mea ua ta'u mai ai e uiga ia te oe?
2. Pe sa le tatau ea ona fefefe le au soo ina o iai i latou i le vaa i le taimi o le afā? Aiseā?
3. Pe faapefea ona e tali atu i puapuaga, faaosoosoga, ma faigata e oo mai i lou olaga?
4. O le a le finagalo o le Atua e uiga i la tatou tali atu i taimi faigata ma puapuaga?
5. O le a sau fuafuaga i le faaaogaina o le lesona i lenei faitauga ma su'esu'ega i lou olaga i lenei vaiaso?

FAAGAOIOIGA O TALOSAGA

- Valaau i lou soa-tatalo ma talatalanoa i le faitauga o lenei aso.
- Tatalo ma lou soa-tatalo:
 - ✓ Ina ia faaauau e le Atua le papatisoga taitoatasi o oulua e Lona Agaga Paia.
 - ✓ Ia aumaia e le Atua le faafouga i lou olaga faapea foi le ekalesia.
 - ✓ Ia faamanatu mai e le Atua ia vaai atu ia Iesu ma faatuatua ia te Ia i se avanoa e te maua e auauna ai mo Keriso, pe o faigata fo'i e oo mai i lou olaga.
 - ✓ Tatalo mo i latou i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Inā tofotofo ia outou, ma ia outou iloa e lelei Ieova; amuia lava le tagata e faatuatua ia te ia.” (Salamo 34:8).

Ia faatupuina lo matou talitonu ia te oe! Le alii e, ae le o mea o le lalolagi nei, ona e faamanuia tele mai lea ia te i matou.

40-ASO O TALOSAGA MA ANAPOGI

ASO 32: O LE MALOLOGA O LE SAPATI

O loo a’oa’o mai i le tala lelei le tala i le foafoaga. I le Kenese ua tatou faitau ai e faapea: “Ua uma lava ona faia o le lagi ma le lalolagi atoa foi ma mea uma o i ai. Ua faauma e le Atua i le aso fitu i lana galuega na faia e ia; ona malolō ai lea o ia i le aso fitu i lana galuega uma na faia e ia” (Kenese 2:1, 2). Ua tatou iloa na galue le Atua, ona malolo ai lea o Ia. O le tulaga o Atamu e faafeagai. Muamua, na ia ulu atu i le malologa o le Atua o le sapatu aso-fitu o le aso muamua lea o lona olaga. Ina ua uma le malologa i le aso fitu, ona galue ai lea o ia.

E tutusa foi ma le faasologa o le togiolaina o le tagata. O le Atua na Ia faaumaina le galuega o le togiola e ala i le soifuaga leai se agasala, maliu ma lona toe tu. E amata le galuega o le togiola i le olaga o le tagata i le mapu atu lea i le mea ua uma ona faia e le Atua mo ia. E malolo atu i le mautinoaga ua maliu Iesu mo ana agasala ma ua faaofouina o ia i le amiotonu a Keriso. E mapu atu i le mautinoaga na gausia le malosi o lona natura agasala i le satauro, ma ua saoloto nei e auauna saoloto i le Atua. I aso taitasi e mapu atu le Kerisiano i le mautinoaga o Keriso ua ola i totonu ia te ia ma o le a faaalua lea i lona olaga pe afai e filifili e faatagaina Iesu e pule ia te ia.

Afai loa e talitonu atoatoa le Kerisiano i nei upu moni, o le a mafai loa ona ola ma galue faamaoni mo le Atua i lona olaga ma lana auaunaga mo Ia. E manaomia lenei malologa e mafai ai ona auauna faamaoni i le Atua. O le malologa o lona uiga ua ia talia i le faatuatua mea ua faia e le Atua mo ia mo lona togiola, ma talitonu atoatoa ia Keriso.

I le Eperu e 4 o loo faamatala mai ai le manatu e uiga i le malolō atu i le Atua i le tala i le toilalo o Isaraelu ina ia ulu atu i le malologa o le Atua a o malaga i le vao. “O lenei, ua tuuina mai pea o le malologa faasapatu mo tagata o le Atua. Auā o lē ua sao atu i lona malologa, ua malolō foi o ia i ana galuega, faapei o le Atua i ana lava. O lenei inā tatou finafinau ia ina ia sao atu i lona malologa, ne’i iai se tasi e pa’ū i lona faaa’oa’o i lo latou faalogogatā.” (Eperu 4:9-11)

Ua manino le Afioga a le Atua e uiga i lenei mataupu o le malologa. Afai tatou te ulu atu i le malologa o le Atua, ua faamuta a tatou taumafaiga. Ua ta’ua mai e ta’ua lo tatou saili ia ulu atu i lenei malologa. A leai, ua tatou to’ilalo ona ua tatou lē usiusita’i i le Atua ona o lo tatou lē talitonu.

Pau le auala e tasi tatou te manumalo ai i faaososoga ma le agasala o le malolō atu lea i le mautinoaga ua tumau Keriso i totonu o i tatou ma ia faatagaina o Ia ia faaalua atu ua afio o Ia i totonu o i tatou ma ua atagia lea i o tatou olaga. E tataua ona tatou malolō i le upu moni lenā e ala i le talitonu, ae lē o le faalavelave i le galuega o le togiola a le Atua i o tatou olaga, pe tatou te taumafai e faaoga pea lo tatou lava malosi e usita’i ai i le Atua. O le tatou vaega o le talitonu ma filifili e faaalua i o tatou olaga ua afio Iesu i totonu ia te i tatou. O lenei malologa ia Keriso o le uiga moni lava o le malologa o le Sapati ua valaauina i tatou e le Atua ia tatou maua:

40-ASO O TALOSAGA MA ANAPOGI

“Ia e manatua le aso Sapati e te faapaiaina. O aso e ono e te galue ai ma fai ai au galuega uma lava; a o le aso fitu o le Sapati lea ia Ieova lou Atua; aua e te fai ai se galuega e tasi, o oe, ma lou atalii, ma lou afafine, o lau auauna tane, ma lau auauna fafine, o au manu foi, ma le tagata ese o loo mau ma oe. Auā na faia e Ieova i aso e ono o le lagi ma le lalolagi, atoa ma le sami, ma mea uma lava o iai, ona malolo ai lea o ia i le aso fitu; o le mea foi lea na faamanuia ai e Ieova le aso Sapati, ma na faapaiaina ai” (Esoto 20: 8-11).

O la tatou vaega le filifili ia talitonu. E manaomia le 100 pasene o lo tatou tuuina atu o i tatou ia Keriso i le 100 pasene o le taimi.

MAFAUFAUGA MA TALANOAGA

1. E faapefea ona a’oa’oina le tala lelei i le tala o le foafoaga?
2. O ā upu moni e uiga ia Iesu e tatau ona malolō ai Kerisiano?
3. E faapefea ona fesoota’i le malolō ia Iesu ma le olaga usiusita’i o le Kerisiano?
4. O le a le uiga moni o le malologa o le Sapati?
5. O le a sau fuafuaga e faatinoina ai le lesone i lenei faitauga i lou olaga i lenei vaiaso?

FAAGAOIOIGA O TALOSAGA

- Fesosota’i i lou soa-tatalo ma talatalanoa iai e uiga i le faitauga o lenei aso.
- Tatalo faatasi ma lou soa-tatalo:
 - ✓ Ina ia faaaauau e le Atua Lana papatisoga taitoatasi ia te oulua e ala i Lona Agaga Paia.
 - ✓ Ia aumai le faafouga i lou olaga faapea lana ekalesia.
 - ✓ Ia ta’ita’iina oe e le Atua ina ia e ulu atu i le uiga moni o le malologa o le Sapati.
 - ✓ Tatalo mo i latou i lau lisi tatalo.

FAAAGO LE MAU LEA I LAU TATALO:


“Ia outou saili ia Ieova manū o mafai ona maua o ia; ia valaau ia te ia manū o latalata mai o ia; ia lafoai e le ua amio leaga lona ala, ma le tagata agasala ia lafoai e ia ona manatu; a ia foi mai ia Ieova, ona alofa mai lea o ia ia te ia; ia foi mai i lo tatou Atua, auā na te matuā faamagaloina.” (Isaia 55:6, 7)

40-ASO O TALOSAGA MA ANAPOGI

TALOSAGA MULIMULI:

Ia faatupuina ia te i matou ia matou saili oe ma lafoa'i o matou uiga agasala ma mafaufauga leaga. Ia matou liliu atu ia te oe ma o matou loto atoa. Ia e alofa mutimutivale ia te i matou ma faamagalo mai i matou.

1/3/12



40-ASO O TALOSAGA MA ANAPOGI

VAEGA LIMA: PAPATISOGA A LE AGAGA PAIA MA LE MAFUTAGA

ASO 35: O LE PAPATISOGA A LE AGAGA MA LE MAFUTAGA I FAAPOTOPOTOGA

O le papatisoga a le Agaga Paia ma le mafutaga i faapotopotoga e ō faatasi. E manaomia ia vaega e lua ia tuputupu a'e faatasi ma faatumuina e le Atua. E manaomia le papatisoga a le Agaga Paia i tagata autu o se mafutaga ina ia mafai ai ona manuia le faapotopotoga ona ola lelei lea e pei ona finagalo ai le Atua. Ua tatou vaaia lea tulaga i le mafutaga a Iesu ma Ona soo. O le au soo e sefulu lua na vavā lalata le latou mafutaga ma Keriso i le tolu ma le afa tausaga. Peita'i na tatou vaaia lava lo latou lē loto gatasi i lo latou o atu i le Paseka a e ua lata lava le aveina o Iesu e le motu o tagata na latou pu'e ia te Ia ma i'u ai lava ina faasatauroina o ia. "Sa latou fefinauai foi po o ai so latou e sili." (Luka 22:24).

Sa latou le'i ausia le maualuga o le alofa ma le tuuina atu atoatoa o i latou i le mafutaga ma le Atua faapea foi le tasi i le isi. Sa le'i avea lo latou i ai i le faapotopotoga e ta'ita'iina e Iesu e lava e aumaia ai le suiga e manaomia ina ia tutupu ai i latou ia oo ina faatumuina ia Keriso. Mulimuli ane, ua tatou maua ua matuā suia lava i latou. O le a le eseesega? O le a fo'i le mea na tupu ia te'i latou? O lo latou mauaina lea o le Agaga Paia i le Aso Penetekoso na maua ai le suiga. Na amata mai i le aso lena na latou maua ai le Agaga Paia le mafutaga moni faa-Kerisiano o le mea lena e finagalo le Atua ia maua uma e le au faatuatua: "Ua tumau pea i latou i le mataupu a le au aposetolo, ma le mafuta faatasi ma le tofitofi o le areto, ma talotaloga. Ua latou nonofo pea ma le loto gatasi i le malumalu i lea aso ma lea aso, ua tofitofi foi le areto i lea fale ma lea fale, ua latou aai a latou mea e 'ai ma le fialia ma le loto faamaoni, ua latou vivii atu i le Atua, ma ua alofaina e le nuu uma lava. Ua faaopoopoina i le ekalesia e le Alii i aso fai soo o e ua faaolaina." (Galuega 42:46, 47)

E le'i mafai e le ulua'i ekalesia ona maua le mafutaga i taimi masani o tapuaiga i le taeao o le Sapati auā sa tele faagaioiga na manaomia e faataunuuina mo tagata talitonu. Na o le tasi le auala e mafai ai ona fesoota'i ma isi Kerisiano, o faapootopotoga laiti ia. O tapuaiga e masani ai i le Sapati e matuā taūa tele. Peita'i, e lē lava lena mo le mafutaga vavā lalata ma isi tagata.

O le taua o le mafutaga mo tagata ua faatumuina e le Agaga Paia e faailoa i tala ia e lua:

Sa faamalamalama e Paulo le manaomia o le mafuta faatasi o le au faatuatua i lana ulua'i tusi i tagata Korinito mataupu e 12. Ua faaaga ai e Paulo le faatusa o le ekalesia ma ona tagata i le tino. Na ia faasino ai le manaomia o itu tino taitasi ma o latou aogā mo le manuia o le tino atoa. E manaomia e Kerisiano ua faatumuina e le Agaga Paia le manaoga o lē tasi ma le isi: "Ua foaiina taitasi i tagata le faaaliga o le Agaga e aogā ai. Auā ua foaiina mai i le tasi le upu o le poto e le Agaga; e i le tasi le upu o le malamalama, e tusa ma le Agaga e tasi, e i le tasi le taofi tonu e le Agaga e tasi; e i le tasi le mea alofa e faamalolō ai ma'i, e le Agaga e tasi; e i le tasi na

40-ASO O TALOSAGA MA ANAPOGI

te faia vavega; e i le tasi o le perofeta; e i le tasi o suega o agaga; e i le tasi gagana eseese; e i le tasi o le faamatalaga o gagana. E matuā galue foi na mea uma e lea lava Agaga e tasi, o loo o tufatufa i tagata ia taitasi ma lana mea, pei ona finagalo i ai o ia. Auā pei o le tino ua tasi ia ma ona itu tino e tele, a o itu tino uma, e ui ina tele, o le tino e tasi lava ia; e faapea lava Keriso.” (1 Korinito 12:7-12)

“Na ia tuuina mai foi nisi e fai ma aposetolo, o isi foi e fai ma peofeta, o iai foi e folafola le tala lelei, o iai foi e fai ma leoleo atoa ma a’oa’o; ina ia faa’atoaina ai le au paia, latou te fai ai galuega a’auauna, ia atiina a’e ai le tino o Keriso; seia tatou oo atu o i tatou uma lava ma le loto gatasi i le faatuatua ma le iloa lelei o le Alo o le Atua, ina ia fai ma tagata matua ia oo i le fua o le ua matua, e tatau ma le tumu o Keriso; ina ia lē toe tama ninii i tatou o loo felafoaiina e pei o peau, ma feaveaiina i matagi uma lava o mataupu, i le pepelo o tagata, i togafiti leaga ua saunia e faasese ai. A ia amio faamaoni i le alofa, ia tutupu i tatou ia te ia i mea uma, o le ulu lava ia, o ia foi o Keriso; e mai ia te ia ona tupu o le tino uma lava, o loo faatatauina ua faasooina i ua uma lava e fesoasoani i ai, e tusa ma le galue i le fua o itu tino taitasi, ia i’u ina atiina a’e le tino e ia ia te ia i le alofa.” (Efeso 4: 11-16)

O le isi faata’ita’iga o le taūa o le mafutaga i totonu o aiga. Mafaufau mo sina taimi e te nofo ai i se afi ua aga’i ina mālala. E manaomia atonu e toe tuu atu i ai se isi fafie e faaauau ai pea le mumū, ae afai e ave ese se malala mai le faaputuga malala e vave lava ona pē. Ua faailoa mai ai le manaomia tele o le tuu faatasia ma latalata pea o malala. Ina ia mafai ona faaolaola pea le Kerisiano ua papatisoina e le Agaga Paia e tatau lava ona e lē gata i le tatalo ma ōle atu i le Atua ina ia faaatupuina pea e le Agaga Paia, ae ia mafuta faatasi foi uso ua talitonu ma le loto e tasi.

MAFAUFAUGA MA TALATALANOAGA

1. O le a le fesootaiga o le papatisoga a le Agaga Paia ma le mafutaga ma isi Kerisiano i faapotopotoga laiti (small groups)?
2. Pe na lava ea le tolu ma le afa tausaga na faatasi ai Iesu ma Ona soo e saunia ai i latou mo le mafutaga na finagalo Iesu ia latou maua? Aisea?
3. O le a se ata ua faaoga e Paulo e faamalamalama ai le vavā lalata o tagata Kerisiano?
4. O le a se isi ata ua a’oa’o mai e le natura i lenei lesona?
5. E te lagona ea e taūa le mafutaga faa-Kerisiano i lou olaga faale-agaga? Aiseā?

FAAGAOIOIGA O TALOSAGA

- Valaau lou soa-tatalo faasoa ma talatalanoa e uiga I le faitauga o lenei aso.
- Tatalo ma lou soa-tatalo:

40-ASO O TALOSAGA MA ANAPOGI

- ✓ Ia faaaauau pea le papataisoga e Lona Agaga Paia ia te oulua.
- ✓ Ia aumaia le faafouga i lou olaga faapea foi Lana ekalesia.
- ✓ Ia faamanuia e le Atua au taumafaiga ina ia avea oe o sē tasi o se mafutaga.
- ✓ Tatalo mo ē o i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ia sisina ifo o’u loimata ona o le faanoanoa; ia e faamalosia a’u e tusa ma lau afioga.”
(Salamo 119: 28)

TATALO MULIMULI

Ua faavaivai a’u e lo’u tulaga agasala. Faaliliu ese a’u mai la’u agasala.

Ia e faamalosia a’u i le itu faale-agaga e pei ona folafola mai.

1/4/12



40-ASO O TALOSAGA MA ANAPOGI

ASO 36: O LE EKALESIA

O le upu Eleni mo le ekalesia o le “ekkklesia”; o lona uiga “o ē ua valaauina.” Ina ua talia e alii ma tama’ita’i le valaau a le Agaga Paia ia talia Iesu e avea ma ō latou Faaola, ua avea loa i latou o se vaega o le ekalesia, o ē ua valaauina. Pe a tatou su’esu’e i le Feagaiga Fou tatou te iloa ai e lua vaega taūa o le ekalelsia. O ē na valaauina ia talitonu i a’oa’oga a le Tusi Paia. Ua faamatalaina e Paulo e faapea: “Ae afai ou te tuai atu, ia e iloa ai lau amio e tataui i le fale o le Atua, o le ekalesia lea a le Atua soifua, o le pou tū foi lea ma le lagolago o le upu moni.” (1Timoteo 3: 15). Ua ta’ua e Paulo le ekalelsia o le lagolago ma le pou tū o le upu moni a le Atua.

E iai foi le isi vaega taūa o le ekalesia o loo faailoa mai i le tusi muamua a Ioane e faapea: “O le mea lea na matou vaavaai i ai ma faalogologo i ai, matou te ta’u atu ai ia te outou, ina ia outou mafuta faatasi ma i matou; o loo matou mafuta faatasi foi i le Tamā lea atoa ma Lona Alo o Iesu Keriso.” (Ioane 1:3).

O le vaega e lua o le ekalesia o loo ta’ua i le Feagaiga Fou o le “mafutaga.” O le mea moni o lenei manatu e lē o se mea fou. O le mea moni, o le tasi uiga o le tatou mafuta lea pe a tatou tapua’i i le Sapati pe o se faatasiga i se fiafia a le ekalesia. Peita’i, e i ai le faalateleina o lenā manatu i le Feagaiga Fou e sili atu i lo le mea ua malamalama i ai le Kerisiano.

O le upu Eleni ua faaliliuina o le mafutaga o le “koinonia”. O le nauna o lenā upu o le fetufaa’i, pe o le ‘au ai i se faagaoioiga. O le veape o le upu o lona uiga o le talanoa, faasoa, ma tufa atu. O lona uiga la o le koinonia faatasi e sili atu nai lo le na’o na nonofo faatasi i le malumalu i tapuaiga i le Sapati pe o le taalo faatasi foi i taaloga e faia e le ekalesia. O le uiga o le mafutaga i le Feagaiga Fou e loloto atu lona uiga. Ua faataūaina le auauna o le tasi tagata i le isi tagata. E le na o le iloa o lona igoa, ma le mea e nofo ai, ma faafeiloa’i atu iai i le taeao o le Sapati. O lona uiga o le fefaasoa’i lea o faamoemoega, miti, o faigata ma puapuaga. O le uiga o le faatagaina lea o le Atua ia faaaogaina i tatou e auauna ai i le isi tagata. E tusa ai ma le Feagaiga Fou, o le ekalesia o le faapotopotoga lea o tagata ua valaauina e le Atua mai le lalolagi ina ia avea ma faapotopotoga e tutusa o latou talitonuga i le Tusi Paia ma e galulue faatasi e ta’uta’u atu, faasoa atu, tufa atu, ma auauna atu i isi tagata.

Afai e lē faapena le ituaiga mafutaga o loo tatou faia nei, o lona uiga ua tatou lē o ausia le fuafuaga a le Atua mo Lana ekalesia. Atonu o loo tausia le Sapati ma tatou faatasi i sauniga lotu, ae afai e tatou te lē o faatinoina le koinonia moni i le mafutaga faa-Kerisiano, tatou te lē o faia le finagalo o le Atua e pei ona faamatalaina e ao ina faataunuuna e le ekalesia.

MAFAUFAUGA MA TALANOAGA

1. O le a le uiga o le upu ekalesia i le Feagaiga Fou?

40-ASO O TALOSAGA MA ANAPOGI

2. O ā vaega e lua o le ekalesia Kerisiano i le Feagaiga Fou?
3. O le a le uiga o le mafutaga koinonia o le tasi i le isi?
4. O ‘ē ‘au ai i le mafutaga koinonia ma isi Kerisiano?
5. Afai o lau tali o le Ioe, o le a se mea ua tupu ia te oe ona o lenei ituaiga mafutaga?
6. Afai e leai, pe e te fia ‘au ai i se mafutaga faapena?

FAAGAOIOIGA O TALOSAGA

- Faafesoota’i ma valaau lou soa-tatalo e faasoa ma talatalanoa i le faitauga o lenei aso.
- Tatalo faatasi ma lou soa-tatalo:
 - ✓ Ia faaauau e le Atua le papatisoina taitoatasi o oulua e le Agaga Paia.
 - ✓ Ia auamiaia e le Atua le faafouga i lou olaga faapea foi Lana ekalelsia.
 - ✓ Ia faamanuia e le Atua au taumafaiga ina ia aveia oe o se vaega o le mafutaga koinonia, pe o le a faamanuia foi le mafutaga a le tou faapotopotoga pe afai o lena ua e au ai i se mafutaga faapena.
 - ✓ Tatalo mo i latou e i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“O outou na o ona tagata paia, ia outou matata’u ia Ieova, auā e leai se mea e mativa ai ē ua matata’u ia te ia.” (Salamo 34:9).

TATALO MULIMULI:

Ia faatupuina lo matou matata’u ma faaaloalo ia te oe ma o matou loto atoa.

Lavea’i mai matou mai mea o loo taofia ai i matou mai lo matou mauaina o mea faale-agaga o loo matou mana’omia.



40-ASO O TALOSAGA MA ANAPOGI

ASO 37: O LE AIGA O LE ATUA

Na faamalepeina e le agasala le aiga o le Atua. O le fuafuaga o le faaolataga na faatuina ia toe maua ai lenei aiga. Ua tautala Paulo i e na talia le valaau a le Atua i o latou olaga e faapea: “O lenei, e lē toe tagata ese outou, pe o ē ua aumau a ua nuu faaatasi ma le au paia, o le aiga foi o le Atua.” (Eperu 2: 19). O upu Eleni e faaliliu mai ai le “aiga” o le “oikeios”. Ina ua avea i tatou o tagata talitonu ia Iesu Keriso ua avea i tatou o tagata o le au aiga o le Atua.

E masani ona tatou manatu o ekalesia i lona uiga lautele, o le ekalesia i lona tuuaofa’iga po o le faapoatopotoga atoa. Ua tatou le manatu o le ekalesia i lona vaeveaga toaititi e pei o se au aiga. Peita’i, o le ulua’i ekalesia i lona tala faasolopito i le Tusi Paia ua ta’ua soo ai faapotopotoga laiti na faia i aiga. O nei mafutaga na ola ma galulue o le aiga. Na faamatalaina e Paulo ona lagona i le aiga o le Atua i Tesalonia, na ia faailoa atu lona va feagai ai ma i latou a o latou faatasi: “Sa faapea lava lo matou maelegā i le alofa ia te outou, na matou mana’o i le fia avatu ia te outou e lē na o le tala lelei i le Atua, a o matou ola foi, auā ua alofaina outou e i matou.” (1 Tesalonia 2:8).

O ituaiga o lagona mafanafana faapenā e lē maua i ni faalapotopotoga toatele. Afai o ā tatou faagaoioiga faale-ekalesia e gata i le faatasi mai i sauniga o le taeao o le Sapati, feiloa’i i ō tatou uso, tatou fo’i i le aiga, e tatou te lē o mauaina le tulaga lea o le mafutaga faale-aiga.

Mo se faata’ita’iga, ua e faalogo ea i se aiga e nonofo valavala i le vaiaso atoa, o mai faatasi i se aso e tasi mo le tasi pe lua itula, faatalofa atu le tasi i le isi, nonofo ma faalogologo i le tagata e toatasi o fai sana tautalaga, a mae’a ona toe fo’i lea o le tagata i lona lava ala se’i oo foi i le isi aso lona fitu toe o mai foi ma faatalofa le isi i le isi, nonofo ma faalogo i le tagata e aumai se tautalaga. O le ā sou manatu i le maopoopo o lona aiga? Ou te manatu e te fesiligia pe o le ā le ituaiga aiga e i ai lenā aiga. O le toatele o le a faapea mai e tele lava se galuega e faia mo le faaleleiina o lona aiga. A e o se mea e ofo ma faanoanoa ai foi ona o le ituaiga o aiga lona o loo sailia e le tele o aiga ekalesia e faata’ita’i i ai a latou ekalesia.

O le aiga maopoopo e iloa lelei e tagata taitoatasi le isi tagata. E malamalama i popolega, faamoemoega, o miti, faanoanoaga, ma lu’itau o le olaga. O le aiga maopoopo e amanaia e le isi tagata ma fesoasoani i ai i upu alofa, upu faamalosi ma tulaga e mafai ona fesoasoani ai.

E tatau ona faapena le aiga o le Atua. Peita’i, o le aiga o le Atua e iai faamanuiaga faapitoa e sili atu ai i lo le aiga e masani ai. O le aiga o le Atua e iai le fua o le Agaga e ogatotonu i ai faagaoioiga. O le Atua lava Ia o loo auauna i tagata o le au aiga. Na te faia lea e auala i tagata taitoatasi o le aiga a o latou maua pea le papatisoga a le Agaga Paia. O le mafutaga vavā lalata ma le Atua i aso taitasi e ala i le papatisoga a le Agaga Paia e avea ma auala e afio ai Iesu i totonu o le tagata talitonu ma auauna ai le tasi I le tasi; a o lenei ituaiga malosiaga o le aiga e na o le mafuta i se potopotoga to’a laiti e mafai ona faatino ai.

40-ASO O TALOSAGA MA ANAPOGI

MAFAUFAUGA MA TALANOAGA

1. O le a le ituaiga mafutaga na fuafuaina e le Atua mo Lana fanau i le amataga?
2. O le a le mea na faia e le agasala i lea fuafuaga?
3. O le a le fuafuaga a le faaolataga na faia mo le aiga ua malepe o le Atua?
4. O le a le ituaiga o mafutaga e finagalo le Atua ia iai i tagata o Lana ekalesia?
5. O le a le ituaiga faapotopotoga e faafaigofie ai lenei ituaiga mafutaga?
6. Pe e te fia au ai ea i le finagalo faaalua o le Atua mo Lona aiga ekalesia?

FAAGAOIOIGA O TALOSAGA

- Valaau ma fesoota'i atu i lou soa-tatalo e faasoa ma talatalanoa iai le faitauga o lenei aso.
- Tatalo faatasi ma lou soa-tatalo:
 - ✓ Ia faaauau e le Atua le papatisoina taitoatasi o oulua e Lona Agaga Paia.
 - ✓ Ia aumaia e le Atua le faafouga i lou olaga faapea Lana ekalesia.
 - ✓ Ia ta'ita'iina oe e le Atua i le ituaiga o mafutaga i le aiga ekalesia e finagalo ia e maua.
 - ✓ Tatalo mo e o loo i lau lisi tatalo.


IA AOFIA LE MAU LEA MAI LE TUSI PAIA I LAU TATALO:

“E tele lava mea leaga e oo i le ua amiotonu; a e laveaiina o ia e Ieova ai ia mea uma” (Salamo 34:19)

O SE TATALO MULIMULI:

Ta'ita'i i matou ia avea o ou tagata amiotonu o e ua fulitua i le agasala. Lavea'i matou mai faigata uma ua taumafai Satani e faato'ilalo ai i matou.

1/4/12



40-ASO O TALOSAGA MA ANAPOGI

ASO 38: O LE FUA O LE AGAGA MA LE MAFUTAGA

O vaega tetele e lua o le mafutaga faa-Kerisiano o fua o le Agaga ua faaalia i olaga o le au faatuatua. E tasi le auala e maua ai o le faatumuina lea i le Agaga Paia. I le faitauga o lenei aso o le a talanoaina ai le vaega e faia e fua o le Agaga i le mafutaga. Afai e leai ni fua o le Agaga o le a lē faasolo ina tuputupu ma matua le olaga, ma e lē maua atoa foi le manuia i olaga o se mafutaga: E lē maua foi le amio e tatau ona maua e auauna atu ai i nisi. O fua o le Agaga o loo lisi mai i le tusi a Paulo i tagata Kalatia: “A o fua o le Agaga o le alofa, o le olioli, o le filemu, o le onosa’i, o le mataalofa, o le agalelei, o le faamaoni, o le agamalū ma le le gaoiā; e lē faatulafonoina mea faapena.” (Kalatiaa 5:22, 23).

O le fua muamua o le alofa. O le upu Eleni o le alofa o le “agape”, o le ituaiga alofa lea e sili ona maua. O le alofa lenā o loo alofa mai ai le Atua ia te i tatou. O le faia lena o le mea silisili mo sē ua alofaina. O loo ta’ua e Iesu i le Mataio 5:44: “A ou te fai atu a’u ia te outou, ia outou alolofa atu i ē ua ita mai ia te outou, ia outou faamanuia atu i ē ua fetuu mai ia te outou, ia outou agalelei atu i ē ua inoino mai ia te outou, ia outou tatalo foi mo ē ua tuua’i fua mai ma faasauā mai ia te outou.”

O loo ta’ua foi e Paulo le alofa lea (agape) i le 1Korinito 13: 4-7: “E onosai le alofa, e agamalū, e lē losilosi le alofa, e lē mitamita vale le alofa, e lē faafefeteina, e lē amio matagā, e lē sailia e ia ana lava mea, e lē faaitaitagofie, e lē tuuina atu i nisi le leaga, e lē fiafia i le amio leaga, a e fiafia i le faamaoni, e ufiufi i mea uma, e talitonu i mea uma, e faamoemoe i mea uma, e onosai i mea uma.”

O le fua o le Agaga e mafai ai e tagata o le mafutaga ona faaalia o le agaga malamalama ma le lagona faaeteete mo isi tagata. O lenei faata’ita’iga o le a avea ma mea e faanofo filemu ai nisi e ‘ina’ina o latou leo ma amio. E le gata i lea e leai se uiga faamasino ma vaavaai vale pe a faasoa mai e se tasi o le mafutaga ni ona faafitauli. O le a avea le fua o le alofa o le mafuaaga e lagona ai le alofa ma le faapalepale. E aapa atu ma le upu faamalolō, upu faaloto tele, ma le fia laveai i lē ua afaina. O fua uma ua ta’ua e Paulo e iai le uiga matagofie i le tausia o le ituaiga o siosiomaga e manaomia mo le mafutaga o se aiga faa-Kerisiano ua finagalo ai le Atua.

O nei uiga lelei ua aofia i fua o le Agaga e lē mafai ona ausia pe a aunoa ma le Agaga Paia. O Kerisiano ua faatumuina e le Agaga Paia e manaomia ina ia mafai ai e le mafutaga ona faataunuina le faamoemoe; e manaomia le siosiomaga faapena e mafai ai e le mafutaga ona ola ma tutupu ia oo i le matua o Keriso.

“Na ia tuuina mai foi nisi e fai ma aposetolo, o isi foi e fai ma perofeta, o isi foi e folafola le tala lelei, o isi foi e fai ma leoleo atoa ma a’oa’o; ina ia faa’atoatoaina ai le au paia, latou te fai ai le galuega a auauna, ia atiina a’e ai le tino o Keriso, seia tatou oo atu o i tatou uma lava ma le loto gatasi i le faatuatua ma le iloa lelei o le Alo o le Atua, ina ia faia ma tagata matua ia oo i le fua o le ua matua, e tatau ma le tumu o Keriso; ina ia le toe tama ninii i tatou o loo felafoaiina e pei o peau, ma feaveaiina i matagi uma lava o mataupu, i le pepelo o tagata; i togafiti leaga ua

40-ASO O TALOSAGA MA ANAPOGI

saunia e faasesē ai. A ia amio faamaoni i le alofa, ia tutupu i tatou ia te Ia i mea uma, o le ulu lava ia, o ia foi o Keriso; e mai ia te Ia ona tupu o le tino uma lava, o loo faatatauina ma faasooina i ua uma lava e fesoasoani i ai, e tusa ma le galuega i le fua o tino taitasi, ia iu ina atiina ae le tino e ia ia te ia lava i le alofa.” (Efeso 4:11-16)

O fua o le Agaga e faato’ā mafai ona faaalia i le olaga o le tagata faatuatua ina ua papatisoina e le Agaga Paia ma e tataua lava ona i ai i olaga o tagata autū o le mafutaga. O fua o le Agaga na te aumaia le amio a Keriso i tagata o le mafutaga. E auala mai i tagata le alofa o le Atua. O Kerisiano ua faatumuina e le Agaga Paia latou te faaalia Lona alofa i tagata uma latou te mafuta e tusa fo’i pe Kerisiano pe leai.

MAFAUFAUGA MA TALANOAGA

1. O le a le mea e i tagata o le mafutaga e mafai ai ona maua fua o le Agaga?
2. Lisi mai fua o le Agaga ma faamatala pe o le ā le faamanuiaga e maua ai e i latou e aofia i lea mafutaga.
3. O le a sau fuafuaga fai ia avea ai oe o se tasi o se mafutaga faapena?

FAAGAOIOIGA O TALOSAGA

- Valaau ma faafesoota’i lou soa-tatalo e faasoa ma talatalanoa I ai le faitauga o lenei aso.
- Tatalo faatasi ma lou soa-tatalo:
 - ✓ Ia faaauau e le Atua le papatisoina o oulua taitoatasi e Lona Agaga Paia.
 - ✓ Ia aumaia e le Atua le faafouga i lou olaga faapea foi Lana ekalesia.
 - ✓ Ia faaalia e le Atua fua o le Agaga i lou olaga ma ta’ita’i oe i se mafutaga ua faatumuina i le Agaga Paia.
 - ✓ Tatalo mo i latou i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Auā tou te o atu ma le fiafia, e ta’ita’iina foi outou ma le manuia; o atu mauga ma mauga tetele ma le alaga fiafia i o outou luma, e pati lima foi laau uma o le vao. E tupu ae le perosi e sui ai le laau tuitui; e tupu ae le atasi e sui a’i le ogoogo; e fai foi ma igoa e viia ai Ieova, e fai foi ma faailoga e faavavau e lē mavae atu lava.” (Isaia 55:12, 13).

40-ASO O TALOSAGA MA ANAPOGI



TATALO MULIMULI:

Ia e faafoisia mai le fiafia ma le filemu o ia te oe. Aveese laau tuitui ma laau talatala faale-agaga o loo i o matou olaga ma olaga o lau ekalesia. Ia faateleina le olioli ma le alofa fiafia ia te oe. Ia faamanuina lou suafa i lenei faapotopotoga.

1/4/12



40-ASO O TALOSAGA MA ANAPOGI

ASO 39: O FUA O LE AGAGA MA LE MAFUTAGA

O le faaaogaina o mea alofa a le Agaga i le mafutaga e manuia ma olaola lelei ai. Talu ai ona e faaalua mea alofa a le Agaga i ē talitonu, e ao ai lava fo'i ona papatisoina i le Agaga Paia ē 'e 'au ai i lea mafutaga. E tele ni mau i le Feagaiga Fou o loo faamatala mai ai mea alofa faaleagaga. O le tele o mau maitauina e faatatau i mea alofa a le Agaga Paia o loo maua i tusi a le aposetolo o Paulo, e pei o nei:

“Auā faapei o itu tino e tele i le tino e tasi ae le tasi se faiva i itu tino uma; e faapea i tatou nei e toatele, ua tino e tasi ia Keriso, ua fefaafeagaiaitu tino. O loo eseese foi a tatou mea e tufaina mai i le alofa tunoa ua foaiina mai ia te i tatou; po o le perofeta, ia faatatauina ma le tofi o le faufautua, pe o le tiakono, ia faia le faiva o le tiakono, po o le a'oa'o, ia a'oa'o atu ia; po o le apoapoa'i, ia apoapoa'i o ia; o le foai mea ia faia ma le matamau; o le pule, ia faia ma le filigā, o le fai mea alofa, ia faia ma le loto fiafia.” (Roma 12:4-8).

“Ua foaiina taitasi i tagata le faaaliga e le Agaga e aoga ai. Auā ua foaiina mai i le tasi le upu o le potō e le Agaga; e i le tasi le upu o le malamalama, e tusa ma le Agaga e tasi; e i le tasi le taofi tonu o le Agaga e tasi; e i le tasi o mea alofa e faamalolō ai ma'i e le Agaga e tasi; e i le tasi na te faia vavega, e i le tasi o le perofeta; e i le tasi o su'ega o agaga; e i le tasi gagana eseese; e i le tasi o le faamatalaga o gagana. E matuā galue foi na mea uma e lea lava Agaga e tasi, o loo o tufatufa i tagata ia taitoatasi ma lana mea, pei ona finagalo i ai o Ia. Auā pei o le tino ua tasi ia, ma ona itu tino e tele; a o itu tino uma e ui ina tele, o le tino e tasi lava ia; e faapea lava Keriso.” (1 Korinito 12:7-12).

“A 'ua 'au mai ia te i tatou taitoatasi o le alofa tunoa, e faatatauina ma le mea foaifuaina mai e Keriso. O le mea lea ua fetalai mai ai o ia, Na afio o ia i luga ma ta'ita'i faatagataotaua le tafeaga; ua na foaiina foi mea alofa i tagata. . . Na ia tuuina mai foi nisi e fai ma aposetolo, o isi foi e fai ma perofeta, o isi foi e folafola le tala lelei, o isi foi e fai ma leoleo atoa ma a'oa'o.” (Efeso4:7-11).

O nei mea alofa e tele le sa'o i le tuputupu a'e faaleagaga o le tagata talitonu faapea le ekalesia. Na faaaogā e Paulo le faatusa i le tino, ma lisi mai ai ma le ta'ua i itu tino taitasi ma o latou aogā. O le i'uga ua manino—e manaomia e itu tino taitasi ona ola ma gaoioi lelei mo le manuia o le tino atoa ina ia soifua maloloina mo le faataunuaina o le galuega e ao ona fai. “Auā foi o le tino e le se itu tino e tasi lea, ae peitai o itu tino lasi. Afai e fai mai le vae, Ona ua le o le lima a'u ou te le so le tino; e moni ea, e le o le tino ia? Afai foi e fai mai le taliga, Ona ua le mata a'u, ou te le so le tino; e moni ea e le o lo le tino ia? Afai foi o mata uma le tino, pe faapefea ona faalogo? Afai na o le faalogo lava, pe faapefea on sosi? A o lenei ua tuuina e le Atua itū tino e taitasi ma lana tu i le tino, e pei ona finagalo i ai o Ia. Afai foi o mea uma o le itu tino e tasi ia, pe faapefea le tino? A o lenei, e lasi itu tino, a e tasi lava le tino ia. E lē mafai foi i le mata ona fai ane i le lima, E leai sou aoga ia te a'u; e le mafai foi i le ulu ona fai ifo i vae, Lua te le aoga ia te au. A e sili lava itu tino e ta'ua e vaivai ona sili o lo latou aoga.” (1 Korinito 12:14-22).

Ua faailoa mai foi e Paulo e tataua ona “fetausia'i itu tino uma.” (Fuaiupu 25) Auā afai e galulue i le mafutaga o le aiga ekalesia ia tulaga, o le a avea mea alofa o se faamanuiaga i itu tino uma lava o le tino o Keriso.

40-ASO O TALOSAGA MA ANAPOGI

Ua tatau ona manino lelei i le faamalamalamaga a Paulo i mea alofa a le Agaga e manaomia pe afai e fia tuputupu a’e le tagata Kerisiano faapea le ekalesia. O le faamatalaga a Paulo e “aua ne’i i ai i le tino se maseiga, a ia fetausia’i faatasi uma itu tino,” aua o le faateleina lea o le lelei o le mafutaga moni faa-Kerisiano ma e lagona ai le mafanafana ma lo tatou iloa lelei o isi o tatou uso. E tatau ona tatou sa’oloto e faasoa o tatou lagona loloto, o tatou manaogaa, lu’itau, faamoemoe, ma a tatou miti pe afai e tatou te auauna atu i isi. O loo faasino e Paulo le taua o le auaunaga a le tasi uso i le isi i lana tusi: “Ia outou fesui a outou avega e ave, ma ia faapea ona outou faia le tulafono a Keriso.” (Kalatia 6:2).

O lenei ituaiga mafutaga e lē maua i le faiga e masani ai. Afai o la tatou fesootaiga ma isi uso o le ekalesia o le tatou fetaui lea i le taeao o le Sapati ma na o le tatou faataalofa i ai, e le taitai mafai ona maua le mafutaga faale-Tusi Paia e pei ona mana’omia e Keriso.

O mea alofa a le Agaga e gaoioi i se auala matagofie e faamanuiaina ai tagata o le mafutaga. Mo se faata’ita’iga, o le mea alofa o le a’oa’o i le Feagaiga Fou o se a’oa’o le Afioga a le Atua. Ua tatou malamalama gofie i le ta’ua tele o le iai o lenei mea alofa i se mafutaga. O le mafutaga e lē o la latou sini muamua o le na’o le faitau o le Tusi Paia, peita’i o le mafuta faa’atasi, tapua’i ma tatalo faa’atasi mo le faamalologa a le Atua. O le mea alofa o le a’oa’o e talafeagai ma le mafutaga. O lesona mai le Afioga a le Atua e faapupu’u ae sili atu lenā i lo le faamatalaga umi. O le vaega o le faamamafa e tuuina lea i a’oa’oga mai le Tusi Paia e faa’oga i olaga o tagata i aso fai soo faapea ni mataupu ma fesili e aumai e tagata o le mafutaga.

O le tasi faata’ita’iga o le mea alofa o le apoapo’a. A iai lena mea alofa i se tasi, e faa’oga e le Atua ina ia tautala ai i upu faamalosi, faamafanafana, avatu le faamoemoe ae maise pe afai o nisi o le mafutaga o feagai ma ni faigata ma faafitauli i o latou olaga. O le faaalia o lenei mea alofa ia aumaia le mafaufau ma manatu lelei, apoapo’a ma upu faalototele mai le Tusi Paia e uiga i le faaolataga e faufautua ai i uso o le mafutaga. O mea alofa faaleagaga ua faaalia ai i uso o le mafutaga Kerisiano e mafai e le Agaga ona fesoasoani i tagata uma o le mafutaga.

MAFAUFAUGA MA TALATALANOAGA

1. O le a le mea e tatau ona iai i tagata uma o le mafutaga ina ia maua ai mea alofa a le Agaga?
2. Lisi mai ni meaalofofa a le Agaga ma ta’u mai le aogā o ia meaalofofa e faa’oga e le Atua ia auauna ai i ē o i le mafutaga.
3. Pe na e vaaia le faaalia o mea alofa a le Agaga i a te oe ma ua e auauna ai i nisi? Afai e Ioe, o le fea mea alofa?

FAAGAOIOIGA O TALOSAGA

- Valaau ma faasesoota’i lou soa-tatalo e faasoa ma talatalanoa i lenei faitauga.
- Tatalo faatasi ma lou soa-tatalo:
 - ✓ Ia faaauau e le Atua le papatisoga taitoatasi o oulua e ala i Lona Agaga Paia.
 - ✓ Ia aumaia e le Atua le faafouga i lou olaga faapea Lana ekalesia.

40-ASO O TALOSAGA MA ANAPOGI

- ✓ Ia faaalua e le Atua ia te oe mea alofa a le Agaga ua Ia filifili mo oe ma ia faaaogaina e te auauna ai i nisi e ala i ia mea alofa.
- ✓ Tatalo mo i latou i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“Ia outou ilia le pu i Siona, ia outou atofaina ni aso e anapogi ai, ia outou tala’iina se faapotopotoga. Ia outou faapotopotoina le nuu, ia outou faapaiaina le faapotopotoga, ia outou faapotopotoina toeaina, ia aofia tama iti . . . Ia fetagisi le au osi taulaga o auauna a Ieova, i le va o le faapaologa ma le fata faitaulaga, ma ia latou faapea atu, Ieova e, ia e faasaoina lou nuu, aua foi e te tuuina atu lou tofi ia faalumaina, ina ne’i fai ma faaatusa o nuu ese; latou te faapea i se ā i nuu, O i fea lo latou Atua? Ona fuā lea o Ieova ona o lona nuu, na te alofa mutimutivale i ona tagata. E tali mai Ieova, ma faapea mai i lona nuu, Faauta mai, ou te foaiina atu ia te outou o saito, ma uaina, ma suauu tou te maoona ai; ou te le toe tuuina atu ia te outou ia faalumaina e nuu ese.” (Ioelu 2:15-17).

TATALO MULIMULI:

Tuuina mai ia te i matou le naunau ia faapotopoto faatasi e saili ia te oe ma le faamaoni i le tatalo; ia viia lou suafa ona o i matou; ma ia vaaia e nisi o oe e te faatasi ia te i matou.

Ia e alofa mutimutivale ma se’i e faaolaola mai ia te i matou ina ia matou ola tauuluulu ma fua tele mai, o i matou o ou lava tagata.



40-ASO O TALOSAGA MA ANAPOGI

ASO 40: O MAFUTAGA MA LE TUPUTUPU O LE EKALESIA

O le mafutaga a le au talitonu e taūa tele i le toe fo'i atu i le Atua i le itu faaleagaga, mafaufau, e faapea foi ma le tino. O le faatupuutupu o le olaga faaleagaga o le sini lea e tatau i mafutaga uma ona latou tuli mata'i i ai. Afai e lē tupu se mafutaga o lona uiga e le o gaoioi i le auala ua finagalo ai le Atua. Ia manatua, o le papatisoga a le Agaga Paia ua tuuina mai mo le tupu a'e faaleagaga e le gata mo tagata taitoatasi ae mo le faasalalauina o le tala lelei. O lā le aposetolo o Paulo, “Ae maua e outou le mana, pe a afio ifo le Agaga Paia i luga ia te outou; e fai foi outou ma molimau ia te a'u i Ierusalema ma Iutaia uma lava, ma Samaria, e oo lava le tuluiga o le lalolagi.” (Galuega 1:8).

E manaomia mo lo tatou lava tuputupu a'e faaleagaga le 'au ai i le aumaia o nisi ia Keriso. E tatau ona tatou faalogo i le fetalaiga a le Atua ia “fanafanau ma ia uluola.” (Kenese 1:28). E mafai ona faaaogā e le Atua agelu latou te faia le galuega o le laveaiina o agaga, peita'i e leai. Aisea? Ua ia silafia le taūa tele o i tatou taitoatasi i le galuega o le aapa atu i nisi mo Keriso. O loo ta'ua foi e Elena Uaita e faapea: “Afai e te alu e fai le galuega na faataatia e Iesu mo ona soo mo le laveaiina o agaga mo Ia, o le a e lagona lou manaomia o se malamalama tele ma le iloa lelei o mea tau le Atua, o le a e lagona foi le fia 'ai ma le fia inu i le amiotonu. O le a e faatauana i le Atua, o le a faamalosi lou faatuatua ma o lou agaga o le a inu i vaipuna loloto o le faaolataga. O lou fesaga'i ma le tete'e mai, ae maise faigatā o le a e sulufa'i ai i le Tusi Paia ma le tatalo. O le a e tuputupu i le alofa tunoa ma le malamalama o Keriso, ma e faatupuina ai le tamaoiga o lou iloa.” (Steps to Christ, p. 80).

O le lagolago a le mafutaga e i ai le vaega taūa tele i la tatou taumafaiga mo le aapa atu i nisi. O tagata o le mafutaga e soo faatasi i talosaga mo e o loo aapa atu i ai. O faufautua e lava lo latou poto masani i le laveaiina o agaga o le a faamanuiaina ai tagata uma o le mafutaga. O tamā ma tinā matutua o le mafutaga o le a faaaogaina e le Atua e fesoasoani i nisi o le mafutaga e le'i lava lo latou iloa i le ta'ita'iina o tagata ia Keriso.

O le faatasi ai i le mafutaga e avea ma siosiomaga matagofie mo lē o loo saili i le Atua; auā o i latou e i ai i le mafutaga e fialia e talia o ia i le tulaga o loo i ai. O le a maua e le o loo saili se siosiomaga o loo i ai le Agaga o le Atua e galue i se auala e i ai le mana e liua ai o ia ia Keriso. E pei ona tatou faitau i le tusi o Galuega a o mafuta faatasi ma tupu a'e ai le ulua'i ekalesia: “Ua latou nonofo pea ma le loto gatasi i le malumalu i lea aso ma lea aso, ua tofitofi foi le areto i lea fale ma lea fale, ua latou aai a latou mea 'ai ma le fialia ma le loto faamaoni, ua latou vivii atu i le Atua, ma ua alofaina e le nuu uma lava. Ua faaopoopoina i le ekalesia e le Alii i aso fai soo o e ua faaolaina.” (Galuega 2:46, 47).

E galue le Atua e le gata i ē talitonu ae faapea foi i ē le talitonu o ē o i le mafutaga, e auala lea i fua o le Agaga ma mea alofa a le Agaga Paia. E matuā suia e le mafutaga laititi le talaiga faalauaitele e pei ona masani tagata e toatele ona 'au atu iai. O le mea aupito taūa o se mafutaga toaititi e felata'i ma masani lelei ma vavā lalata i le vā fealoa'i. A faatasi ma 'au ai se

40-ASO O TALOSAGA MA ANAPOGI

tagata e lē talitonu ma ia maua ai le faa-Kerisiano ma le upu moni fou i le Tusi Paia e iloa e ia o se siosiomaga lelei lea mafutaga. O Iona ‘au atu ai i se faapotopotoga e feasoasoani i lona tuputupu a’e faale-agaga.

MAFAUFAUGA MA TALANOAGA

1. O a ni mafuaaga moni se lua o le mafutaga faa-Kerisiano?
2. Lisi mai ni fautuaga e mafai ai e le mafutaga ona faaleleia atili le galuega o le aapa atu o le Kerisiano i nisi e lē o i le mafutaga:
3. E faapefea ona e fuafua e avea oe ma vaega o le mafutaga tuputupu pea ma faaaogaina e le Atua e faasoa atu Keriso i nisi?

FAAGAOIOIGA O TALOSAGA

- Valaau ma faafesoota’i lou soa-tatalo ma talatalanoa mea taua o lenei faitauga.
- Tatalo ma lou soa tatalo:
 - ✓ Ia faaaauau e le Atua le papatisoina taitoatasi o oulua e Lona Agaga Paia.
 - ✓ Ia aumaia e le Atua le faafouga i lou olaga faapea foi i Lana Ekalesia.
 - ✓ Ia ta’ita’iina oe e le Atua ina ia avea oe o se tasi o se mafutaga tuputupu a ‘e ma faaaogaina ina ia aumai ai nisi ia Keriso.
 - ✓ Tatalo mo e o i lau lisi tatalo.

IA AOFIA LE MAU LEA MAI LE TUSI PAIA I LAU TATALO:

“O outou foi le fanau a Siona e, ia outou fiasia ma olioli ia Ieova lo outou Atua; auā ua ia foaiina faatatau mai ia te outou le ūaga muamua, na te faatotōina ifo foi le ūa mo outou, o le ūaga muamua, atoa ma le ūaga mulimuli i le masina muamua. Tou te aai lava, ma maoona ai, tou te vivii atu foi i le suafa o Ieova lo outou Atua, o lē na faia vavega ia te outou . . . Ou te liligi ifo ai lo’u Agaga i luga i tagata uma; ona perofeta ai lea o outou atalii ma o outou afafine, e fai miti o outou toeaina, e iloa faaaliga e o outou taulelea.” (Ioelu 2:23-28).

TATALO MULIMULI:

Aumai ia te i matou le naunau faamaoni mo lou agaga paia, ta’ita’i mai ina ia matou tatalo mo le uaga muamua o le papatisoga a le agaga paia i o matou olaga ma le uaga mulimuli mo le liligiina mai o lou agaga paia. Faaalia mea alofa a lou agaga i o matou olaga ma faaaogaina ai i matou ina ia viia ai lou suaga.
Faailoa lou mana ia te i matou faapea lo matou nuu ina ia latou iloa oe o lo latou atua ma le faaola.

1/4/12